

# Борьба за жизнь



5.2019

# Ыджыд Победа луно



Снимокъясыс pg11.ru сайтъсы.

ПЕТӦ 1926 ВОСЯНЬ

ЛЭДЗӦНЫ: КОМИ РЕСПУБЛИКАСА ЮРАЛЫСЬЛӦН АДМИНИСТРАЦИЯ,  
КОМИ РЕСПУБЛИКАСА ГИЖЫСЬ КОТЫР

# ВОЙВЫВ КОДЗУВ



ISSN 0134-4323

БЫД ТӦЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

## 5 (869) ОДА-КОРА (МАЙ) 2019

### ТАЙӦ НОМЕРЫН:

Анжелика ЕЛФИМОВА. Бара на ме кывбуръясӧн вися... Кывбуръяс .....	3
Алексей ПОЛУГРУДОВ. «Подув пуктысьяс»: редакциясянь водзкыв пыдди .....	7
Юрий ВАСЮТОВ. Подув пуктысьяс. Вӧвлӧмтор йылысь висът .....	8
Александр ШЕБЫРЕВ. Эскӧд, Енмӧй... Кывбуръяс .....	37
Аркадий МИШИН. Из вылӧ из. Роман .....	42
<i>ВУНЛЫТӦМ НИМЪЯС. ЁРТЪЯСӦС КАЗЬТЫЛӦГ</i>	
Николай ФРОЛОВ. Парма ловъя. Драма .....	58
<i>ЫДЖЫД ПОБЕДАЛЫ — 74</i>	
Никон ХАТАНЗЕЙСКИЙ. Татшӧмторсӧ некор вунӧдны оз позь. Фронтӧвикъяслӧн казьтылӧмъясысь .....	71

12+

Обложка вылын снимокыс Юрий Лисовскийлӧн.

© «Войвыв кодзув» («Северная звезда»), 2019 г.

СЫКТЫВКАР

# СЕВЕРНАЯ ЗВЕЗДА



*Ежемесячный  
литературно-художественный  
журнал*



**Учредители:**

**АДМИНИСТРАЦИЯ ГЛАВЫ РЕСПУБЛИКИ КОМИ**

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ  
ОТДЕЛЕНИЕ ОБЩЕРОССИЙСКОЙ ОБЩЕСТВЕННОЙ ОРГАНИЗАЦИИ  
«СОЮЗ ПИСАТЕЛЕЙ РОССИИ»**



**Издатель:**

**АУ РК «ИЗДАТЕЛЬСКИЙ ДОМ КОМИ»**

**ДИРЕКТОР ОРЁЛ И.Н.**



**РЕДАКЦИОННАЯ КОЛЛЕГИЯ:**

Главный редактор

ПОЛУТРУДОВ А.В.

Ответственный  
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.



Анжелика ЕЛФИМОВА



## Бара на ме кывбуръясөн вися...

\* \* \*

Гожомыс төрыштіс кӧкъямыс стрӧкаӧ,  
Кӧкъямыс стрӧкаӧ — квайтымын лун.  
Войяснас дзоридза рифмаяс вӧтала,  
Дзоридза рифмаяс некыдз оз вун.

Вижӧдӧм шыясыс кок улӧ усьӧны,  
Ӧтиӧн лоӧма шыавтӧм сер.  
Арыс мем бӧрдӧмӧн вашкӧдӧ гусьӧник:  
«Волас на гожомыс. Сӧмын эн зэр...»

\* \* \*

Лымйыс помся усьӧ-усьӧ,  
Лымйыс тыртӧ-тыртӧ гӧгӧр.  
Тэ мем муса, муса, муса,  
Но ме абу тэнад гӧтыр.

Лымсӧ тэ он мекӧд таяв.  
И он мекӧд сыын дзирдав.  
Пета лымъяс еджыд шалля,  
Овны видла...

\* \* \*

Шыясысь артмӧны кывъяс,  
Кывъясысь артмӧны мӧвпъяс,  
Мӧвпъясысь артмӧны гыяс,  
Мӧвпъясысь артмӧны вӧвъяс.

Гыясӧд кывтӧны пыжъяс,  
Вӧвъяслӧн быдмӧны бордъяс.  
Ва вылын — шыяса кытшъяс,  
Енэжын — шыяса лӧдзъяс...

\* \* \*

Ветлам-мунам,  
Ветлам-мунам.  
Туйыс тырмө,  
Туйыс уна.  
Кодкө шыён,  
Кодкө гусьён.  
Шондi чеччө,  
Шондi пуксьө.  
Мый сэн эськө  
Туйяс помын,  
Кытчө мырдөн  
Зілям воны.

Көсья тэкөд  
Туйө петны,  
Киос ловкөд  
Тэныд сетны...

\* \* \*

Томыд — төдө,  
Олөмайд — надейтчө,  
Мый эм көнкө  
Паныдасьом-радейтчөм,  
Мый дзык ставныс  
Кодзувъясө пөрасны,  
Да дзык ставныс  
Енэж лудас төрасны.

Томыд — босьтө,  
Олөмайд — козьналө.  
Быдөн өта-мөд бөрсяяс  
Восьлалө.  
Быдөн том, но абу быдөн  
Олөма.  
А кодкө весиг  
Чужлынысө полөма...

\* \* \*

Шондыс эськө тай лөсьыд —  
Вой төлыс вывті тай яр.  
Гожөмыс некыт оз пөсьөд,  
Косьмө да пузьөдчө пар.

Кымынысь дум вылө усьлө  
Сійө, мый некор эз вөв:  
Кыдзи ми окасим гусьён,  
И гусьөник омляліс чөв...

\* \* \*

Тэкөд аддзысьомөдз колис өти вой,  
Өти медся кузь да пемыд войыс.  
Асьядорыс нюмъялөмөн воан,  
Шуан: татчө чеччөдiс пö Ной.

А ме тэнö первойсö ог тöд,  
Чайта, коли керка öдзöс восьсөн.  
Кагаöс моз ки вылад сэк босьтан,  
Нуан сэтчö, кыаыс көн гөрд...

\* \* \*

Эскысьяслы вичмас югыд рай,  
Эскытöмъяслы...  
Тшöтш мыйкö вичмас.  
Кутшöм талун енэжыс со мича,  
Мичаджык на, көнкö,  
Енэж сай.

Тэнö век на радейтны ог куж,  
Век на сöмын велöдча.  
Но коркö.  
Кольчча югыд сьöлöмаөн гортад,  
Кыдзи пувйö кольччö  
юмов пуж...

\* \* \*

Кильчö вылын зэрыс йöктö степ,  
Ыджыд мамыс велöдлöма коркö.  
Кушмис менам зарни тыра зеп,  
Та вöсна и ог лысьт пырны гортö.

Чеччалöмсьыс ичöt зэрлы жар,  
Пöсьыс менам морöс костöд киссьö.  
Чолöм, Пушкин! Чолöм шуда ар!  
Бара на ме кывбуръясөн вися!..

\* \* \*

Шыыс тетрадь лэчкö шедас,  
Артмас кыв.  
Кывлысь вом дор нюлас-летас,  
ув да выв.  
Сэсся бордъяммыштöм кылыс  
лэбзяс скöнь,  
Кöни öнөдз сöмын кылис  
лөнъ...

\* \* \*

Тэкөд дзыкөдз  
мöд пöлöс

---

Серыс и көрыс...  
Ләбала өтпөлөс  
Турөба төлас.

Веськыда лы пырыс  
Вемөдз тэ йиджин,  
Кывъястөм кывбурөс  
Тэкөд мед гижии...

\* \* \*

Ловъя! Ловъя! Ловъя!  
Кылад?! Кылад?! Кылад?!  
Тәнө, менам шылад,  
Пернакөд тшөтш новла!

Кывъясыд оз ковны —  
Наын горыс векнъыд.  
Овны! Овны! Овны!  
Тэон! Тэкөд! Тэныд!..

\* \* \*

Менам небыд асъя унмө  
коркө волы:  
Аддзылан, кыз шондi бөрийө  
аслыс рөмсө,  
Кызди пөлялөмөн  
гораммөдө чөвсө,  
Кызди кулөм бөрад  
козыналө выль олөм...

\* \* \*

Туриясөн гуран вомөн  
Шлюп да шляп...  
Чужан муө тулыс воө,  
Ой-ой, тшап:  
Восьса морөса, куш юра,  
Он и төд...  
Кымын тэөдз коли гуран,  
Кымын гөп?..

❖ ❖ ❖

## «Подув пуктысьяс»: редакциясянь ВОДЗКЫВ ПЫДДИ


Таво 150 во пасйö Косланса шөр школа. Туйыс сълөн заводитчö 1869 воын церковно-приходскöй школа восьбöмсянь. Уна бурыс тайö каднас вöли, уна конкурсын вермылісны кослансаяс, уна выльторйö босьтчылісны медводдзаён. Öти татшöм водзмöстчöмөн лои 1957 воын «Малая Удорская МТС» восьтöм. Тайö интереснöй, шензöдана удж йывсьыс и гижис нейджыд повесът Юрий Константинович Васютов, либö, кызди ачыс авторыс пасйö, вöвлöмтор йылысь висът. Дерт жö, тайö художественнöй гижöд, и авторыслөн водзкывъяс тыр-бура восьтöма, кызди чужис гижöдыс да мый вылö мыджсьöмөн лöсьöдöма сйöс. Юрий Константинович пöшти эштöдöма повесътсö, но дзик помöдз вайöдны век жö абу удитöма. Рукописъяс вылас уджаліс Михаил пиыс. Сйö и пыртіс гижöдсö редакцияö.

Нэм джынйысь унджык кад визувтіс, олöмыс ёна вежсис. Сы понда восьтыштам öнйя лыддысьысьлы сйö кадся гөгөрвотöм кывъяссö. МТС — машинно-тракторнöй станция. Найöс котыртлісны колхозъяслы техникаөн отсалöм могысь. Колхозъяслөн эз вöv сьöм ньöбны техникасö, сы понда, мый найö эз вöвны государственнöйөн. Техникасö найö көртымавлісны МТС-ысь, либö ачыс МТС вöчис колхозъяслы удж (шуам, гөрис, вундіс нянь), а колхозъяс таысь мынтысьлісны. Кольöм нэмся ветымынöд вояс помын войнаөн жугöдöм экономика бөр ловзьыштіс, и МТС-ъяс бырöдісны. Техникасö вузалісны либö сетісны колхозъяслы да совхозъяслы. МТС пыдди колісны ремонтно-техническöй станцияяс, на подув вылын чужис «Сельхозтехника», коді отсасис видз-му овмöслы быдсяма машинанас. Нöшта гөгөрвотöмторйөн лö сэкся судлөн уджыс. Öнйя суддяясöс индöны, и суддяыс öти. Повесътын индöм кадö народнöй судö бөрйісны народнöй суддяясöс да заседательясöс. Сідз кымын жö, кызди öнйя бөрйöны депутатъясöс, урчитöм кад вылö жö. Тайö, сідз шусяна, суд первой инстанции. Нöшта колö восьтыны номенклатура кывлысь вежөртассö. Тайö сöветскöй партийнöй кадся аслысьяма «кадрöвöй резерв». Номенклатураö пырöм йöзöс бөрйіс коммунистическöй партия. Найöс сэсья быть коліс индыны веськөдлысьясö.

Повесътыс артмöма сйö кадся олöмыс кодь кыпыдөн да шензöданаөн, лыддян сйöс ордчывтөг. Торъя «көр» сетö и удораса сёрни тöдчöдöм. А ми вöзъям казтыштны Юрий Константиновичöс да аттёолам Михаил писö рукописъяссö йöзöдан выйöдз вайöдöмысь.

*Редакция нимсянь, Алексей Полутрудов.*

Юрий ВАСЮТОВ



## Подув пуктысьяс

ВӨВЛӨМТОР ЙЫЛЫСЬ ВИСЬТ

### Водзкыв пидди авторсянь

*Тайö вöвлөмторсö ме гижи 1984—1985 воясö на. Ыззьöгис та вылö ачыс гижöдлөн шөр геройыс, педагогика наукаясса доктор Э.А.Гришин. Уна во мысьт усьöма дум вылас томлуныс, кодыр Кослан школаын водзмöстчöмыс лои сылы погулөн быдмыны ыджыг учёнйöдз. Ас кагö сийö гижис казътылöм, но сылысь пасйöдгьяссö таöдз эз ло йöзöдöма.*

*Ме висьтала сылы зэв ыджыг аттьö сыысь, мый сетис позян-лун пöльзуйтчыны аслас пасйöдгьясөн, да ассянь чайта, мый медея зумыд погулыс сöвмис сэки сы могысь, мея Косланса школаыс петисны олöмö кужысь киподтуя том йöз.*

*Неважөн лыгди газетысь, мый Косланса школаöс 1997 велöдчан воысь шуöма «Волөн школаөн», и тайö нимыс юргö став Россия пасьтала. А öд тайö нимöдзыс школа восьлалис уна во, и уна вежсьöм нин лоис сэни 1942 восянь, кор сылы сетисны «шөр школа» ним.*

*Тöдчана тшупöдгьясысь öтиөн вöли и сийö кадыс, кор школаөн веськöдліс Э.А.Гришин. Ме сийöс зэв бура тöдлі. Сийö велöдліс менö рытья школаын. А ме весиг отсышти на сылы гижны да йöзöдны «Малая» Угорская МТС» брошюра. Тайö вöли 1958 воын.*

*Колис нелямын во. И талун Косланса школа пöртö олöмö сы водзын сулалысь могьяссö. И пöртö оз омöля. Сидзкö, погулыс крепыг. Тайö и ышöдгис менö вайöдны гижöдсö йöзöдан выйöдз.*

*Гижöдын «ичöt» МТС котыртысьяслысь нимьяссö зэв этишаника вежлалöма, но сэк жö тайö абу гзык казътылöм, а художествоа гижöд. Кытикö мыйкö вежöма, чинтöма, согтöма, öтлаöдöма, лосьöдöма, кыдзи корö гижан жанрыс, мея эськö гижöдыс лоис лыгдянаджык.*

*Сы вöсна и чайта, мый лыгдянаөн лоö оз сöмын налы, когьяс йылысь гижöма, но и налы, когьяс кöсийны тöдны талунья пенсионерьясысь тöрытья лунсö.*

---

Когкө аггзас кө асьсө либө ассьыс төгсаос авторөн омөля петкөдломөн — сідз, кыззи оз вермы лоны сы думысь, мег эськө оз зэвт кабырсө да оз ысты авторос повзёоглана гижөдъяс. Тагзисө вермис өг лоны и сылөн ёрткөд, а автор уна во мысти вермис аггзыны отилысь морос-чужомсө, а мөдлысь сомьын мыгөрсө да төдлытөг отлаавны найос.

А Кослан гөгөрсә видзьясысь оти и талун на шусьё «Школа Вомынөн», да сәні быд гожом техника отсөгөн и ки помысь ытшикөны турун төв кезлө заптом могысь Кослан школаса велөдчысьяс.

## Автомашина гусялысьяс

Эз на удит Эдуард Александрович пуксыны уджалан пызан сайө, кыззи триньобтис телефон.

— Да, кывза.

— Омөля кывзан, директор ёрт,— Гришин төдис раймилияса начальник капитан Осиповлысь дзуртысь да век быттьө крукаломөн сёрнитысь гөлөссө.— Вывтi омөля кывзысян, Гришин,— нөшта на содтис Анатолий Иванович да чөв усис.

Гришин төдис, мый Анатолий Иванович көть и милицияса начальник, но эз вөв дөзмысьяс лыдысь. Позьё весиг шуны, шань мортөн вөли милицияса капитан, весиг шмонитысьөн. Да, колөкө на, и неуна асөн. Оти сиктын өд олөны, весиг орчча керкаясын, собраниеяс вылын орччөн пукавлөны, тшөтш и праздник пызан сайын. А дзик на неважөн найө да нөшта оти милиционер кайлисны вөрсә Йиридз ю йывлань сьөлаяс бөрсә вөтлысьны. Лунтыр шөйтисны да кушөн и лэччыны пондिसны ю пөлөныс сук кыддза раскөдыс. Но и раскыс быттьө кулөма, ньөти сьөла оз жбыркнит.

Виччысьтөг пу йывьяс костөд кыськө варыш туюкнитис-уйыштис. Анатолий Иванович быттьө төдис водзвыв, тэрыба чургөдис пищальсө, көзнитис-луйис — варышөд и пластасис му вылө. Ылынкодь өд и лэбө вөли. Ёртьяс ошкөны бура луйысьсөс и пищальсө тшөтш. Некод эз чайт, а Осипов босьтис чергөдөм варышсө да дзумгис-суйис пельпомсайса ноппө.

— Варышсө өд он жө босьт?— чуймис сәки Гришин.

— Лөсялас кытчөкө,— мыччылис нюмпощсө Осипов.— Гашкө на, и шыд пуа.

— Позьё эськө чучела вөчны да.

— Позьё и чучела.

Шмонитиг да серам пычкигтыр гортөдз и воөдчисны. Аскинас, рытланьыс матөджык, Анатолий Иванович и звөнитө:

— Пырав, шахматөн вензьяштам.

Рытнас пырис Эдуард Александрович Осиповьясө, а сәні гөсьтъяс: лейтенант, кодкөд кайлисны вөрө, гөгырыскөд, да нөшта оти гозья.

— Прөстит, другө, пөръялөм лоис да: кори шахматөн ворсны, а со кызд артмис... Көсья мыжкөс вештыны: нуөди вөрө, а вайөди кушөн. Котырнад ветлиг, тыдалө, оз везит. Талун асывнас шоньгейтөг\* чеччи да кайли сэтчө жө. Сьөлаыс сымда — пищаль

---

\* Шоньгей (диал.) — шонди.

дуло помад коть пуксясны. Гоз съола и лэччөдi. Таво кезлө, мися, свежөйыс воманыд эз жө на волы, гашкө да. А сы вöсна, мый менам дона гөтыр воис курортысь, абу грек и румка-мөдөн пөрөдны. Кыдзи тэ эськө? Галина гөтырыд — абу пила?

Кытчө воштысян: гобөн петкөдчин — пестерө и дзумгысь. Шахматөн вензьөмтө ковмис эновтлыны бурджык кад кезлө, медым талун выль кыйдөсөн чөсмасьны. Зэв азыма быдөн и сөйис таво вылө медводдза свежөй пөткаа яя шыд. А сэссия и асьсө, чиг еджыд яйсө. Мутшкөны-сөйөны, йирөны-вильдөны лы, ошкөны көзьяинөс: мудер пө да сюсь, төдө, кытөн оло съолаыс, а миянөс пө теш пыдди мөдлаө нуөдлiс.

— Но кыдзи, чөскыд?— вашъялө Анатолий Иванович яй бырөм бөрын.

— Тавося съолаыд кольөм во серти чөскыдджык да-й, чайта, ыджыдджык на,— көсийс шмоньөн помавны Гришин, но регыд шмоньыс өшйис пызан весьтө.

— А тi өд эн съола, а варыш яй сөйинныд,— гир-гир серөктiс Анатолий Иванович аслас дзуртысь дзиръя өдзөс кодь кирган гөлөснас да төдчөдөм пыдди содтiс:— Төрытъя варышсө...

Эз на удит помавны, а лейтенант да сылөн гөтырыс уськөдчисны көтшаслань, кытөн ошалiс мыссиян доз, да юр юрө суйсисны таз весьтө: вукъявны пондiсны, съолаьсны да пöлясьны. Гришин пукалө чуймөмөн да оз төд, мый вөчны. Зывөк сылы эз ло. Сийө карса морт. Оз весиг төд, позьө, оз-ө сөйны варыш яй. Удораса мортлы ай-мамыс и пöля-пöчаыс ичөтсянь суйөны юрас, мый оз позь кыйны ни сөйны рака-катшаөс, варышөс, кутшөс, туриөс, юсьөс да нөшта кутшөмкө звер-пөткаөс либө төдтөм быдмөг, и сийө некор оз кут кыйны-луйны да өктыны-вотны найөс и, дерт жө, сөйны. И весиг кодкө сөйө кө сэтшөмторсө, вермө сийөс вукйөдлыны, кыдзи понтшакысь. Кор тэ төдан, мый тайө сөс, вомад оз пыр. А төдтөмөн кө пырис, да төдмалан, бөр петны вөзйысяс.

Осипов өд и ачыс сөйис, и йөзөс вердiс сөмын шмонитөм мөгысь. Со кутшөм вөли раймилицияса начальник.

А өнi, телефон проводлөн мөд помын, төдчис, мый милицияса начальник абу шмоньлив руа. Кылыс сылөн өнi, коть и киргыштө, но быттө напилөкөн зыртө.

— Уголовной делө ковмас панны, другө. Автомобиль тай гусялөмыд, дона Эдуард Александрович, том йөзөс велөдысь да зэлөдысь...— Осипов мытшкерис. Тыдалө, виччысис, кыдзи эськө кутас асьсө дорйыны школаса директор. Но мөдыс чөв олис, сөмын нускис нырнас мыжа зонка моз, кодөс сувтөдiсны школаса директор водзө.— Мый нө, он и көсий дорйыны асьсыд...— Осипов дыр корсис, мыйөн нимтыны сы водзын пукалысь куим зонкаөс, көкъямысөд класса велөдчысьясөс, кодъяс пышйөдөмаөсь райполөн склад йөрысь дзонь грузөвөй автомашина да дзөбөмаөсь школалөн сарайө, но сэссия аддзис жө юристылы лөсялана кыв да содтiс:— пөдельникъястө?— но и татчө эз вермы виччысьны вочакыв, пöльыштiс трубкаас да помалiс:— Мед өти кокыд — сэн, мөдыд — тан.

Эдуард Александрович гыжйыштiс юр пыдөссө шуйга кинас, а веськыд кийс, быттө сэнi вөли эз телефон, а пудъя гира, шлопкысис аппарат вылө. Дерт, директор төдiс лөөмтор йылысь,

кыдзи эз. Эз коть веськыда, но эз мөй ачыс ыззьод зонъясөс тайо мыж вылас? Но вөлі нин сёр, кор та йылысь тодмаліс. Коть мый эн воч, а лоис нин гусялөма. Мыж эм. Но колө вочны сідз, мед эськө гусялөмыс эз ло. И мыжыс мед эськө эз коль. А кыдзи тайос вочны? Со и мөвпав. Тэ — директор, сідзкө, став тайо катавасиясө котыртысьяс — тэ.

Гришин тодмаліс автомашина гусялөм йылысь вой шөрөдз на. Милициясянь звөнокөдз вөлі на дас час мында, войся-асья кад. Кывлөм-аддзылөм бөрас пыр жө звөнитіс райисполкомса юралысьлы гортас... Сэсся райпоон веськөдлысьлы, кодлөн складысь лои петкөдөма автомашинасө, садьмөдіс да чеччөдіс небыд вольпасысь МТС-са директорөс, коды вөлі урчитөма вузавны сійөс. Кутшөмкө пружина, тыдалө, эз зэлав, эз вермы дзедны лоөмторсө, кытікө эз сідз воч том директор: милицияөдз воис лөк юөрыс, эрдө петіс мыжыс...

А милиция — милиция и эм. Сійө тэныд матысса ёрт сөмын сэтчөдз, кытчөдз он вудж законөн индөм пас...

Эз, эз тадзи чайт босьтчыны веськөдлыны школаөн том педагог...

Кор сійөс, история велөдысьөс, корисны районса юралысьлөн кабинетө да корисны босьтчыны юрнуөдны школаөн, сійө весиг чуймыліс. Коймөд во на сөмын и велөдө. Классрук кындзи некутшөм юрнуөдан опыт абу. И друг — директорөн? Районса медыджыд школаын? Кытөн велөдчысьяс, позьө шуны, медся кывзысьтөмөсь? Районлөн юрсикт, коть и абу кар, деревнянад шуны кывйыд оз жө лыб. Служакыс кантораясын — рок пумөн, ставлөн челядь эм...

Вөлі 1955 во. Страна кусыс петтөдз зілис кыпөдны-сөвмөдны Ыджыд войнаөн жуглөм овмөс, торъя нин видз-му. Войналысь колясьяссө эз на шед бырөдны, коть восьлаліс нин войнабөрся дасөд во. Войвыв Коми му вылын видз-му овмөс сөвмөдөмкөд тшөтш паськаліс да вужъясис из шом, мусир, биару перйөм, вөр пөрөдөм. Быдмисны выль посёлокъяс, каръяс. Дзикөдз гольмыны пондөм сиктъяс кутісны воштыны и медбөръя вынъяссө — йывмөм ыбъяс вывсянь том йөз исковтисны няня посёлокъясө, шыдөса каръясө. А сійө жө кадас сиктъяслысь лөнь рытъяссө шызьөдіс сэтчө воысь трактор-машина.

Удораын тайо лоис дзик на выльтор. Войнаөдз өти трактор «Универсал» да кык автомашина вөлі сөмын Косланын. Но налөн эз ло «көзяин», да нель во чөжөн, война мунігкості, сиктса зонпосни разялісны найөс быд винт-болтөдз...

Воалісны тракторъяс, а найөс уджөдны велөдны и зонмыс эз тырмы: кодөс позис, нуисны ФЗО-ясө, ремесленнөй училищеясө, көрт туй да ва туй вылын ветлан машинаяс велөданінъясө. Кутісны велөдны нывъясөс. Но 40 да 50 градуса көдзыд төвъяс вөсна, кор чегласис весиг көрт, унджык нылыс энөвтчис механизатор профессия босьтөмысь. Шөр школа помалысьяс эз көсйыны кольччыны сиктө — нывъяс ни зонъяс. Школаын велөдчөм эз йитчы олөмыскөд. Коть и воаліс школаясө выль вын зонпосни лыдысь, унджыкыс на видзөдіс школа вылө, кыдзи сиктса ыбъясысь карса патераясө чеччыштөм вылө тшупөдөн — трамплин пыдди.

Велөдысьяс өта-мөдлы вежмөн да яндысьтөг повзьөдлісны

омоляджык велодчысьясос, мый нэм кежлө колясны няйт лойны да куйодын келавны, оз кө сямө босьтчыны. Ас пай пуктисны и мамгяс, кодгяслы усис «шуд» воськовтны сиктса быдпөлос сьокыдун вомон. Карө нуодысь туйвежлань зилисны синны и батыяс, кодгяслы салдат зыр помысь судзсис эз этша му перйыны окопгяс кодйигон. Дерт жө, быдөн көсйис ас ныв-пияныслы аския кокнилун. Та могысь быд пельосын ошалысь плакатыясянь том вежөрө эскөдана пырөдчис мөвп локтысь-матөдчысь коммунизм йылысь, коді быть вылө воас аски, и олөмыс сэки лоас дивгя: личкы кнопка, и мойдын моз вомад ачыс кисяс колач и кампет...

Буретш татшөм кадө Кослан школаса директорлөн улөс вылө пуксис том учитель-историк Эдуард Александрович Гришин, Сыктывкар дорын быдмөм зон. Пуксыны — пуксис. А мыйсянь босьтчыны? Районөн веськөдлысьяс индिसны: колө мыйкө вөчны, мед вужвийон бергөдны школалысь велөдан визь, кызди неважөн шуис та йылысь КПСС-лөн XX съезд. Колө дасыгыны выль йөзөс, мед кутасны лөсявны выль олөмлы. Юр висьмытөдз мөвпаліс: кызди тэ бергөдан торгья школалысь велөданногсө, кор, ой, кутшөм вылісянь лэдзөм став индөдгясыс тэныд паныд. Абу өд паськөм, мед позис отпырысь вежны и йөзсө, и велөданногсө. Юрын гартчис дзик өти юалөм: кызди? да кызди?

Кор аслас дзугсысь мөвггясөн том директор юксис школаса партийной организацияон веськөдлысь Борис Афанасьевичкөд, мөдыс зумыштчис, дыркодь чөв оліс. Уна ордена да медала фронтөвик, коді и фронт вылас мунліс олөма нин мортон, бура гөгөрвоис томджык ёртыслысь сьөлөм пессьөмсө.

— Ас нэмөн ме уна директор пыр муні,— вочавидзис парторг.— И со мый дивө — пөшти ставон босьтчылісны уджө отмоса: бөрийсны аслыныс выль кабинет, лөсьөдісны сэтчө выль мебель, ковөргяс да корсисны бурджык оланін аслас семьялы. Та вылын и помасьліс налөн водзмөстчөмыс, дона коллега. Тэ — морт том на. И ме эськө көсйи, мед эн сөмын сэсянь босьтчы... Но и нинөмсянь отпырысьөн мед эськө эн босьтчы. Да, да, эн эськө босьтчы. Видзөдлы гөгөрбок, йөзсө ставнас төдмав быд боксянь. А сэн и ачыд аддзан, мый колө вөчны. Кызд шуласны: сизимысь муртав — отикысь вунды.

«Со и отсаліс»,— шогө усис Эдуард Александрович. Но, жуглыштіс юрсө нөшта да, кутіс вөчны сідз, кызди тшөктіс олөма морт. Воліс урокгяс вылө, урокгяс бөрын — кружокгясө пыравліс, бать-мамлөн классгясса чукөртчөмгясын пукавліс. Кывзис велөдысьөс, завхозөс, идрасьысьөс, велөдчысьөс и сылысь бать-мамсө, эз отдортчы районса уна сикас мероприятиеысь, быдсяма собраниеысь. И быдлаын йөзсө шензөдліс школаса выль директорлөн чөвлуныс да рамлуныс: некөн сійө эз велөд некодөс, эз кучкав аслыс морөсас да көсйысь, эз дзайгы-кор, эз вөч ставлы тыдалана анализ да весиг эз гиж лөсялана приказгяс...

«Оз кыскы»,— вашкөдчисны школаын. А завуч Анна Михайловна кызкө веськыда шуис:

— Эдуард Александрович, тэ — директор, абу Минпросысь инспектор. Тэсянь виччысьөны колана стрөг индөдгяс.

— Кута төд вылын, Анна Михайловна,— нюмгөвтис том ди-

ректор. Сійö аддзис нин, мый велöдысь котырыс школаын абу жеб, татшöм йöзкöд позьö и вöчны мыйкö. Унджык велöдысьыс ыджыд опыта и оз öтдортчы уджысь. Ачыс Анна Михайловна кöть и тыдовтчö би кодьöн (эн тшукöдчы — ачыд сотчан), но кужö и асьсö видзны да кутны велöдысьяс и велöдчысьяс водзын, быдöнкöд аддзö аслыс туяна сёрни. Сыысь полöны. Эмось, дерт, и жебджыкось, но кöни найö абуось? И сьöкыд вöли гөгөрвоны, кодi кыдзи босьтас сьölöмас сылысь, виль директорлысь, кывъяссö, мөвпъяссö.

Эдуард Александрович казялис, мый ставкöд на важ ног асьсö кутö вöвлöм директорыс, Михаил Николаевич, висысь, жеб морöса фронтöвик, кодi кöть и энөвтчис юралöмысь, но кольчис школаö велöдысьöн аслас предметъяс кузя. Позьö шуны, тölка да шань морт тайö Михаил Николаевичыс и бур веськöддысьöн вöли: некодöс некор эз вид, став дорö аддзис сибалан туй, сьölöмöдз пырны колана ключ. А велöдчысьяс сы водзын пöрчисны шапка медся кöдзыдъяс дырйи. Велöдысьяс важ моз юасьöны сылысь, а оз талунъя директорлысь...

Лун ветымын коли сійö кадсянныс, кор Гришин лоис директорöн. И со, восьса ыджыд педсöвет вылын сёрнитö директор. Сылöн — доклад. Кывзöны педагогъяс асьыныс виль директорöс и оз гөгөрвоны, мый кöсийö сійö школаын бурмöдны: «успеваемость» али «посещаемость»? Тайö юалöмыс сулалис школа водзын, тыдалö, сэксянь, кор чужис *школа* нимыс. Посещаемостьöн лыдпасыс школаын некор эз лыблы көкъямысдас прöчентысь вылöджык.

Велöдчысьяс, торйöн нин зонъяс — парма пиян: то көч кыйны пышйöмаось, то байдöг, а то — ичöтджык арлыдаыс — кальсы либö пунöй\*. А сэсся öд и абу жö карын школаыс. Ыб вылö куйöд петкöдавны öти муно мамыс пыдди, мöдлы вöрысь пес петкöдны доддя вöв сетöма колхоз буретш сійö лунö — некыдз он пыксы. А сэн кодкö висьмöма, кодкö дышмöма... Тадзикöн велöдчöм дырйи «успеваемость» — кöть быд классысь гоз-мöдöс быд воö мöд во кезлö коль. Но бөръя кадö таысь топöдисны вывсянь: «второгодник миян абу!» Журналö он пукты «два», а шуам, Володя Романько бурджыка кутас тöдны физика либö роч кывлысь правилöяс?

Тадзи кымын мөвпалисны велöдысьяс докладчикöс кывзигöн. А сійö пыр мыйкö висьталö и висьталö. Дыр и сёрнитис, быттö домöд йылысь мынлис, а шöр мөвпыс вöли татшöм: «Сетам кө ми велöдчысьяслы быд предметысь бур тöдöмлунъяс — тайö бур. Тайöс миянлысь некод некор оз мырдды. А кодi кутас велöдны найöс овны-уджавны? Война водзвылын чужöм да война дырйи быдмöм, а кодыркö и батытöг олысь дзоля войтырсö? Кодi кутас тöждысьны сиктлөн аския лун вöсна? Кодi öни олö да уджалö колхозын? Пöль-пöч да зонпосни, да висьлöс бать-мам. А кöни тöдысь том йöзыс? Кымын ныв-зон кольчис сиктö шöр школа помалöм бöрын?»

Юасис и юасис директор, а сэсся татшöм кывкөртöдъяс вöчис: «Школа колö бергöдны юр вывсьыс кок вылас. Дзик виль подувъяс вылын колö котырtnы велöдан-быдтан удж. Сиктса

\* Пунöй (диал.) — еджыд лэбач, медводз воö лунвылысь.

школа колö вöчны *уджавны велöдан школаөн, быдлунся уджалан школаөн*. Талунгя «сезонной» удж велöдан педагогика оз вермы тайос вöчны. А велöдчысьяслön гожся бригадаяс турун заптöны сöмын ки помысь. Тадзи уджавны кöсийсыс пыр чинö и чинö... Колö мыйöнкö выльторйөн кышны эрдсö и тыртны пытшкөссö мян уджлысь. Вöчны сэтшöмтор, мед ас бöрсяным кыскыны ставсö: велöдысьöс и велöдчысьöс».

— Менам чужис мөвп,— водзö висьталис Эдуард Александрович,— котыртны школа бердын «Ичöt МТС». Ме сёрнити нин машинно-тракторной станцияса директор Гирляндинкöд, сийö кöсийсис отсавны техникаөн. Колö босьтчыны велöдны нывзонмös тайö техникасö гөгөрвоны.

— Сы вылö эмöсь торгя курсяс,— чорыд вочакылөн кывлысис Анна Михайловна да пыр жö аддзис аслыс отсасысьöс. Выльтор пыртысь докладчиклы тайö нин топыдджык оппонент — вöвлöм директор Михаил Николаевич:

— Школалөн мог — сетны велöдчысьяслы тöдöмлунгяслысь подув. Подув! Код вылын сулалö наука да техника!— ачыс на и вöййылис Гришинлы ас улöс вылас пуксьыны, но со — сувтис паныд, эз гөгөрво томджык ёртсö.— Ти шыбельö исковтанныд, коллега... Босьтанныд ас выланыд вöвлытöм сьöкыд ноп и та дорö содтöд — сыысь на сьöкыд кывкутöм.

— А ме эськö паныд эг мун,— шыödчис Владилен Васильевич, кодлы эз на вöв комын арöсыс, а ас нэмөн велöдлис и немеч, и роч, и коми кыв. Гөтыртöм, ас семьятöм, сийö пöшти став олөмсö сетис школалы.— Паныд жö сувтисны öти-мöд, кор ми кружокö котыртчöмөн кутим лэдзны ки помысь «Удораса пионер» журнал. Гижны пö и серпасавны аслым ковмас, öтнамлы... А со, ачым ог и тöдлы, кыз петö журналлөн выль номер. Челядьлысь гижöдгьяссö районса газет йöзöдö, и весиг республикаса «Войвыв кодзув» журнал. А литкружокö волысьяс тшötш и математикаысь двойкаяс бырöдисны...

— Но тайö öд отсалö велöдöмлы...— панöм могысь кывлысис Августа Васильевна, начальной классгьясын велöдысь.— Литкружокгьяс вöлины и Пушкин дырйи на...

— А ми Крюков дырйи на лöсьöдам школаын «Ичöt МТС»,— шомös моз ловзис докладчикөн ышöдöм Юрий Иванович, физкультура велöдысь, коллективын медся шмонитысь морт. Быдөн тöдис, мый Владилен Васильевич Крюков ачыс тэчалö кывбургяс, и та вöсна сылы серамсорөн сирасис «мян Пушкин» ним. Шуан — «Пушкин», юр вемö пырö — «Крюков».

Гажöдис öткымынös Юрий Ивановичлөн шмоньыс: гидз-гидз серöктöм кылыштис ссянь, көн пукалисны томджыкгьяс. Сэки сувтис Василий Фёдорович, военрук, вöвлöм боевой командир — португепяөн зэвтöм гимнастёркаа:

— И нинöм серавны,— лөньюдис сийö гажмöм нывгьясös.— Ставсö пуктам военной дисциплина подув вылö. Ме — сöглас.

— А ме — абу!— чеччис кокйыв и Анна Михайловна. Педагоггяс, дерт жö, вöли чукöртчöмаöсь директорлөн кабинетö. Завучлөн пызаныс вöли тани жö, и найö пукавлисны паныдөн, кор уджавлисны пызан сайын, да сёрнитны вермисны öта-мöдыскöд юрнысö лэптывтөг. Но öни директорлөн пызан сайын пукалис

педсоветсö нуöдысь Борис Афанасьевич, а директор сулаліс завучлөн пызан дорын, да Анна Михайловна эз аддзы сылысь чужомсö. Завучлы кажитчис, мый сыысь унаөн томджык выль директор сералö сы вылын. Тэрыба чеччис пызан сайысь да чепöсйис Михаил Николаевичлань, тöрыгыя директорлань. Томи-ник биолог Елизавета Ивановна, коді пукаліс МихНиккöд (тадзи школаас шуисны) орччөн, звирк чеччис улöс вывсьыс, мед завуч вермис пуксьыны. Анна Михайловна кыв шутөг шлапкысис да копыртчис МихНик пель дорö, мыйкö вашкöдіс. «Да, да»,— довкнитіс юрнас вöвлөм директор да нормөм синмөн кызкö жаляддза тьöвгис-видзöдіс Гришин вылö. Сійö гөгөрвоис, мый пансьö тыш, и мөвпыштис ас кежсьыс: «Мед эськö гөлөсöй эз горав, мед эськö дöзмытöдз эг во».

Елизавета Ивановна, суютса коли да, оз тöд, мый и вöчны. Сылы сёрнитөм вылö кыв эз вöв сетöма, но виччысьтөг шыасис:

— А меным мыйлакö сьölөм вылö воис Эдуард Александровичлөн колхоз вылö видзöдласыс...— мурталіс синнас сы вылö видзöдысьяссö, аддзис, мый сійöс оз пуксьöдны, да водзö сёрнитіс:— Ми ичөтдырйи и йөн весалім кöдза му вылысь, и шеп öктім нянь вундөм бöрын, и агасим, и капустаөн ноксим, и вой-колөн вöвъясöс видзим йирсянінын...

— И куйöд весалінныд...— пинь пырыс сöдзтіс Анна Михайловна.

— И куйöд весалім!— быттö эз казаяв завучлысь крука сёрнисö, китшкөмсö, да эз и лапнитлы синнас, нуöдіс водзö том биолог:— И му вылö куйöд петкöдалім, и кукань дöзьöритім...

— Регыд и тятей\* дöзьöритны ковмас,— эз кöсйы сетчыны завуч да кывнас печлаліс том нылöс. Но биолог абу кöч рöдысь вөлöма.

— Анна Михайловна чайтö, мый тані сійö öтнас нывбабаыс, а мукöдыс — гермафродитгьяс...

Сёрни вермис кежны аслас визьсьыс, и Борис Афанасьевич, кодлы талун вöлі сетöма киас власьтсö, пальöдіс ставнысö: лыддис резолюция директорлысь идеясö дорйөм йылысь, кöть и вöлі сэнні тöдчана «но». Гызьөм вöсна эз быдөн гөгөрво, мыйын дзугйыс, да öтсöгласөн лэптисны кинысö «за».

Кыкөн кольөм бöрын Борис Афанасьевич кутыштис Гришинöс киöдыс:

— Педагоггьяслөн сөвет ошкис тэнсьыд педагогика нуöдан выль визьтö. Сідзкö, эм подув, сідзкö, уджав,— ышöдны ышöдіс, да сэнні жö öлөдіс:— Но эн вунöд: коллектив вермас суетны и паныд... Он кö, дерт, кут мыджсьыны сы вылö.

— Аттьö, Борис Афанасьевич!— мый сэсся татчö шуан.

— Эн меным аттьöсö шу, налы,— Борис Афанасьевич довкнитіс юрнас öдзöслань, кыті петісны сөвет кутысьяс.— Но он кö куж найöс додьявны аслад доддьö, найö и мегыр пырыс пондасны видзöдны бөрлань.

Мудер педагог Борис Афанасьевичыс. Гашкö, сы вöсна и парторгөн век бөрйисны сійöс велöдысьяс. Сылань жö мыйлакö сетчис и Гришин, а эз воддза директорлань. Сысянь виччысис аслыс öтсөг. А сэсся öд парторг эм парторг. Сійö кö суетас па-

\* Тятей (диал.) — кага.

нды, нинөм оз артмы, көть тэ мед кык юра вөлін, көть куим синма. Став странаөн юрнуөдө партия. И сылөн индөдъяслөн вугйыс парторгъяс кыын, первичнөй организацияясса секретаръяс кыын, көть кутшөм на пөвстө йөз эз веськавлы. Кодыркө сөмын вом сертиыс донъялөны мортсө. Кужө көсйысыны да морөсас кучкаломөн ошйысыны — сідзкө, сійө и морт, сэтшөмыс и веськалас райкомса веськөдлысыя син улө, сійөс и вөзъясны коллективлы.

Борис Афанасьевич мөдджык: мөдарө — этша сөрнитіс. Но сылөн вөлі медся уна орден да медаль. Сы мында, шуліс ачыс, кымын пуля да осколок розьөдіс ку-яйөс. Тайө «розьясыс» вөсна и жебиник вөлі, ньөжмыд. Но ачыс Удораса, вөр-ватөг овны эз куж. Сөмын школаө ветліс пищальтөг. А өтчыд география урок нуөдіг, буретш Коми му йылысь сөрни шөрын, өшинь пыр видзөдө: вольк ю шөрас шывк пуксис тюксея\* кельөб.

Тайө чим съөд чөжыс тулысын сэтшөм гөса, мый оз на быдөны мөзды сылөн яйыс, но сэк жө арсяыс — зэв бур пөтөс. Тюксея лэбигөн гажакодь овлө Удораса юяс да тыяс вылын. Сі-йө абу өна полысь чөж, да овлө, мый ю дорсянь кыйдөссө вөралысыяс ноп тырөн катывлөны гортаныс. Аддзис Борис Афанасьевич тюксея кельөбтө да и юалө өти велөдчысылысь, кодлөн керкаыс вөлі ю дорсянь матын:

— Митя, тэнад гортад кымын пищаль?

— Кык,— гөгөрвотөг, мыйла юалөны, ошйысыштіс зон.— Батълөн дай менам. А мый?

— Аддзан тюксея кельөбсө?— индіс өшиньлань, кытчө, дерт, зырөдіс став классыс.— Мед өти кокыд — гортад, мөдыд — дөрөсын\*\*. И кыкнансө босыт...

Эз на помав велөдысь тшөктөмсө, а Митя — өдзөс дорын нин.

— А ті пукалөй лөня,— стрөжитіс велөдчысыясөс.— Карта велөдөй.— Ачыс котөртіс Митя бөрся...

Татшөм вөлі Борис Афанасьевич, география велөдысь.

Лун бөрся лун каттис велөдчан во ассыс шөртсө гөгрөс тупыльө. Велөдысыяс нуөдісны урокъяс, велөдчысыяс пукалісны партаяс сайын да, коді көсйис, кывзісны. А урокъяс бөрын школаса директор пондіс ворсны зонпосникөд «техникаөн». Удораса машинно-тракторнөй станцияса директор Гирляндин и збыль кокньөдіс съөлөмсө да козьналіс школалы М-72 мотоцикл, кодлөн эз вөв моторыс да өти көлеса. Школа дөрө сувтіс и комынөд воясө лэдзлөм ГАЗ-ММ автомашина. Шуйгаладорсянь кө видзөдны, быгттьө и збыль автомашина: пуксы да газуйт. Но веськыдладорас, рамаыс кындзи, нинөм эз вөв. Нөшта на ҚД-35 трактор, но сійө сөмын нимнас шусис «гусеницаа», а гусеница-сыыс ни өти звено эз вөв. Вайөдісны мөд тракторөн, додь вылын, лэдзисны му вылө — быгттьө көрт «Черметө» сдайтисны. Со и став техникаыс.

А зонъяс и та вылө видзөдісны кыз мойдлөн збыльмөм вылө. Мый сөмын оз вөчны: вирныс и дульныс пуө, вомсыыныс киссьө — быдөн көсйө шоперөн лоны, сөмын шоперөн...

— А ме лоа механикөн,— шуис Петя Власов да сэтчөдз

\* Тюксея (диал.) — утка-чөж сикас.

\*\* Дөрөс (диал.) — ю дор, берег.

«висьмис» машинаон, мый коть узьны оз мун гортас. Весиг урокъяс костын позис адзыны сійос машина дорысь. Петялы сибдіс грамотаыс, да велодысьяс эз ёна и «личкыны» сійос машинаясон вывтїасьомысь.

— Ворсыштасны — и кодзаласны...— тадзи чайтїс эз сомын Анна Михайловна.

Но отчыд школа ошинь улын муростїс автомашина. Тайо вольї ыджыд перемена дырїи, и став школаыс, велодчысьяс борся и велодысьяс, зыродїс-ызгысис ывлао. «Черметыс» — уджало! Збыль! Машинаыс — мододчюма! Со сійо муно: метр... мод... коймод... «Ур-ра-а-а!»— разалїс равостомыс ыб весьтын.

Татшом городчюмсыс корт вов и джюмдіс. Сё кымын воськов выло выныс тырмис, а сэсся — оз кюсїи: бара кытїкю чегисжугалїс. И школа кыдзи оти морт, бара ставнас шогю усис. А шогны вольї мыйысь. «Докторъяс» кывкорталїсны: «сьолюмыс» оз туй. И абу сомын «сьолюмыс» сэтшюм. Медым тыр-бура велодны челядьос «шоперю», колю вель автомашина.

Дерт жю, таодз на Эдуард Александрович эз эскы Гирляндїлон «козинлы». Ыззьюдны челядьос — да, туяс. Но велодны... Эз отчыд сійо волы МТС-ю и леспромхозю, райисполкомю и комсомол райкомю: тшыг корысялысь моз волїс партиялон райкомюдз. И сылы сызьсисны: регыд да регыд. Та йылысь, дерт, тюдмалїсны ставон.

Витюд класса велодчысь Володя Панюков, «шоперон» лоны медся яр кюсїиысь, коть эськю «техника» дорю сїюс весиг эз матюдны, отчыд гораа тотшкюдчис, нырсю сїюмюн восьтыштїс оюзюссю да надзюник тюрюдчис директор кабинетю.

— Кутшюм могюн, Пони Панюков?— паныдалїс сїюс Эдуард Александрович аслас небыдик нюмсера вомнас. Зонмыс, дерт, ичот тушаа, но директор тюдїс, мый ёртъясыс эз сы вюсна тадзи сїюс нимтыны. Батъыс — райисполкомса председатель, районын вына морт. А тайю сюсь, писькюс, збой зонмыс — ичот Панюков, удораса ног кю — пони Панюков. Сїдз и сибдіс нимыс, быттью лемасис.

— Эдуард Александрович, вель машинаяс воюны районю...

— Тэныд нин ююртїсны?— нюм петю директорлон.

— Гашкю, миянлы сетасны отикюс?— оз сетчы нюм улю Володя.

— Сетасны. Кыдзи оз сетны. Кюсїиысисны да. Оз кю — асьным босьтам,— бара шмонитю директор...

Пони Панюковлы сэсся нинюм эз и ков: сїю тэрыба бергюдчис да йоткис оюзюссю. Эз на удит сиптыны, а сэн нин горюдїсны: «Ур-ра!» Сэні, вюлюмкю, сїюс виччысьюмаюсь нин техника вюсна тюжд кутысьяс.

Районса овмюсьяс зэв на гюльюсь вюліны техникаон, кодюс вайюдны позью вольї сомын море пыр Кардорсянь Мезень карюдз, а сэтысянь сэсся тувсовъя ытва дырїи ю кузя катюдны баржаясон чапа пароход отсөгюн. Позью и «ас кокюн», но сомын тюлын. Татшюм сьюкыдлунсю тюдюмюн директор, дерт, эз эскы, мый школалы сетасны вель автомашина. Но эз лысьт восьтыны та йылысь асьыс мювпгяссю зонъяслы. Кыдзи ню позью налон сьолюмысь эскюмсю вины? Некудз оз позь...

Кюсїюмтортю пю куим во виччысьюны. Но куим во мед виччы-

сяс директор либө кодкө мөд, коді быдмөма нин. А челядь виччысьны оз вермыны: найө өні — велөдчысьяс, а куйм во мысти код төдас, көні найө лоасны.

Валерий Курыдкашин оліс райполөн складъяс дорын матын. А пöльыс сьлөн видзис тайө складъяссө войын. Та дырйи сійө оліс шоныд будкаын складө пыранінын, дзирья өдзөс дорас. Валерий тшөкыдакодь воывліс пöльыс дорө. Тані вөлі югыд, и некод эз сорась вöчны гортса урокьяс. Весиг унмовсьліс лабич вылын пöльыслөн мойдөм улө.

Тайө рытө Валерий локтіс жө. Но эз кут ни лыддысьны, ни задачаяс решайтны. Сөмын на сиптіс ас бөрсягыс өдзөссө, дзайгыны пондіс:

— Дөдө, вай висьтав, кыдзи тэнө белөйясыд лыйлісны?— быттө тайө висьттөгыс ньөти овны оз вермы.

— Сөысь кө нин висьтавлі-а...— өтлаасьöны синкымъясыс пöльыслөн: мыйла эськө бара ковмөма гаравны вөвлөмторсө.

— Тшөктісны сочинение гижны, а ме вунөдышти. Иван пөль, но... Ме өд сэки пони на вөлі...

Кыдз нө пыксяс радейтысь пөль, кор муса внук пельтө дзүмөдө.

А босьтісны сэки сійөс, өнія Валерий кодь зонмөс, нуөдны гөрд разведчикьясөс Слөбөдаө ямщик пыдди, аслас вөлөн. Слөбөдаө вотөдз найөс быттө виччысьөмаөсь, сувтөдісны. Кор пондісны лыйсьыны, вөлыд повзис да зырөдіс скачөн водзлань. Пукалысьяс чеччалісны додьсьыс, а вөв сідз и вайөдіс том ямщикөс белөйөн босьтөм сиктө. Сійөс и тшапкисны, юасьны пондісны:

— Кодьясөс вайөдін?

— Зэв ме төда, пищальяөсь тай-а.

— Белөйяс али краснөйяс вөліны?

— Чөрнөйяс,— шуө Ваня.— Пасьясныс и сапөгныс — смоль сьөд.

Кутысьясыс семдытөдз ваксьöны-сералöны. А сэсся аслас жө орыснас\* мышсө пөвсалісны, но эз өна дойдны: төлын вөлі, да ыж ку пась вывтыс яйыс-лыыс дзонь коли, эз потлась. Но серамыв лэптөм да лачкөм бөрын шуисны лыйлыны: лэчөдісны ю дорө, сувтөдісны осьса юкмөс водзө. Ваня некыдз эз көйы том ловсө воштыны, шөгө уси да курыда бөрддзис, синсө тільны пондіс кинас. Шков! шков!— вирдыштас пель весьтөдыс лыйөм шыыс. Вөлөмкө, повзьөдөмаөсь сөмын, ловсө кольбөмаөсь зонлы. Вөвсө бөр сетасны и, мун пө висьтав: гөрдьяслы регыд пом воас, миян тан дзонь армия суалө...

Иван пөль важөн нин эз висьтасьлы некодлы та йылысь. Кытікө вунөма нин, да берысь ковмыліс баябөжсө малыштны, мед косавны важ кадас да перйыны юр вемыслөн кутшөмкө дзебасысь колана серпас. Бура дыр кыссис висьтыс раминик пöльлөн. А неуна пельтөмджык, да эз и кывлы, кыдзи внукыслөн өртьясыс петкөдісны склад йөр сайысь дзонь автомашина.

Төрыт на сөмын парөходөн вайөдісны груз новлан кузола куйм автомашина. Таво кежлө тайө вөлі медбөрья парөход: ок-

\* Орыс (диал.) — орс.

тябрь помын кынмавліс нин, но наваль зэрис, да ваыс тузбыліс ытва моз. Сэки и йоткысьліс сьокыд баржа кыскысь пароходыс Усть-Вашкасянь, кысянь Косланөдз витсё сайё километр. Велөдчысьяс жё и отсалісны ректыны автомашинаяссё баржаысь. А öні со грекё вöйтісны: петкөдісны склад йöрысь, вайöдісны школа дорөдз да дзевісны пöвйысь вöчөм сарайö.

Эдуард Александровичлөн аслас патера эз на вöv, и сійö оліс семьянас школаса öти жырыын. Быд рытö, узьны водтöдз, петавліс пальöдчыны ывлаö, ыркыд сынöдсö апалöмөн гөгöртліс школасö. Кор аддзис, кыдзи сылөн «механизаторьяс» пыртöны «гаражö» автомашина, юрсиыс сувтліс: öд таысь мыжанас лоö сійö ачыс, директор! Но бөр нүөдны машинасö эз тшöкты: вöлі нин сёр, да и быгть вылö казьяласны. Татчöдз лэдзчысьны оз позь. Закон вуджöмысь öти туй — тюрьма...

Вой шöрса телефон звöнок суис райисполкомса юралысьсö кабинетас на. Районса «кöзьяин» дасьтысис партия райкомлөн пленум кежлö, кытөн кутасны кывзыны исполкомлөн вöчöжся удж йылысь кывкөртöд. Райкомса вöвлөм секретар, сійö бура гөгөрвоис, мый сэтшöмыс пленум вылын отчёт. Вермасны юавны дзик нин виччысьтöмтор йылысь. Сы вöсна и дасьтысис сідз, мед тöдны ставсö, мый районын вöчсьö и оз вöчсьы.

Иван Михайлович дыр нинöм эз вочавидз школаса директорлы, кор сійö зіліс телефон пыр висьтавны лоöмтор йылысь. Кымöсас чукурьяссö зэвтöмөн жугыля кывзіс ставсö. Сэк жö кöсйис горöдчыны да видны быд лёк кывнас тыдавтöм мортсö, шучкыны трубкасö аппаратланьыс... Сэтшöма дöзмöдіс районса юралысьсö школаса том директор. Кövьясис мөвп: пырысьтöмпыр вöтлыны удж вывсьыс... Но сэки тöд вылö пуктасны, мый ачыс и иналіс том велöдысьöс тайö удж вылас. Сэсся, мөд боксянь кö видзöдлыны, кодöс сы пыдди кольны?

Юр вежöрыс быгтьö песовтчис, и некутшöм петан туй сэн эз бергав. Иван Михайлович ачыс эськö абу Удораын быдмöма, но олö тані дас во нин, бура тöдö районсьыс пöшти став йöзсö. Весиг сёрнитны велаліс удораса ног.

— Сідз сі, муй нö карны пондам, Эдуард Александрович?— дыр чöv олөм мысти юаліс сэсся юралысь да ачыс жö и вочавидзис:— Дасьты кос кус ташка\*... Шожым мусюр — кузь... Чөвйөдз на, гашкö, шлопкыны ковсяс...— тайö бөрья кывсö аслас висервожсаыс моз на вöлі шуö.

Иван Михайлович радейтліс повзёдлыны мыжаясöс. Гөгрöс да вильыд чужöма, шöркост тушаа, бөрья кадö водзлань мыччысьыштöм кынöма вöвлөм учитель эз вöv ньылөм пычкысьяс лыдысь. А сы вöсна, мый эз куж скöравны ни лöгавны, сылөн ыджыда мортлы лöсялана сёрниыс артмис повзёдлана кодь: «дойдам выговорөн», «улöс вывсьыд туркнитам», «дыштö личкам», «пила-чер киад сетам», «мöс картаö сит чышкыны ыстам». А медся чорыдыс вöлі: «Чөвйö мөдан...» Тадзи Удораын тюрьмасö нимтöны. Тыдалö, кодыскö веськавлöмабсь сэтчö.

Иван Михайловичлөн «скөр» кывьясысь повлісны, дерт, сöмын найö, кодьяс медводдзаысь тайöс кылісны. Некодöс выговорысь чорыдджыка эз мыждыв, но повзёдлыны районса

\* Кос кус ташка (диал.) — кос нянь тыра поп.

юралысь радейтіс и весиг нюмъялігсорөн на, быттё сьёлөмад гудрасис, сэтшөма дойдны көсйис.

— А сьомторйыд выйым?— прокуратураса следователь ног юалис, быттё и збыль көсйис төдны: тырмас-ө школаса директорлөн сьомыс ноп тыр кос нянь вылө.

— Тырмас,— гөгөрвоис мудер председательс школаса директор.

— Счөтсө төдан?— пыр на зілис стөчмөдны сёрнилысь колана визьсө Иван Михайлович да кыйкнитіс син пөвнас пызан помын разөдөм бумага чукөр вылө.

— Эг на вунөд,— казяліс Эдуард Александрович, мый юалөны сылысь Госбанкын райполөн расчөтнөй счөт йылысь.

— А сэні — видзөдлам... И сэсся: ин звөнит меным некөр вой шөрын! Гөгөрвоин?

Тадзи шуис «көзяин». Сідзкө, вермас мыйкө артмыны... Райпоса предды, а сідзжө МТС-са директорлы лои юөртөма жө. Складысь автомашина петкөдөм — сөмын челядлөн ворсөм. Ньобан донсө лоө вуджөдөма райполөн счөт вылө. Банкө колана поручениесө войнас жө вөчис школаса бухгалтер, кодөс Гришин чеччөдіс жө верөсылөн шоныд сывйысь. Кор асывнас банкө воис медводдза уджалысь, сюсь нывбаба сулаліс нин посводзас. Некутшөм пыкөдтөг школа счөт вылысь сьом вуджис райполөн счөт вылө. Автомашина лои ньөбөма законъяс дзугытөг. Мый нө эськө колө тайө Осиповыслы? А гашкө, бара Панюковлы звөнитны? Но оз, татчөдз асьтө лэдзны оз позь.

Раймилицияса начальник Осипов водзын пукалісны көкъямысөд класса велөдчысьяс: Валерий Захаров, Валерий Курыдкашин да Петя Власов. Пидзөс весьтө лэдзөм юръяс вөсна найөс позис төдмавны сөмын мыгөр серти. Но школаса директорлөн и налөн синъястөг гөрдөдіс чужөмыс, көть на моз жө дзөб синъястө джөджө. Милицияса начальник мыччис школаса директорлы юасьөмъяса протокол.

Тыдовтчис: вой шөр войнас, Гришинлөн звөнок бөрын, райпоса юралысь Ванеев эз өвсьы, котөртіс складө, вөтліс удж вылысь стөрөжөс да вайөдіс сійөс сойбордөдыс милицияө кыдзи гусясьысьяслы отсасьысьөс. Сылөн висьталөм серти милиция войбыд куталіс «гусь вөръясөс» өтчукөрө. А өні со ас кокөн локтіс и «медвылыс юрыс».

Ставнысө видзисны милиция йөртөдын рытөдз. Сөмын райисполкомса юралысьлөн звөнок бөрын лэдзисны. А Гришинөс ачыс Осипов «конвой» улын вайөдіс райисполкомлөн заседание вылө. Исполкомса членъяс кыңдзи кабинетын пукалісны МТС-са директор Гирляндин, леспромхозысь Кудряшев, мукөд предприятияса да организацияса веськөдлысьяс. Быдөн, кодлы тшукис кольөм войын лоөмторйыс, вермис мыйкө содтыны ассянныс, но помасис сёрниыс сійөн, мый школаса директорлы сетісны выговор педагогика торкалөмысь.

Кор ставөн разөдчисны, Иван Михайлович кольөдіс Гришинөс, пуксьөдіс аскөдыс орччөн сьөд кучикөн эжөм небыд диван вылө да сэтшөм жө небыда кутіс малавны кывнас:

— Ме тэнө гөгөрвоа, но и тэ менө гөгөрво. Прөстит, мый пусьпась тэнө вөчи, виді єна. Оз позь вөлі мөд ногсө. Автомашинаяссө миянлы өд вөлі сетөма колхозъясөс премируйтөм могысь. А со кыдзи артмис. И меным, дерт, сюрас на таысь райком

бюро вылын. Выговор кежлö дасьтыся жö нин. Оз кö чорыд-джыка на кучкыны. Но ме сысы и коралі татчö овмөсьясөн веськөдлысьясөс, кодъяс кыын эм уна техника, мед аддзасны, мый школалы колö отсавны. Ме öд ачым коркö вöлі учительöн...— Иван Михайлович вайöдіс Гришинöс öшинь дорö.— Но тырмас талун, вай пет нин, аддзан: тэнö виччысьöны.

Райисполком кильчö вылын жöдзисны велöдчысьяс. Аддзисны, мый налөн директор да районса юралысь нюмъялöны, пыр и гөгөрвоисны, мый ставыс помасис бурөн, öтвылысь горöдісны: «Ур-р-ра-а!».

— Мöдысь кежлö: колö водзджык юөртны миянлы, мый көсьянный ас ног песовтчыны, а то... код төдас, мый вермас артмыны,— нöштаысь на нюмъявтис Иван Михайлович да киясьбөмөн колльöдіс том директорöс öдзöс дорöдз. Сöмын «аттö!» и кужис шуны мыжысь мынөм директор öдзөссö сиптытöдз.

Аскинас Гришинлы звöнитис МТС-са директор Декабрист Александрович Гирляндин, роч морт, зумышөн кажитчысь, но төлка юралысь, кодлөн и аслас ныв-пиыс велöдчисны школаын:

— Спасибо за урок! Приходи, поговорим...

Мыйся сёрни вөлöма, некод оз төд, а та бöрын некутшöм дон босьтөг МТС сетис школалы гусеницаа трактор ДТ-54. «Механик» Петя Власов ачыс и вайöдіс сійöс школа дорöдз. А кор сувтöдіс тракторсö да чеччис кабинасыс му вылö, зонъяс чукөрөн гөгөртисны сійöс, кыпöдісны ки выланыс да геройöс моз пыртисны школаö.

Эдуард Александрович эз пет сылы паныд. Сійö аддзис ставсö öшинь пырыс кабинетсянь. Сьөлөм гөгöрыс шонаваліс, лои зэв нимкодъ, но мыйлакö нюмыс эз пет. Шуйга кисö суйис зептас, чуньяснас корсьыштис да перйис сэтысь еджыд рузумтор, мыйөн чышкывлö пöсьсö кымөссыс, но öні мыйлакö вазисны ныр доръясыс. Тайö вөлөм войталö синваыс...

## Москваö, министр дорö

Пони Панюков, кыдзи нимтисны Володяöс ёртъясыс, гашкö, неыджыд туша вöснаыс, а гашкö, медым торйöдны батьсыс, ыджыд чина мортысь, вöлі сюсь зонка. Сійö быдтор төдіс: и мый сиктын вöчсьö, и — район пасыта, и унджык на... А мыйта мөвп гудрасис сылөн гөгрөсиник да ичөтиник юрын! Став тайö мөвпъясыс, дерт, эз төрны ас класс йөртöдö, и сійö котравліс «гаражö», пөвйысь тувъялөм неыджыд сарайö, кытөн сулалісны öні выль автомашина да көть и абу выль, но уджалысь трактор.

«Гаражса» техника дорö матöдісны сöмын көкъямысöд-дасöд классаясöс. И то эз быдөнөс. А витöд класса «сырчикъясöс» весиг öдзöс пыр видзöдчыны эз лэдзны. Сулаліс, сулаліс öтчыд гараж öдзöс дорын Пони Панюков, изöймытöдзыс лои, а некод весиг оз пыр ни оз пет гырысьджыкыс. Видзöдö: Юрий Иванович локтö. Школаын техника лоөм бöрын директор индіс физкультура велöдысьöс, вöвлөм трактористöс, труд урок «временнö» нуöдны. Кодлыкö öд колö велöдны челядьöс техника дорö.

— Юрий Иванович,— шыасис Пони Панюков велöдысьлы.— Эм менам... Менам чужис идея...

— Панюков! Тэныд кымынысь вöлі шуöма: эн сорась кок улын. Воас кад, сэки эн дышöдчы.

— Колö ветлыны министр дорö...— оз öвсы Пони Панюков. Юрас кө желясьöма «идея», колö сійöс чöскыда перйыны.

— Кутшöм сэн нöшта министр? Мый тэ сöран, Панюков? Кытчö тэ көсьян ветлыны?

— Кыдзи тай коркö Ленин дорö ветлісны...

— Панюков! Ме сэсса батыдлы норася...

— Видз-му овмөсса министр вермас сетны трактор... И оз на весиг öтикöс.

— Трактор, шуан? Коді висьталіс? Батыд?— Юрий Иванович и збыль чайтіс, мый райисполкомса юралысь сеталö кутшöмкö «идеяяс» аслас пиыс пыр.

Володя эз дöзмы, мый сійöс пыдди оз пуктыны, мортөн оз лыддыны. Көсйис нин водзö паськөдны асьыс мөвпсö, но Юрий Иванович эз кут кывзыны, шамыртіс пельпомöдыс мыжаöс моз да ас водзас йөткігтыр, быттö Пони Панюковлөн «идеяыс» вермис пышйыны көзяиныскөд тшөтш, нуöдіс сійöс директор кабинетöдз. Эдуард Александрович быттö виччысис:

— Мый бара вöчис Панюковыс?— скöрамос юаліс директор. Сы дорö эз нин öтчдысь вайöддыны тайöс рамөн кажитчысь зонкасö, кодлөн мыж вöсна витöд «а» класс школа пасьтала нималіс аслас «выльторъясөн».

— «Идея» сылөн эм,— аслас шмоньсора нюмпошнас Юрий Иванович югзьöдіс директорлысь чужöмбансö.— Ноко, мый тэ сэні меным сöрин? Воссяс оз вомыд?

Кывзіс зонкаöс Эдуард Александрович и думö уси. Идея... эз кажитчы. Министр дорöдз Москваын вермас писькөдчыны... гашкö, сөмын Ыджыд Панюков. Но и сылы зэв культурнöя шуасны: «Абу!»

Коли лун, сэсса мөд, коймөд, а Пони Панюковлөн идеяыс юрысь оз пет, быттö тыдавтөм пучöй моз йирö и йирö вемсö. «А йөткысьлыны кө аслым?» Чужöм мөвпыс вöлі вежөр воштöм мортлөн кодь. Но сідз-тадз, юасьтөг ни висьтасьтөг талунъя олөмын абу шуöма вöчны весиг аслыд. Кодкö шуас тайöс йөй-талөмөн, а кодкö, дерт... И сэки звөнитіс телефонөн Ыджыд Панюковлы:

— Иван Михайлович, шуинныд тай, шыödчöй, кор ковмас. Чайта, буретш öні колö быть сёрнитыштны.

— Бара мыйкö шышкалінныд? Эн? Но, сідзкö... квайт бöрын. Сэтчөдз некор, шойччан здук абу,— Иван Михайлович, дерт, эз на вунөд, кыдзи сійöс «пывсьöдісны» райкомлөн бюро вылын да шняпкисны «строгач». Но он кө талун кывзы мортсö, гашкö, аски и сёр нин лөö. Код төдас, кутшöм сёрни чужис школаса директорлөн. Райисполкомса юралысь ачыс кывкутö став водзын школаяслөн удж вöсна. Кодлы сэсса вештан, көть и он эштöдчы ачыд. Со тай эм юралысьöс вежысь, да весиг кырымпассö оз пукты некутшöм бумага вылө, век ыстысьö: «ачыс» пö мед.— Сөмын квайт бöрын,— содтіс на төдчөдөм могысь Иван Михайлович да пуктіс трубкасö.

Стöч квайт час рытын Гришин пукаліс нин райисполкомса юралысьлөн приёмнöйын. Кабинетын вöліны на йөз, да секре-

тарыс, олома нин нывбаба, весиг өдзөс дорас эз лэдз матодчыны. Час джын кымын мысти йөзыс петалисны, и сөмын сэки воссис өдзөсыс школаса директорлы. Районлөн юралысь пукаліс пызан сайын да весиг юрсө эз кыпөд, синсө эз чөвтлы пырысьлань, мыйкө гижис тэрыба, тыдалө, сэтшөмтор, мый йылысь оз ков вунөдны.

«Школаөн веськөдлыны сьөкыд, а районөн, дерт, ёна сьөкыд-джык»,— мөвпыштис Гришин да кортөг пуксис кузь пызан помын сулалысь улөс вылө. Сы водзын гөрд нойөн вевтгөм пызан вылын куйлісны таөдз пукалысьясөн кольөм бумага торьяс, карандашгьяс. Видзөдласыс джөмдіс ас ныр улас: бумага лист вылын серпасалөма морт юр. Синмыс и пельыс серти, а медясө — паськыд кымөсыс серти позис гөгөрвоны, мый серпасалөма кабинетса көзьяинөс. Нюмсө петкөдісны чардөн вирдалысь сингьяс, бытгтө синсыс чеччалисны би киньяс. Тыдалө, Панюков и татшөмөн овлө.

— Важөн корысялысьяс тадзи пуксывлісны көтшасө,— друг кывлысис Иван Михайлович.— Мый тэ кутан корны?

— Ме локті тьянкөд советуйтчыны, Иван Михайлович,— шуыштис Гришин да мыйлакө сувтіс, кыдзи школаын велөдчысь, кор сійөс юалө велөдысь.

— Советуйтчыны?— лэптіс юрсө Иван Михайлович.— Тайө нин ыджыд выльтор. Некод мыйлакө оз советуйтчыны пыр тайө кабинетса, а сөмын корны, а өти-мөд көсийө велөдны менө, кыдзи колө уджавны. А тэ — совет кутны... Да пуксы тэ, эн дөлав сьөд флаг моз. Но, кывза, шыш...

— Дзик ковтөма ті ме вылө тадзи, Иван Михайлович... А ме өд көсья Москваө вөзйысьлыны, министр дорө... Видз-му овмөс министр дорө.

— Норасыны ме вылө? Гирляндин вылө? Курыдкашин вылө? Но-но, ветлы, туйыс восьса.

— Сійө и эм, мый абу восьса на...

Лунгьяс сайын на сөмын вөлі сёрни МТС-са директор Гирляндинкөд да колхозөн веськөдлысь Курыдкашинкөд школалы содтөд техника сетөм йылысь, мед эськө школа тайө техниканас вермис колхозлы отсавны гөрны-көдзны, турун заптыны. Но өти кывйө эз воны, да быдөнлы туяна сёрнитчөм эз артмы. Тайөс кутісны төд вылын и талун, эз көсийыны гөгөрвоны өта-мөдсө и тани. Гришин казьяліс, мый юралысь мудзөма, да эз кут «кыскыны» сёрнисө, дженьыдика висьталіс ассыс мөвпсө. А кытшала мөвпөн кайтыштис, оз-ө эськө ачыс Иван Михайлович кежав министерствоас столицаө бытгтөкө мөд могьясөн воліг.

Дыр кежлө чөв уси района юралысь. Мытшкерөмыс кыссис кыкнанладорсянь, и кыкнанныс видзөдісны өта-мөд выланыс, и некод эз торк чөв-лөньсө. Чөла пукаліг Иван Михайлович босьтчыліс телефонөн шыөдчыны кодлыкө, но некоді эз вочавидз.

— Вай сідз вөчам,— бытгтө варовмис юралысь.— Тэ аски тайө жө кадас локтан татчө, и ми сэки аддзам өти кыв. А өні — гортө, гортө...

Гришин гөгөрвоис, мый Иван Михайлович көсийө ачыс совет кутны кодкөдкө. Мый көть эн шу, а медбөр кылыс миян оломын век на партия сайын, стөчджыка кө, райкомса первойлөн кабы-

рын. Мед кывкутас райисполком, сылөн юралысь, Сöвет власьт, но кывкутö мед сы вöсна, мый сылы тшöктас вöчны КПСС, сылөн улысса юкөн — райком, бюро, сылөн первой секретар. Кыдзи чайтис Гришин, том на партиеч, сідз и лоис.

— Ми тадзи шуим,— стрöга аскинас паніс сёрнисö Иван Михайлович,— мөдöдны кө, сідзкө мөдöдны колö велöдчысьöс. Корсьöй, коді эськө вермис тайöс вöчны. Ме шуа: мөдöдны кө... А кывкутысьыс — тэ öтнад. Гөгөрвоин? Öтнад. Ми нинöм огö тöдöй. И некутшöм бумага ми тиянлы огö сетöй.

— А бумагатөг коді коды эскас?

— Школалөн эм аслас печать? Эм. МТС-көд да колхозкөд йитчылан, ме сёрнитлі нин накөд. Идея, дерт, утопияөн öвтö. Но мый оз овалы таладор югыдын, торйөн нин миян странаын.

— Идеясö тайöс сетіс öд тиян пиныд, Иван Михайлович.

— Владимир?

— Да.

— Ну Владимир... Ну шыш... Кывлöма, тыдалö. Ходокöс öд ми ыстылім, сöмын мөд министерствоö,— медводз тарыт нюмдыштис Иван Михайлович.— Кодсянь сійö кывлöма?

Кывліс-ö Пони Панюков, аслас-ö мөвпыс вöлі, но идея ловзис, кутіс овны. Аскинас жö Эдуард Александрович чукöртис «механизаторьясöс» аслас кабинетö. Унджыкыс пуксялісны... джоджö.

Колö тöдчöдны, мый выль директор эз дзикöдз кывзысь парторгöс. Аслыс кабинет век жö лöсьöдіс. Школа вöлі кык судтаа, казарма сяма, кузь коридорьяса. Кыкнан судтаас коридор помьясас вöліны асмогасянінъяс. Ог тöд, школа вылö-ö панлöма кодкө тайö керкасö, но архитекторлөн вөлöма ыджыд сьөлöм, торья видзöдлас асмогасянінъяс вылö. Найö вöліны кык жырьяöсь. Медводз пыран көджводзö, сэсся и мөд öдзöс пыр, коланаинö, кытчö тöран пырны öтпырысьөн дзонь классөн. Кыкнан судталысь стенсö пыкис ыджыд ён пач.

Пöшти класс ыджда вöліны тайö жырьясыс, но пачьяссö сэтись некор эз ломтывны. Зэв на дона уджөн шеді сэки пескыс — ставсö вöчисны асьныс, велöдысьяс да велöдчысьяс. Медводз колö вöлі тöвнас пөрöдны вөр некымын дас верст сайысь, увйыны да пурьявны керьяссö, а тувсовья ыджыд ва дырйи кылöдны ю кузя, берег вылö каттыны, пилитны да кыскавны школаөдз вөлөн, а сэні нин юкавны-поткөдлыны ломтана выйөдз да пыртавны быд пач дорö. Ломтысьыс öти, а пачыс уна. Сідз вит пач эз и ломтывлыны школаын. Витöдыс пөрччысянінын, но сэні тöвнас некод эз и пөрччысьыв, челядь тшöкыда пальтоөн и пукавлісны урок вылын.

Районын сэки вöлі дзик öти шөр школа, кытчö локтісны велöдчыны быд сиктысь, коді, дерт, көсйис. Велöдчысь лыдыс содіс, классьяс эз тырмыны. А тані со мый ыджда резерв эм. Татшöм мөвп кучкис юрас директорлы. И гожся каникульяс дырйи сылөн кабинетыс вуджис вылыс судтаас, көн вöлі велöдысьяслөн асмогасяніныс. Мукöдлаас вöчисны аслыныс кабинетьяс военрук, физрук да труд урок нуöдысь. Бур киподтуя плöтник-столярьяс бöрын югыдөн, мичаөн и сөстөмөн лоисны тайö жырьясыс. Но директорлы кабинет вылö ыджыдджык эськө колö. Сы вöсна педсöветьяс нуöдлісны век важинас, көн пука-

лісны завуч да мукöд велöдысьяс. «Механизаторъясöс» директор чукöртіс век жö аслас кабинетас.

— Но мый, казакъяс, кутам вöчны?— кытшовтіс синнас ставнысö да юалис Эдуард Александрович.— Кодöс мöдöдам Москваö?

Ставöн чöv олісны. Да и кыдзи мöд ногөн. Быдөн эськö Москваад воыны кöсйис. Но быдөн и поліс: а верма-ö? Та йылысь жö мөвпалөмөн чöv оліс ачыс юалысьыс: «Коді вермас?» Со найö, син водзынöсь. Быттьö книгаöс нин лыддьöма быдөнöс. Пётр Власов. Таысь вермас лоны ыджыд специалист. Но рам, весиг полысь быттьö. Паныд и кыв джын оз лысьт вöзйыны, он нин шу вензьöм йылысь. Феликс Немчинов. Зэв бура велöдчö. Көрта көлуй вылö видзöдласыс небыд, нюмъялана. Валерий Захаров. Повтöм. Көть стенö каяс. Но — «партизан»: шу көть эн сылы, абу и кывлöма быттьö. Пель вундысь. Геннадий Политов. Чöv олысь. Но кор сылы колö, нускас-нускас, но вöчас. А гашкö, Римма Петчина? Зонпар. Быд ворсöм нуöдö. Вомыслы калич абу, кылыс личыд, уна сёрнитö...

— Мый нö мыжаяс моз öшöдінныд юрнытö?— торкис чөвлөнсьö Эдуард Александрович.— Ме тiянöс чукöрті эг сы вылö, мед джодж пöвъяссьыс увъяс арталінныд.

— Конановöс, гашкö?— негораа шуыштiс Пётр Власов. Но сыысь кындзи некод весиг эз вөрзьöдчыв, сöмын нырнас öти-мöд чушнитіс.

Юрий Конановлөн батъыс велöдö школаын физика да математика. Ачыс Юрий, тыдалö, батяс жö петöма. Гожöмнас уджаліс школаын, отсасис электромонтёръяслы. Сюсь чери кыйысь. Радейтö сёрнитны. Но мыйла нö ёртъясыс чöv олöны? Гашкö, неуна ошйысьыштö, да сы вöсна? Эм сылөн сэтшöм кыв: «ме...» Кальк вома.

— Эдуард Александрович,— друг сувтіс Эмма Кырнышева, öкмысöд «а» класса комсомолечьяслөн вожак.— Со ми тані пукалам унджыкыс öкмысöд классаяс. Миян сэні командирөн Геня Политов. Сыкөд миян пöвстысь быдөн эськö муніс биö көть ваö. Мед сійö и шуас, коды мöдны.

— Шу, Геня!

— Тшöкты, командир!

Эдуард Александровичлөн ёвкнитіс-топавліс сьölöмыс. Да, сійö эскö велöдчысьяслөн ас костын ассянь юралöмлы, мый неважөн на пыртісны школаö, отсалö и ачыс самоуправлениесö колана ног нуöдны. Но Геня... Геня вермас на и сорсыны мортöс бөрйöмын. Ми, педагогъяс, сы вылö велöдчöм йöз, ог этшасысь сконъясьлöй мортлысь пытшкөссö тöдмалігөн. Вот эськö ачыс кө Политовыс...

— Тані абу сöмын öкмысöд класс,— сувтіс джоджысь Геня Политов.— Да и абу öти класслөн сöмын тайö могыс, а став школалөн. Но вот...— Геня мытшкерис, кызöктыштiс ки пыдöсас да водзö нуöдіс:— Ставöн кө ті öтув... Абу кө паныд Эдуард Александрович... Эсканныд кө меным, Москваö верма ветлыны ме.

Ёртъясыс эз виччысьны тайöс. Политов некор бая моз «ме-е» эз баксыв, весиг пырджык зілис саймовтны асьсö, и сылы индöм «командаөн» юрнуöдіс быттьökö кутшöмкö дзедбасаинсянь. И друг — «ме». Ныв-зонлысь шöйöвошöмсö казяліс директор да

пондіс ки-киö кекöначавны, мед садьмöдны найöс, ышöдны зонмöс:

— Ми тайöс и виччысим! Сідз и колö командирлы! Но кыздз? Ми эскам Политовлы?— Эдуард Александрович некыздз эз вермы кутны ассыс кыпыдлунсö, да ставөн босьтчисны клопöдны ки пыдöс доймытöдзныс, а сэсся и öткымын горзыны пондісны: «Ур-ра!»

Радлуныс директорлөн вöлі эз сöмын сы вöсна, мый кодкö мöд эз вермы пöртны олöмö тайö ыджыд могсö. Гашкö, эськö и вермис, но унджыкыс тані вöліны батьтöмөсь, а кодыслöнкö бать и мам вöліны сэтшöмөсь, мый накöд зэв сьöкыд вöлі сёрнитчыны, мед найö лэдзисны ассыныс «чужтассö» öтнас Москваö. А Генялөн батыс фронтöвик-коммунист, неважөн на веськöдліс орчча сиктса колхозён, öні уджалö районса юрсиктын кывкутана удж вылын. Кортöг пыравлö школаö. Татшöм йöзыдкöд зыктöг да ёрччытöг позьö воны öти кылö. Коді öд тöдас на, мый вермас лоны зонкöд кузь туйын. Да и Москва — абу на пармагыд, верман и вошны. Ковмас öд кывкутны...

— А öні вайö письмö гижам министрлы,— Эдуард Александрович чеччис пызан сайсьыс.— Немчинов, тэнад перöйд кывзысянаджык, пуксы менам улöс вылö. А ми кутам висьтавны, мый гижны...

— Турецкöй султанлы Косланса казакъяссянь...— пуксигмозыс помаліс бытьö директорлысь кывъяссö Феликс, и ставсö тайөн ышöдіс-ловзьöдіс.

— Гиж, писар: «Дона министр...»

— «Министр» кывсö колö ыджыд шыпассянь.

— «Пыдди пуктана» колö гижны...

— «Вылö пуктана», гашкö?

— Ним-вичөн колö ыдждöдлыны...

Том войтырлөн вытыс вөлöма пыдöстөм. Министрлысь найö корисны ДТ-54, МТЗ-8, ДТ-14 тракторъяс. Быть колöны содтöд агрегатъяс, мед позис гөрны-көдзны, ытшкыны-куртны турун, и прицеппяс на, медем кыскавны пес, и таысь кындзи кык мотоцикл да мастерскöй-летучка, мед позис гожöмбыд уджöдны став техникасö ылыс видзьяс вылын гаражö вайöдлытöг да ыджыд ремонтъястöг.

Эдуард Александрович босьтис письмөсö Немчинов ныр улысь, лыддис нöштаысь да содтис, мый Кослан школаса велöдчысьяс көсйöны котыртны школа бердын ассыныс МТС да көсйысьöны асланыс уджөн вештысьны государстволы тайö техникалысь донсö куим воөн.

— А көні кутас видзны МТС-ыс та мында техникасö?— думö усис Петя Власов.— Миян «гаражö» öдвa-öдвa трактор да машина төрö.

— Выльöс кыпöдам, дзоньтасян мастерскöйөн.

— ГСМ вылö колö кымын бöчка...— Власов ставсö кутö тöд вылын.

— Цистерна кө эськö...

Школаын жуис сёрни машинно-тракторнöй станция йылысь. Көкъямысöд-дасöд классъясын этша вöлі ныв-зон, коді эськö эз көсйы велöдчыны, а сэсся — уджавны машина-трактор вылын. Теория велöдісны торья урок вылын, а урокъяс бöрын — «гара-

жын». Велөдісны «Ыджыд МТС»-ысь специалистъяс, ныв-зонлөн батысьыс, кодъяс дон босыттөг косьйысысны асланыс пиянныслы велөдны найос. А регыд на пиысь өти, механик Акундин Максимович и дзыкөдз вуджис школаө, велөдысьлөн удждон вылө.

Физика урок вылын төдөмлунъяс төдчана содісны. Лунъяс сайын на Анна Михайловна пырыкө\* чирйысьтөдзыс тотшкөдіс мелнас дөскаө: Романюклөн кымөсыс пө татшөм жө, пуыс кодъ. И юр вемыс пө сэтшөм жө: X дорө содтө Y, да сылөн лоө XY. А талун Володя кык X вылө лөсьөдөм уравнение помөдз вайө-дөма, да стөч артмөма. Володялы сызсисны\*\* сетны вель трактор, со и зильө мортыс.

Мыйлакө ставөн эскисны, мый Москва сетас налы тракторъяс. Эдуард Александрович өтнас майшасис, мый «ворсөмыс» помасяс ворсөмөн. Некод найос оз гөгөрво и нинөм оз сет. Сьөлөмыс полис мөдөдны Политов Геняөс министр дорөдз. Тадзи колис лун, мөд, коймөд... Генялөн батыс весиг ошкис, мый буретш сылөн пиы эскөны школаын да сэтшөм кывкутанатор сетөмаөсь пөртны олөмө. «Верстьө морт нин, кытчө вошас»,— эскөдіс директорөс. Но Гришин эз тэрмась кырымавны зонмөс Москваө ыстан бумага. Медбөрын юксис гөтырыскөд аслас полан мөвпъясөн.

— Ачыл тай висътавлін: война кадө фронт вылө пышйив-лөмыд, дас кык арөса на вөлөмыд-а,— шмонитөмсорөн өлөдіс верөссө гөтырыс, школаын велөдысь жө, но сылөн «ворсөмлы» век паныд мунысьяс лыдын олысь, көть и восьсөн, йөз дырйи, некор паныд ни сы дор эз сувтлы.

Збыль өд, кутіс дорйыны асьсө Эдуард Александрович. Сійө сюрс өкмыссө нелямын кыкөд воын, витөд классын велөдчигөн, некодысь юасыттөг ни висътасыттөг, пышйис Нювчим сиктысь фронт вылө, батыслы да ыджыдджык Прометей воыслы отсөг вылө. Москваөдз воөдчис. Эз кө кутны да бөр вайөдны гортөдзыс, гашкө, и разведчикөн на лоис, кызди и косьйис, көть зептас сукарторъясысь кындзи нинөм эз вөв. А Политовлөн лоө став колана документыс, и сылы нин регыд дас квайт. Төлын өні Шожым мусюр позьө вуджны груз кыскалан машинаясөн. Айкиносьянь — поездөн.

И Эдуард Александрович бара чукөртіс «механизаторъясөс». Нөштасысь лыддисны СССР-са Видз-му овмөсса министрлы письмө, кытчө вөлі кырымасьөма став школаыс, весиг ичөт класса велөдчысьяс. Ставөн ошкисны письмөсө да сетісны Геня Политовлы.

Кольөдісны «ходокөс» став школаөн. Кузь пельяса көр ку шапкаа, ыж ку пася, гын сапөгъяса, ичөтик пу чемодана Геня Политовлөн чужөмас быттө гижөма вөлі: «Ставыс лоө бур!» Бурмөдіс тайө чужөмыс и школаса директорлысь майшасьысь сьөлөмсө. Сійө топыда кутліс зонлысь шоныд кисө, топөдліс асьсө морөс бердас пиөс моз да шуис сөмын өти кыв: «Эска!»

Сійө здуксяныыс колис нин дас лун, а Генясянь некутшөм юөр абу. Вошис мортыс. Но школаын некод эз эрдөд асьыс төждсө.

\* Пырык (диал.) — торпыриг, чир.

\*\* Сызьыны (диал.) — косьйысьны.

Быдён эскис. Сэк жё школа эм школа. Сылён эмось и мукөд төждъяс.

Анна Михайловна, кодлөн «посещаемость» да «успеваемость» графаясын прочентъясыс ёна кутісны чеччавны отарсянь мөдарө, педсовет вылын эз вермы овны директорос конйышттөг:

— Локтан воын школа помалысьяс сдایتоны экзаменъяс сөмын «труд» предметыс. А Политов да Власов, кодъяс мунісны медаль вылө, петасны школаыс сөмын трактористъясөн... Му гөрысьяс. Куйөд идралысьяс... Со кодъясос кутіс быдтыны шөр образование сетан школа. И тайө сөмын оти мортлөн челядъясөм понда... Мөд велөдчан волөн четверть помасьө, кызди аслас киясас босьтіс школалыс веськөдлан вөжжисө виль директор, а школа сөмын зөм чеччалө да шыбельыс шыбельө шеналө додъсө. Педсоветос директор оз кывзы. Абу-ө кад нин асьсө кывзыны партийной собрание вылын? Мый та вылө шуас Борис Афанасьевич?

— Борис Афанасьевич абу паныд,— ним-вичалис асьсө парторг.— Кызди шуасны коммунистъяс, сідз и лоө. А мый татчө шуас ачыс Эдуард Александрович?

— Эдуард Александрович абу жө паныд,— парторглыс шмонитан русө директор эз көйы воштыны.

Зэлалом сынөдас педсоветлөн сёрни визыс вуджис тешлань. Ставөн нюмдісны, кодкө вом дорсө дзебигтыр кызөктіс, сөмын Анна Михайловналөн синкымъясыс зумыша люкасисны. Тайөс казалис Гришин да быттьө ловнас лыбис:

— Да, ме, позьө шуны, дась талунъя педсоветсө вуджөдны восьса партийной собрание вылө. Колө мясянь доклад, отчөт — ме вөча. Вочавидза став юалөм вылө и кывкута аслам став вөчөмторъясыс кызд директор и кызд коммунист.

Чукөртчөмлөн сёрни визылыс татшөма вежынтчыс мегсө\* некод эз виччыс. Весиг Анна Михайловналөн калькуніс вомыс, а синкымъясыс раммисны, асладорө пуксисны. Но партийной организацияса секретар тшапасис директорлөн кыв помас:

— Позьө отувтчыны том йөзкөд, шуам, партийно-комсомольской вөчны. Ставөн та дор? Коммунистъяс? Аха. Комсомолечьяс? Аха, весиг оти абу паныд. Сө прочөнт. А ті, Анна Михайловна? Молчание — знак согласия,— рочыштіс Борис Афанасьевич да аслас кытікө шмонитана, а кытікө индалан ногөн киргыс гөлөснас водзө нүөдіс:— Кызди нимтам сёрнитанторсө? Коммунистлөн отчөт? Коді та дор? Паныд? Паныд абу. Бөрийөй юралысьөс, гижысьөс.

— Борис Афанасьевич...

— Елизавета Ивановна.

— Августа Васильевна.

— Тырмас кыкыс. Пуксы, Елизавета Ивановна, гиж,— парторг весиг эз төдмав, моздасны-ө бөрийьсөмтөг индөмъясыс мукөдыслы, пасийс вомгорулас, но ставөн кылісны:— Мөдөдчим турунла, кежим пескө. М-да... Эдуард Александрович, вай сідз: шусин ельдөгөн, чипышө и сөв. А ми чошкөдам пельяс да лөсьөдчам кывзыны.

Эдуард Александрович водзвыв төдіс и зэв бура гөгөрвоис, мый тайө здукыс воас. Виччысис, дерт, мый воас сійө коркө бөрын-

---

\* Мег (диал.) — чукыль. Тыдалө, таыс артмөма и мегыр кыв.

джык, кутшомкӧ ыджыд сорсьӧм бӧрын, и сэки ой-ой кутшӧм сьӧкыд эськӧ лои дорйысьны. А ӧні вӧлі неуна кокниджык сьӧлӧм вылас: артмис сідз, мый кывкутны дасьлун йылысь мӧвпыс кадысь водз исковтис кыв йывсьяс. Бур, мый отсаліс Анна Михайловна, кӧть и аслыс тӧдлытӧг. Эз, директор эз лӧгав аслас завуч вылӧ. Сійӧ зэв бур велӧдысь, бур педагог. Предметьяс велӧдӧмын завуч вӧлі медея бур отсасьысьӧн.

Ставыс эськӧ бур, но школарысь талунъя могсӧ педагогьяс гӧгӧрвоисны, том директорлӧн видзӧдлас серти, тӧрытъя оласногӧн, и Эдуард Александрович тайӧ оласногсӧ лыддис важмӧмӧн. Нинӧм выльсӧ сійӧ эз аддзы и минпрослӧн приказьясысь, и ронолӧн индӧдьясысь. Найӧс пӧ гижӧны йӧз, кодъяс асьныс школаын оз велӧдны, олӧны школа дорысь бокин.

А завуч унаысь тӧдчӧдліс: школалӧн могыс сыын, мед тӧдмӧдны велӧдчысьӧс велӧдан программаӧн, мый гижӧма учебникӧ, а абу газетӧ да журналӧ. Физика, математика, кыв, литература, история, биология — со мый вылын сулалӧ школа. Став мукӧд предметыс — абу быть вылӧ. Ни сэн физкультура, ни сьылӧм кутшомкӧ музыка сорӧн, ни ӧнія «удж» предмет, ни военной делӧлысь подувъяс велӧдӧм — нинӧм оз сулав шӧр предметьяс водзын. «Удж» предметысь тӧдӧмлунсӧ кӧть «кык» вылӧ донъяв, велӧдчысьӧс некутшӧм мытшӧдтӧг позьӧ вуджӧдны ыджыдджык классӧ и сетны весиг аттестат. Тайӧс зэв бура тӧдіс Эдуард Александрович, сы вӧсна и паніс сӧрнисӧ тадзи:

— Талунъя олӧмын быд мортлы колӧ сэтшӧм тӧдӧмлун, мед сійӧ вермис сӧвмыны водзӧ быд боксянь. Физик мед вермис лоны лирикӧн, и мед историк вӧлі инженерӧн, а трактористлы колӧ лоны биологӧн...

— А учительлы — дилетантӧн... — эз вермы чӧв кывзыны Анна Михайловна, кор сійӧс, ыджыд опыгта учительӧс, «велӧдӧ овны» сыысь ӧна томджык, «тӧрытъя пӧжалӧм» директор. Но Эдуард Александрович быттӧ эз и кыв, водзӧ нуӧдіс асьыс мӧвпсӧ сы йылысь, кутшӧм йӧз колӧны миянлы аски:

— Талун нин миян сиктын некодлы лои гӧрны му, лысьтыны мӧс: ӧтияс мунісны карӧ, мӧдъяс полӧны льякӧсьтны кинысӧ, яндӧны «няйтӧсь» уджысь. А коді таысь мыжа? — директор мытшкерис, гӧгӧртис синнас ставнысӧ да ачыс кывкӧрталіс: — Мыжаыс — ми, велӧдысьяс, школа. Быдӧнлы сюям пеляс: колӧ лоны инженерӧн, врачӧн, агрономӧн, учительӧн, учӧнойӧн... А жебджык кӧ кӧсийӧмыс да учӧнойӧдз быдмыны выныс оз тырмы, повзӧдлам: «Няйт муын лужысьны пондан, куйӧдын кураьсны... Мӧс лысьтысь лоан, вӧв додьялысь, сюмыс гужи зӧлӧдысь...» Асьыным туддзим\* вежӧраяссӧ ышӧдам быд ногыс, мый аския лунлы оз ковны велӧдчытӧм йӧз, мый коммунизмын ыджыдалӧ наука. Быттӧ коммунизмыс — аски. Узям вой, садьмам, а сэн нин енӧжӧ кайӧны эскалатора содьяс, кыдзи тай Москваын метроысь петігӧн, и став уджсӧ вӧчӧ машина: личкы кнопка — петас нянь тупӧсь... Чӧвтлӧй синтӧ гӧгӧрбок: ми талун на пес пиlitам ки помысь, пӧперечной пиласӧ напилӧкӧн ӧсьтам, кыдзи пӧляс дырйи. Турун ытшкам гӧрбушаӧн, картупель босьтам лӧбынӧн...

\* Туддзим (диал.) — сьӧкыда гӧгӧрвоысь, абу тӧлка.

Сёрнитіс директор педагогъяскөд, а ас кежас мөвпаліс: «Сөмын на көсьям босьтчыны. Нинөм на абу. Да и лоас-ө на? Эрдын чурвидзё сөмын на панасыс, а со мөдысь нин вочакыв кута аслам коллектив водзын. А сувтас кө велөдысь котырыс став сылөн водзмөстчөмыслы паныд? Оз кө гөгөрвоны сійөс коммунистьяс? Прөщай сэки школа, прөщай, ичөт МТС». Пөсъявтөдзыс лои татшөм мөвпгьяссыс Эдуард Александровичлы. Но тыдовтчис, мый сы дор сулалысьыс төдчымөн содөма. Медводз асьнысө петкөдлісны томгьяс. Елизавета Ивановна, комсомолечьяслөн юрнуөдысь, босьтіс кывсө юасьтөг:

— Ми, комсомолечьяс, век вөлім прогресс вөсна. Мый выльтор чужө, сэн и ми, көн сьөкыд, сэн и ми... Ми...

— Ми, ми...— торкис нылөс Анна Михайловна.— «Ми» вылө эн ыстысь. Тэ ачыд — кыз учитель? Мый — тэ?

— Ме... ме... ме радейта Эдуард Александровичөс...

— О! Сійө радейтө! Кылінныд?— Анна Михайловналы быттьө банас шучкисны, сійө весиг сувтіс юалан знак моз.— Кылін, Галина Васильевна, мый миян школаын вөчсьө?— сингьяссө быттьө пысалис Гришинлөн гөтыр весьтө, коді зэв лабутнөя пукаліс өдзөс дорын да лыддис книга. Ас дорас шыөдчөмсө кылөм бөрын книгасө тупкис, но нинөм эз вочавидз, быттьө эз и сылысь юавны. Эз падмы и Елизавета Ивановна:

— А мый? Ме ог сідз радейт, кызди ті чайтанныд.

— А кызди ми чайтам?— эз өвсьы завуч. Но сэки Борис Афанасьевич тотшкөдны пондіс карандашөн пызан вылын сулалысь тыртөм графинө, корис сёрнитны «по существу».

Сэки кывлысис Августа Васильевна, коді воддза собрание дырйи «техникаа педагогикалы» вөлі паныд жө, но өні шуис:

— Ме думысь, тайө сөмын бур вылө. Коймөд классаяс пондісны гижны: «Көсья лоны колхозникөн». Татшөм гижөдсө ме аслам синмөн важөнкөдь нин эг аддзыв велөдчысьяслөн тетрадьысь.

Августа Васильевна во кызь нин велөдө ичөт классгьясын. Сөмын война воясө эз уджав школаын. Но челядь дорысь эз эновтчыв. Сійөс индылісны ВЛКСМ райкомса школа отделөн веськөдлыны, а сэсся и райкомөн юрнуөдіс. Абу ыджыд тушаа, тоин гыр кодь лоөма нин, кызыштөма да, но вөлі тэрыб ки-кока на да варов кыла. Көть велөдчысьяскөд сёрнитіс лабутнөя, позьө шуны, чорыда, синмыс сылөн век нюмис, да и ачыс вөлі дась сералыштны, сюрис кө та вылө помка. И серам петкөдлыны кужис.

— Пукала ме талун тані, да юрө со мый воис,— водзө кутіс юксыны мөвпгьяснас.— Эм менам велөдчысь, некор ки эз лэптив, а друг медводзын лэптис. Нарошнө, мися, медбөрын юала, мед водзө вылө велалан. Öти бөрся мөд кывбур лыддьөны, а сійө сөмын таркөдө кинас, юр вылөдзыс лэптө. А сэсся и лэдзис. Дөзмис, гөгөрвои сэсся да и юала сійөс: Ваня Попов, мися. А сійө весиг оз чеччы. Мый нө, мися, вунөдін кывбурсө? А ме пө гачам нин кудзалі,— и сэтшөма гир-гир серөктіс Августа Васильевна, быттьө кушөмкө тештор висьталө.— Вөлөмкө, кисө лэптөмөн юасьлөма петавны. Кытөн нө, мися, перемена дырйиыс вөлін? Ме пө дежурной вөлі. Петавны сөрмөма, и ме юавны

сёрми. Со и артмис... котасьом гач. Мед эськө и ми ставон эг сёр-мой отсыштны том мортыслы... А то гижома талун менам отик: «Быдмышта да министрлы гижа, мед сетас меным трактор — мамолысь ошинь ув йорсө горны».

Татчө серамыс петис весиг Анна Михайловналон. Сийö коть и казавны пондiс, мый кольö отнас ас мөвпгъяснас, бытшкыштіс на кывнас сийöс вермысьясöс:

— Ошинь увсыным йорнымöс горны и велодам тай, лөсьö-дам та могысь дзонь эМ-Тэ-эС.

Вензыны некод эз кут. А Василий Фёдорович, кодлон öни лои, директор моз жö, аслас кабинет, кытөн позьö көрт öдзöс сайын видзны öружие да мукöд матчасът, көсийö тöдны, мый эськө колö завучлы: бырöдны абутöм на МТС али военруклысь «сторожевой постгъяссö», көн збыльной винтовкаясөн некымын час чöжөн сулалöны сылөн «салдатгъяс», военной делö велöдысь зонгъяс.

— Оз позь! — военной морт моз чорыда шуалö военрук. — Сöмын гаражын миян куим пост. Мед и патронтöг, но öружиеыс боевой! Кыдзи нö: регыд зонгъяс лоасны воингъясөн. И öружие тöдны пондасны, и техника. Сэк жö — дисциплина! Сытöг — оз позь! Ме ог гөгөрво, мый көсийö дона Анна Михайловна...

— Ме көсгъя, мед школа вöлі школаөн, а эз гаражөн ни ка-зармаөн, дона Василий Фёдорович. Тэ абу педагог, и тэныд сьö-кыд гөгөрвоны тайöс, — лэчыд кывнас школаса завуч лыйис ос-колокөн ранитчöм сьölöмас вöвлöм капитанлы, боевой коман-дирлы, кодi войнаöдз удитiс помавны пединститутлысь сöмын öти курс, а нöшта нельыс вöлі — война, фронт.

Война помасис, а сы дыра на видзисны армияын, мый эз на удит нажöвитны весиг аслыс паськөм вылö, да гражданка вылын олiс гимнастёркаа да галифе гача кыдзи школаын, сiдз и гортас. Көдзыд дырйи — шынель. Отделениеса командирсянь ротнойöдз воис Василий Фёдорович, ефрейторсянь — капитанöдз. Уна салдат лыддис сийöс велöдысьөн и батьөн, коть и вöлі зэв на том морт. А со, видзöдтö, «абу педагог», коть и велöдчö заочной сi-йö жö пединститутас. Но военрук эз кут пырöдчыны пыдöстөм розьö: вензьöм, кыдзи сийö тöдö, эз на вайöдды бурöдз, коть та йылысь быд дырйи казтылöны мөдарö. Чöжсьöм мөвпгъяссö колö быть йöзöдны:

— Кыдзи коммунист, ме лыддя школаса директор Гришин ёртлысь уджсö ошканаөн, а школа водзын сыөн сувтöдöм могъ-яссö лыддя аслам могөн, — татшöм кывгъяс бöрын Василий Фё-дорович корис ассыс шүөмсö вынсьöдны собраниелөн резолю-цияын. Но зэв öдйö ставыс вежсис.

Эз на удитны резолюциясö сувтöдны голосование вылö, кыдзи Гришинлөн ним вылö почталён вайис телеграмма. Эдуард Алек-сандрович чөвтліс синсö бланок вылас, да нюмыс петiс. Гөгөртiс видзöдласнас пукалысьясöс да налысь юавтöг пондiс лыддыны: «Техника отгружена дополнительно дали электростанцию 25 киловатт тчк Геннадий Политов». Учительскойын бытгö кок йывсыныс юр выланыс сувтісны: «Ур-раа! МТС — ми-и-ян!»

Отпырысьөн и вöвлöм фронтöвикгъяс, и школаын кызь сайö во велöдысь аныс, коть стрөгöсь, коть лукавöсь, төлкаöсь да

сямаось, а коркө и челядьос повзёддысьось,— ставон оти здукө лоины асланыс воспитанникъяс кодь жө вёйось, быттьо тайо зумыш йёзыслы здук кежлө вуджліс зонпоснилон вильыш руыс. И вёлись Эдуард Александрович помөдз гөгөрвоис: учителяслон коллектив сулалө сы дор. А сідзкө, и Анна Михайловна ньөжйөнникон коркө вуджас наладор берегө. Сійо жө гөгөрвоись морт.

Школаса директорлон гөрддзасис горшыс, кодкө быттьо кутчысис сэтчө. Синъяс дорас чөжсис синва кымөр: дзик пыр зэрмас. А сійо нюмъяліс и эз төд, мый вөчны: збыльсь-ө бөрддзыны, гораа серавны-ө да горзыны мукөдыс моз. Кодкө кыскыштис пинжак пөлаөдыс. Вөлөмкө, парторг, пуксыы пө.

— Коді сы вөсна, мед ошкыны школаса директор коммунист Эдуард Александрович Гришин ёртлысь уджсө?— Борис Афанасьевич весиг быттьо зумышмис, көсйис петкөддыны, мый сылы өткодь, кодарө гөлөсуйтасны: ошкасны али паныд сувтасны.— Та-акс... Паныд? Абу. Коді некодарө эз сувт? Анна Михайловна... Отик. Та-акс. Унджык гөлөсөн шуим ошкыны. Коддөн кутшөм содтөд, чинтөд? Юөръяс? Торъя пасйөдъяс собрание нуөдөмысь? Абуось. Восьса партийно-комсомольскөй собрание лыддя пома-сьөмөн.

Борис Афанасьевич босьтис пызан вылысь бумагаторсө, кытчө мыйкө гижалис пукалігмозыс, да сюйис зептас, тшапкис кок дорас сулалысь портпельсө да тэрыба петис ставсыс водз ставныслы өттшөтш «аддзысьлытөдз» сиөмөн. Сылон тарыт гортас гөсьт, а сійо та дыра эз во, вермас и лөкөдчыны.

Косланө вотөдз Борис Афанасьевич велөдліс Черныбса школаын. Пөшти быд черныбса, коді өні воліс Косланө, кежавліс сы ордө видзөддыны, кызди оло налон учитель, сёрнитыштны, казътывны важсө, юасыны талунъя олом-вылом йылысь. Сыкөд позьө быдтор йылысь юксыны аслад мөвпгъясөн: и колхозъяслон киссьөм вийөдз воөм йылысь, и Китайлон миян вылө мыйлакө друг видзөддас вежөм йылысь, и локтан тулыс йылысь, кор ловзяс коми вөр-ва да воас ылі лунвылысь дзодзөг-чөж...

Некымын во оліс Черныбын Борис Афанасьевич, велөдіс сиктса семилеткаын, и уналы сьөлөмас колис бур пас. Сы вөсна и гөсьтыс өні воліс сы дорө уна. Быдөнөс колө печенньоа чайон юктөдны, кызд нө сытөг, а чай дорө, сёрни пестөм могысь, быть вылө колө доз сувтөдны пызан вылө. Накөд на и юны колө тшөтш: он кө ю ачыл, шоч гөсьт румкатө вом дорөдзыс вайөдас. Кутас киас, кытчөдз тшөтш он босьтчы.

Мукөдыс оз на и матөдчы пызан саяд, оз кө югзыыв сулея гоньыслон зар юрыс. Пөт пө, шуас, оз ков. Куимысь на корны колө. А мунас аслас Черныбас да пыр жө йёзыслы лөвтас, кутшөм «скуп» лоөма Борис Афанасьевичыс «карө» мунөм бөрын. Отик сөмын чуймөдіс неважөн: эз и тшукөдчыв тыра румкаөдзыс, өні пө сёр рыт нин, да некод оз аддзыв менө гажмөмөн, некод оз төдмав, мый сэтшөм ёна уважайтанныд менө. И татшөмыскөд колө ладмөдчыны.

А «карын», районса юрсиктын, учитель Борис Афанасьевичлы некод некутшөм оланін, дерт, эз дасьты. Во джын оліс меда-сьөмөн кык метра пасыта жырйын гөтырнас и кык пион. А сөсся шуис ас керка лэптыны. Но сөмын мойдын керка кокниа

зымкнитчö. Асьнас керкаыд оз лыб, көть тэ ачыд кужан киад чер кутны и пач верман вартны ас кинад. Гöтырыс эськö детсадын воспитатель, и гозъя кыкнанныс удждон босьтöны, но медалін кө мортöс, сылы öд мынтысьны колö, вердны и, юктавны и. Вина дозтöгыд некод на оз тшуп пельöстö ни стентö оз лöсав, джоджтö оз вольсав ни пачтö оз тэч. Джын керкаас на и оло сиктса учитель, а кор эштас мöд джынйыс, некод на оз тöд.

Ачыс көть и киподтуя морт, но войнаөн дойдалöм лысьöмас лолыс сьöкыда нин ветлö... А гöсьтлы колö и ловтö осьтыны, и керка öдзöстö, да мед и пызан вылыд на вöлі тыра. Сэтшöм тай олом-выломыс. Бур, мый эм магазинас ньобанторйыс, абу нин войнабöрся медводдза воясыд, кор карточкаяс бырöдöмсянь нянь көрыш судзöдны позис сöмын öчередын вит час асывсянь сулалöм бöрын. Быдтор öнi эм. Мед сöмын сьöмыд судзсис. Сэтшöма шогö усылан да сэтчöдз волан: көть ачыд серпасав сьöмсö. Да и чери сьöмыд абу жö на ньобасян сьöм.

Эз кө эськö ачыс кый Борис Афанасьевич черисö, эз кө вайлы вöрысь пöтка яйсö, эз кө порсьсö видз гöтырыс, тшак-вотöссö тövбыд кежлö эз кө дасьтыв да капустасö эз кө солавлы пельса-мöд, и дерт, картофельсö кольöм арö эз кө ло босьтöма гу веркösöдз, кыз эськö и гöсьттö солöдан да курöдан...

Мövпалö тадзи учитель-парторг да котөрöнмоз лэччö ыбъяс вылын кыпöдчöм школасянь оль вылын сулалысь выль гортас. Танi неважөн на нюра вөр вöлі, сикт шöрсянь йöзыс волисны мырпом вотны, а öнi со, видзöдды, дзонь сикт паськаліс Ольвыв ним улас, керка лыдыс Черныб мында, выльсьыс-выль ставыс, серпаса öшиньөн и вильыд стенөн югъялöны.

Кöнi Кослан сиктлөн панасыс, некод нин оз тöд, но нимыс артмöма, кор медводз воысьяс овмöдчöмаöсь сотчöм вөр дорö, көнi оз ков вöлі вөр пöрöдны да мыр бертны, мед мыйкö быдтыны гöра-кöдза отсöгөн. Сотчöмин пасьталаыс разалöм кос лон пондаыс и быдмис Кослан сикт. Öнiя олысьяслөн пöль-пöчьяс сиктсö овмöдiсны эз öтпырысьөн. Медводз ю дорын да ёлыс дорын, сы вöсна сиктсö быттö юклöма вөр-ваыслөн мыгөр серти, и важ олысьясыс налы нимъяс сеталöмаöсь, кызди карын уличаяслы: сиктысь неуна торйөн — Тыйыв да Удор; сиктлөн катыд помыс — Ёльвöм, Кослан ёлыс сэтi Мозынас усьö да; Микöла чульк — Микöла Угодниклы пу вичко сулавлöма пö коркö; сэс-ся — Шöрсик, Вичкодор, а Кöдзьель нима шор сайын — Шойнаяг, коркö сэнi пö шойнаыс вöлöма, а öнi керкаяс сулалöны крестьяс пыдди. А ыбланьыс матöджык, нюр вылас, — Ольвыв.

Содö и содö районлөн юрсиктын йöзыс, быттö чöскыдджык танi ваыс, сыладжык вöлöгаыс, и весиг со нюр вылас овмöдчöны. Кор пиянныс быдмасы, мый налы шуасы? Та йылысь оз мövпыштны? Во дас ли кызь мысти став керкаыс танi пöлынтьчас, керка подулыс олялöмсьыс тövнас кынмавны пондас, джодж нурöбыс\* сiсьмас, кильчö помсö ваөн ойдас, тулысöдзыс — вержыньтчас. Гыбад нюр вылын керка бердыс кутас гыбавны: кынмас — вылö лыбас, сылас — бөр пуксяс... Тöдö тайöс сиктын олысь, но керкатö быть кытчöкö сувтöд: ыб вылыс колхозлөн,

\* Нурöб (диал.) — переводина (джодж вольсалöм вылö вомöна керьяс).

сэтчө некод керка панны оз лэдз. Көсьян овны Косланын — тшупсы сэни, кытчө сетасны му рөч...

Сы вылө и юрыс мортлөн, мед мөвпавны. Мед гудрасьö сэ-ни: юрас өд унатор волө... «А тайö Геня Политовысь төлк лоö, тыдалö. Воö жö юрö татшөм мөвп. И Гришиныс абу бөб морт. Вöчас өд, мый көсьяс. Вöча-ас... Но тани олысь Гришиныс оз ло. Оз төр сийö Кослан школаö: вывти паськыдöсь бордьясыс — лэбзяс... М-да-а... А мый эськө артмас тайö МТС-ысь? Адззывны эськө... Овны эськө нöшта некымын во... Йыломöй на ичötöсь и... А со кургö лолöй. Сьолөмöй быттьö абу инас... Эн тэрмась... Эн тэрмась... А гортын со биа... виччысьöны...»

Школаын быттьö Ыджыд лун. Кыдзи нö: письмөас өд кырымасис быдөн, и со — сетисны! «А ме кө эг пукты ассыым кырымпасöс? Гашкө и, эз сетны?»— ошйысьöны öта-мөд водзаныс ичөтджыкъяс. Быдөн пуктис ассыс пай! Тайö төдчис быд чужөм вылын. Весиг Анна Михайловна талун некодлы эз «козьнав» ставлы төдса «кык». Öтвылысь виччысисны Москваысь локтысь Геня Политовöс.

А Геня Политов Москваын эз жö пöсь шаньгаөн чöсмась. Овны эськө овмөдчис рөдвуж ордö, ай-мамыслөн адрес серти. Но министр дорö сийöс весиг эз матөдны. Сидз и шуисны медводдза луннас, кор сийö пырис ыджыд өдзöсьяса министерствоö, мый министрлы татшөм сёрниясөн больгыны некор. Но Геня ыджыд чина приёмнойын эз шөйөвош: меным пö зэв ёна колö воөдчыны министрöдз, адззысьлытөг ог мун — пукалис уджалан кад помөдз. Локтис и аскинас да бара пукалис рытөдз. И тадзи кутис вöчны быд лун. Министерствөын уджалысьяс моз жö быттьö удж вылө воывлө асывнас да мунö сэтысь удж помалысьяскөд öтлаын.

Вежон колис, а сийöс быттьö оз и казьявлыны, гашкө, чайтöны, мый сийö абу збыльнöй «ходок». Шойччан лун колис. И Геня бара приёмнойö воис. Сэни век тырыс йöз. И сөмын дасөд луннас нин öти нывбаба матөдчис Геня динö:

— Тэныд мый колö, зонка?

— Меным колö министр...

— Министр? Тэ — приём вылө? Кыдзи овыд? Но тэ списокын абу. А кутшөм сёрни тэнад?

И Геня Политов ставсö висьталис тайö зэв небыд кыла аныс-лы.

— Дивö босьтас!— кияссö паськөдөмөн шензис мича аныс.— А эм тэнад кутшөмкө бумага? Бумага, мый тэ...

— Эм!— и Геня перйис питшөгсьяс ставсö, мый сылы сетлисньы школасянь...

Уджалан лун помланыс нин Геняöс корисны пырны министрлөн кабинетö. Кузь пызан сайын пукалисны морт дас: ёнөсь, кызөсь, унджыкыс öчкиа, кыкөн — куш плешкаöсь. Ставөн видзөдисны зонка вылө вöвлытөмтор вылө моз — дивöысь дивö. Коді татшөм повтöмыс?

Медводзын кывлысис ачыс министрыс, коді пукалис пызан помас, куш плешка жö да öчкиа морт, абу на пöрысь, но и томөн он жö шу. Сылөн вöли вöсни, нывбабалөн кодь небыд гөлөс:

— Сідзкө, ті шуинныд котыртны ассыныд школаса МТС?  
А тырмас-ө вынныд?

Генялөн важөн нин вөлі тэчөма юрас, кыз колө гольны\* министркөд, мед юөртны медся төдчанасө, но польштис, мед эськө некод эз дугөд сийөс, мед эськө эз сорсы ачыс, да тэрыба, кызди кужис сёрнитны рочөн, пондіс висьтавын: «Миян эм нин МТС. Сөмын машинасыс утильыс, бракуйтөм, да колана ног уджалөм вылө оз туйны. Ми на вылын сөмын теория велөдам. А миянлы эськө гөрны колө, ытшкысыны, пес кыскавын школалы. Выхь тракторьяс миянлы колөны». Аддзис, мый сийөс пыдди оз пуктыны: кывзөны кыз мойдысьөс, да скөрмөсорөн шыөдчис:

— Неужели у вас в министерстве не найдётся *трох* тракторов для нас? Будущих механизаторов села?

Кывзысьяс ставөн быттё ловзисны, пондісны педзны да едзыны, нюмсорөн кутисны бызгыны-сёрнитны өта-мөдныскөд, кытысь Геня нинөм эз кут гөгөрвоны, быттё эз рочөн сэн сёрнитны. Кывзысьөмсыс весиг кольмис юрыс.

— Бур, Геннадий,— бара шыасис ачыс министрыс.— Мун гортад да висьтав ёртьясыды, мый ми эскам налы. А корөмторнытө могмөдам.

Министр кутліс Генялыс кисө. Киыс вөлі вына, му вөдитысьлөн кодь. Небыд кылыс да чорыд киыс казытөдісны батысь: сийө вөлі буретш сэтшөм. А мукөдыс, кодьяс важ моз пукалісны кузь пызан сайын, нюмьялігыр кольөдісны ылі коми сиктса зонкаөс паськыда вөсьөм синьяснаныс. Быдөн, дерт, сэки казытыліс ассыс челядьдырсьө.

А Геня Политовлөн «ходокалөмыс» тайөн эз на помась. Сийө «төдмасис» нөшта на мөд министркөд. Гашкө, видзөддыны татшөм збой зонка вылас көсийөма, а гашкө и, збыль колө вөлөм аскөдыс сёрнитыштны ылі Коми муын школалөн татшөм водзмөстчөм йылысь, но Геняөс мөдөдісны РСФСР-са Просвещение министерствоө. Сэни министрыс виччысьөма нин, пыр жө и корис ас дорас.

— Дзик на вөвлытөмтор тайө миян странаын,— Генякөд төдмасигмоз шуис министр.— Сы вөсна колө ставсө вөчны зэв видзчысьөмөн. Гөгөрвоин? Видзчысьөмөн. А коді нырщикыс? Директор? Тайө бур. Гришин, шуан? Эдуард Александрович? Пасйылам...— ыджыд ныр-вома, ачыс крепыд жө тэчаса, зыр пасьта кабыра министр мыйкө гижис пызанвывса календарө да сувтис.— Ноко петкөдлы, Геннадий, кытөн тэнад сиктыд?— министр вөсьтис занавес, и вөссис стен пасьталаыс ыджда карта. Геня өдйө аддзис страналөн карта вылысь рөм серти торьялысь Коми АССР, сэни и Сыктывкар, а ськөд орччөн и Кослан сикт. Карта вылын найө быттё ляскысьөмаөсь өта-мөдланьыс, а өд на костын матө куимсө верст.

— Шоссе туй?— юалис министр, кор аддзис, мый көрт туй сэтчө оз мун, а кутшөмкө туй век жө визьнитөма.

— Автомашинаөн воөдчыны позьө сөмын төлын,— вочавидзис Геня.— Гожөмын — самолөтөн. А сьөкыд груз — Архангельск карсянь море пыр Мезень карөдз. Сэтысянь — Мезень ю кузя

\* Гольны (диал.) — сёрнитны.

---

квaйтсё сайö килöметр колö катны пароходöн, но сöмын тулыс-нас, кор ойдлас ыджыд ваöдз. А гожöмын — сöмын алькöс пыдöса пыжöн либан\*.

— Да-а, пыдöкодь дзeбсьöмныд, Геннадий,— министр дыркодь на юасис, кыдзи олöны Коми муын йöзыс, кутшöм налöн школаыс и мыйла сувтис татшöм мог — котыртны школаын ассыныс МТС, и кодi чуйдöдiс найöс та вылö, да уна мукöдтор йылысь. А кор Геня висьталiс, мый районса юрсиктын уджалö нейджыд электростанция локомобильсянь да мый югыд бисö сетöны сöмын дас öти час рытöдз, министр малыштлис некымынысь ассыс юрсö, бытгьö сыналыштiс чуньяс пырыс, да шуис:

— Сетам ми тiяны аслыныд электростанция, содгöд сы дорö, мый коринныд,— а кольöдiгас нин кисö топыда кутлиг, эскöдiс:— Регыд, Геннадий, и тiянöдз воасны бур туйяс: кöрт туй и шоссе. Югзяс парманыд, ловзяс.

Тадзи Геня Политов, Кослан школаса велöдчысь, тöдмасис Москваын кык министркöд. И кыкнансö сийö аддзис аслас батыс кодь жö мелiн да гөгөрвоысьöн. А миян Коми парманым öнöдз на ловзысьсö да югзысьсö. Кöрт туйыд тай и збыль воис нин Удораад, а шоссе туйтö панöма жö нин. Гашкö, Геннадий Политовлөн внукьясыс и шылькнитасны коркö асланыс машинаөн Кослансянь Сыктывкарöдз да и водзлань на.

*Помыс локтан номерын.*



---

\* Ли́бны (диал.) — лыбны, вoйдчыны.

Александр ШЕБЫРЕВ



## Эскөд, Енмөй...

КЫВБУРЪЯС

\* \* \*

Вөтүн бергаліс лым...  
Төдса шыладөн сьыліс.  
Менам сьөлөмөй — пым:  
Сійө шыладсө кыліс.  
Восьті синъясөс — дой...  
Лымйыс важөн нин сыліс.  
Өти вой. Өти вой...  
Лымйыс оліс да выліс.

### Эн!

Эн кеж!  
Сэн — шыбөля.  
Сэн — йиа.  
Сэн — лымйөн дзебөм ры...  
Сэн повзьөдчана ты.  
Сэн мутиыслөн поз.  
Оз виччысьны сэн, оз!  
Эн кеж!  
Ме кевмыся.  
Ме кора.  
Ме гусьөн бөрда...  
Нора.  
Ме кирга...  
Кора... Кора...  
Но шөпкөдө мен  
Кодкө:  
«Кеж, эн кеж...  
Но тэнад кывйыд өні  
Нинөм нин  
Оз веж».

## Мөдъяс

Менам кывъясөй нинөм оз шуны.  
Тиян олөмын нинөм оз вежны.  
Олөм-вылөмсө гудравны, пуны...  
Ковмас мөдъяслы. Кодъяс оз кежны...  
Аслас туйвизысь. Асланыс могысь.  
Аслас вужъясысь. Асланыс рөдысь.  
Аслас радлунысь. Асланыс шогысь.  
Кольö — этша... Но — олөмсө төдысь!  
Медым этша... Но абу тай полысь!  
Мед кө этша... Но öзйöны синъяс!  
...Сөмын кыв динө, вуж динө колысь  
Аски доръяс ас гөгöрса инъяс.

## Висьöм

Вушйöм ситеч кодь...\*  
Но синмыс — пыр на биа!  
Сййö — кока на. И — пеля,  
Пыр на — киа.  
Сййö — олө на.  
Став мирыс — синъяс пиас.  
Сййö — колö на:  
Эм — нывъяс. Эмөсь — пияс.  
Мортыс — колана:  
Мед Енмыс шөртсө печкис,  
Сөмын коли на  
Нюр бокын бөръя лэчкыс...  
Коді — октöма!  
Көть сиыс — ділі-долі...  
Мед!  
    Вөлі!  
        Локтöма!  
Тэ сиалин кө — воы...

## Эскөд

Кадыс йөймöма тай...  
    Ньöвйөн вугйö-мунö...\*\*  
Рытыс вошласьö да  
    войөд петö — лунö.  
Öшым\*\*\* люкасьö тай  
    вильён чужан воö.  
Вояс лэбöны —  
    и помыс коркө воö.  
Вояс лэбöны...  
    А помыс, гашкө,— помтöм,

---

\* Вушйöм ситеч кодь (фраз.) — блед, виртöм.

\*\* Вугйö-мунö (фраз.) — öдий.

\*\*\* Öшым — декабр төлысь.

Му выв олөмыс сэн,  
    выліас, дзик ковтөм?  
Мыйла майшасьö тан,  
    гудыр муас, мортыс?  
Гашкө, ловъя ловлөн  
    мөдлаын дзик гортыс?  
Олөм гирстө тэнö  
    пач чышкалан лыскөн.  
Та вöсна и мортöс  
    кодзувланьö кыскö.  
Кык пу костын, йöрын  
    овнытö тай дзескыд.  
Мый сэн вылас, бöрын...  
    Эскөд, Енмөй... Эскөд!

### Важ ёртлы

Бытьö му пырыс мунін!\*

Тэ кодарын валъялан...  
Кöні?  
Вöлін матысса — вунін...  
Тэтöг олөмыс, вөлөмкө,—  
Сөнiк.  
Торъя нинөм оз ков...  
Сөмын бөръяысь аддзывны  
Синтö.  
Сійö висьталас мен  
Тэнсьыд олөмтö-вылөмтö.  
Интö.  
Сійö югнитас мен:  
«Ачыд олөмас-вылөмас  
Сылін!  
Выла ныртö он вен...  
Руа сьөлөмтö омöля  
Кылін.  
Кöні валъяла ме,  
Сэні туй помыс важыслы —  
Пөдса.  
Мед кö вöлін и тэ  
Коркө матысса... Колана...  
Төдса».

### Пановтіс луныс

Рытъя кыаыс дэбаліс...  
Синъяссö вежис.  
Кöчөн йөжгыльтчис, топаліс...  
Войланьö кежис.  
Мача төлысьыс енэжас  
Югöрсö койис.

\* Бытьö му пырыс муніс (фраз.) — воишс.

Эг и төдлы, кыз помасис  
Кодзула войыс.  
Эг и төдлы, кыз асывсө  
Пановтис луныс.  
Юрөс шонділы копыртны  
Кызкө тай вунис.  
Рыгъя кыаыс бара на  
Чечыштас вояс.  
...Тадз и кольёны-шлывгёны  
Лунъяс да войяс.

### Абу өника\*

Ме мөйму бара вөтаси,  
Мый пань тыр ваө көтаси:\*\*  
Ме эзысь комла мөдөдчи,  
А шедіс куим лов.  
Кор изъя косьтыс конъяліс,  
Ме лолөн кылі, донъяліс:  
Тэд куим бөжыс — тырмана,  
И унджыкыс оз ков.  
А вөтын — йирмөг босьтома,  
И табъя сиөс косьтома.  
Но ва туйыс тай гылыд на:  
Сэн помыс оз и во.  
...Кор синкымъясөй воссисны.  
Сэк синва войгъяс косьмисны:  
Юр копыр Петыр-Павеллы,  
Мый өника эг ло!

### Шуліс

Палалей Кале\*\*\* мен шуліс,  
Мый төрытыс — мойд...  
Палалей Кале мен шуліс,  
Мый аскиыс — руа.  
Жалит ловъясө, бордъясө, гөнасө...  
Некор эн дойд.  
Отсав мортыслы... Мед кө да асныра.  
Мед көть и руа.  
Палалей Кале мен шуліс:  
Мед пельясыд — чош...  
Палалей Кале мен шуліс:  
Тэ некор эн ылөд!  
Сөмын лоан кор шаньён —  
Сэк олөмас, гашкө, он вош.  
Сөмын лоан кө... Воан кө...  
Мунан сэк улөд и ылөд.  
Мый оз ков — эн и шу.  
Медым пыдіа мөвпъясыд — чөв...

---

\* Өника — таdzi шудны, кор нинөм оз шед.

\*\* Пань тыр ваө көтасьны (фраз.) — ичөт шогысь йөрмыны.

\*\*\* Палалей Кале — нималана коми философ, «лимитизм» теория лө-сьёдысь Каллистрат Фалалеевич Жаков.

Мича небөглөн шыпаслы  
Синъяснад бурөн эн эскы.  
Ачыл олөмтө пу.  
Наян рөзвальё некор эн сөв...  
...Сомын Ентөгыс, Ентөгыс  
Мортыслы мыйлако дзескыд.

## Шегъясим

Ми ворсім...  
Ми шегъясим сизимөд лун.  
Ас олөмөн.  
Колөмөн.  
Полөмөн.  
Некор оз вун...  
Ме ворсси.  
А кон улас — олөмыс вөлі.  
Ме наридзө,  
йи пластө сөлі...  
да йөткыштчи.  
Шуин тэ: «Мун!  
А көсьян кө —  
Ва пиас сун.  
Тэ шегйөн тай ворссин!  
А, сідзико,— сорсин.  
Мен вермысьыс колө!  
Ме виччысьла.  
Мед сійө волө...»

## Төдлытөг

Гумовтис олөмыс Эжвасьыс васө.  
Пөттөдзыс юис.  
Весь чибльөгыс потис.  
Ньөввужсө зэлөдіс, лыйис тай пасө.  
Зорөдө веськаліс.  
Төдлытөг сотис.  
Яналіс олөмыс: кодарө лыйи?  
Зорөдас, турунас,  
Му шырыс оліс!  
Төдлытөг шырөс ме бырөді, кыйи?  
Енэжлань, кодзувлань  
Лыйнысө коліс!  
Думыштчис олөмыс: кодзулө лыя —  
Мортыслыс олөмсө  
Бырөда, кыя...  
Шырыс мем жаль... Но и мортыс мем колө.  
Зорөдсө вөчас на!  
Выль шыр мед олө.



## Из вылө из\*

РОМАН

### Квайтөд глава

1

Сюрс өкмыссё өкмысдас өтиөд вося декабр квайтөд лунө, вой шөрланыыс нин, өткөн олысыяс Иван Кириллов да Толя Мартынов, кодос сиктсаяс нимтисны «пионерон», пукалісны Федя Зиновьев дорын лякось, важон чышкывтөм пызан сайын да куритчигмоз пөрөдісны-юисны «Агдам» сулея. Неуна гажмыштисны, юр вежөрын мутияс кутисны ворсны.

Кыліс орчча керка дорө матыстчысь «уазик» автомашина шы.

— Депутатыд воис,— Зиновьев кыйкнитліс ывлаө инпөв өшиньса занавес костөд.

— Мөскуваысь, тыдалө. Петыр Вень асывнас карө вөлі мөдөдчө,— нурбыльтіс Толя Мартынов.— Жыруйтө, майбыр нуоны-вайоны дон босыттөг. Мөскуваө кор окота лэбалө, и сьом эм, а миянлы пөкмөлитчөм могысь лоө куш сулея чукөртны.

— Асьныд бөрйинныд,— зумыштчыліс Иван Кириллов да малыштис тасмаа косьыс пуртөссө.

— Ми эг бөрйөй,— өтпырйө артмис кык өртолөн.— Сэки клубас весиг эг ветлөй. Буретш Микол Васылысь нимлунсө пасйим.

— А өні кысь сьомыс сюрас? Тайө өмөй куим мужикыды юантор? Сөмын юр шоммис,— Кириллов чуткис кыз чуньнас куш бутылкаө.

Зиновьев полөмпырысь чөвтліс синсө Иван вылө. Адзыліс сылысь пуртөс малыштөмсө. Крут нөровыс Кирилловлөн.

— Ветлам скөтнөй дворө. Сэні талун Гриш Коль скөтникалө. Сылөн аскурыс сьорсыс,— нуөдіс Кириллов.

Регыд мысти куим том пөрнөй мужичөй сюръяс вылын гежөдик лампочкаясөн югзьөдөм улича кузя сьорсьөн-бөрсьөн мөдөдчисны скөт картаяслань. Водзын восьлаліс Кириллов. Ыджыд, ён тушаа, варгыль кока. Кок лапаяссө шлуп-шлупон пукталө. Кузьмөс чужөмас кызкө тешкодя сатшкысьөма чангыль нырыс. Кыз льөбйыс вөвлөн моз өшйөма, сук, мегыр сяма синкым улын былъсвидзисны тамышон видзөдысь синъяс.

Зиновьев вөтчис Иван бөрся. Федя кузь, вөсньыдик. Интеллигент обичаыс тшөкыда ылөдліс йөзсө, мортыд чайтсис шаньон. Збыльвылас, скөрлун серти сйө нинөмөн эз кольчы Кирилловысь, но асьыс збойджыкъясысь поліс. Медбөрын дженьыд

\* Журнал вариант. Заводитчөмыс тавося 1-4-өд номеръясын.

---

кокъяснас тірликтіс «пионер». Туша-рожанас Мартынов җна кольччис кыксыыс, а этшыс вөлі шогмытөм. Нинөм абусьыс вермис скөрмыны, пуззыны. Та дырйи оз думайт, мый ки улас сюрө, сійөн и вачкө да сутшкө.

Гриш Коль буретш вөлі помалө мөсьяс улысь сит зыртөмсө. Унджык мөскыс куйліс. Кодкө рөмидзтіс, а кодкө нюждөчөма джоджас, юрсө лэдзөмөн узьө.

— Чолөм, Гриш Коль!— пыригмозыс горөдіс Кириллов.— Вай пөкмөлитөд!

— Мыйөн?— Гриш Коль талун эз окотапырысь локтысьясөс паныдав.

— Аскурнад, төрыт на ошйысин: вийөді пө.

— Этшаник шомыс вөлі.

— Мый эм, сійөс и сет,— тшөтш заводитісны дзайгыны Федя да Толя.

Гриш Коль мыйкө көсйис на шуны, но сэсся видзөдіс локтысьяс вылө да өвтыштіс кинас.

— Пырөй шойччан жыръяс, помышта да локта.

Гриш Коль мый вынсьыс заводитіс кытшовтны куйлысь сюраньяслысь радсө. Помаліс, пунктіс зыртчансө пельөсө да пырис шойччан жырйө. Матыстчис мыссян доз дорө. Гоз-мөдысь койыштіс пөсялөм чужөм вылас ыркыд васө да косөдчис чышкөдөн. Сэсся шкапысь перйис пажун новлан сумкасө. Сумкасьыс пыр и тыдовтчис газетысь вөчөм пробкаа литрджынъя сулея. Аскурыс Гриш Кольлөн еджгов рөма, быттьө йлөн соралөма. Перйис шкапысь куим стөкан да колс пунктіс пызан вылө. Шөрыштіс ас пөжалөм көрыш да нетшыштіс пиньнас бумага пробкасө.

— Ак,— долыда кыскыштіс паськыд ныр розяс аскур дуксө.— Крепыд артмис!

Иванлөн голя гарчканыс вөрззыліс, дульваыс петіс.

— Вай кисьтав нин! Терпенньө быри!

Гриш Коль кисьталіс аскурсө стөканъясө. Синсө читкыртөмөн витіс, медем ставлы өтмындаөн лои.

— Босьталөй,— Гриш Коль лэптис ассьыс стөкансө.— Точкам.

Мужикъяс пыр жө гулькнитісны аскурсө. Сэсся ставныс чепөльтісны нянь көрышсө да заводитісны няклявны, быттьө рөмидзтөны.

Кынөмъясын кутіс шоньд гуляйтны, юрө кайис. Лои төдчымөн гажаджык. «Агдам» дорад аскур содтөмыд бура инмис. «Пионерлөн» весиг кывйис кутіс крукасьылыны. Варовмисны, Федя Зиновьев вильыша видзөдіс ёртъяс вылө да нюмьөвтіс.

— Төрыт асыв бригадаса мужикъяс мыйкө пыльсьялөны. Мый, мися, сераланна, а Ваньө Олексан шуө: рыгнас пө сусед пыраліс да серам петкөдіс. Көсьта Иван пө гөтырыслысь портманетсө корө вөлөм.

— А, кывлі, нэмөвөйся басни нин,— вашмуні Гриш Коль.— Нылыс вөлөм оз на узь да кывзысьсө, чайтөма, мый батыс бара мамыслысь сьөмсө пычкө.

— А Көсьта Иваныс мый?— икнитіс «пионер».

— Мый? Сідз, вошйивтөг и узьөма.

— Көсьта Иванлөн аслас шог, миян асланым,— серөктіс Иван Кириллов.— Гриш Коль, вай син пөвсө кисьтав.

Гриш Коль ыззьёма да эз нин мөвпав, мый удж вылын оз позь аскурасьны. Локтигас аскурсө вайис, медым гусьон виддыштавны, но öни, шоммыштитис юрыс да, телепит содгыны. Эз виччысь мөдысь кором, пыр жö стöкангьясö чолькнитис.

— Тэныд пуны,— видзöдлит Иван вылö.

— Юам да тыдовтчас, кодлы пуны.

Мужикгьяс гулькнитисны, чукрасьыштисны да бара чепöльтисны нянь корышсö. Нöшта гажмисны, öтитор казгытыштисны, мөдтор.

— Коймöд час,— друг видзöдлит часи вылö Федя Зиновьев.— Разöдчам, аски удж вылö.

— Та-алун нин,— икнитис «пионер».

— Да, талун. Атгьö, Гриш Коль,— Зиновьев кутчысис öдзöс вугйö.

— Атгьöсьыд платгьö он вур, лоанныд долгаöсь,— куш бутылкасö сумкаас дзедигмоз нурбыльтис Гриш Коль.

— Сочтёмся,— рочыштис Иван Кириллов.

Мужикгьяс петисны картаысь, асмогасисны веськыда туй вылас, жöвьялыштисны. Кирилловлы син улас уси неуна бокин сулалысь сё юр вылö пу карта. Сэтчö чукöртöны став тыра мöсьяссö да сэни вайсьöдöны. Тавой вайсян мöсьяс дорын ноксис том нывбаба, Инна Сажина. Сöмын на верöс сайö петис, олисны гижсьытöг Кöсьта Володькöд. Инна ён туша, позьö шуны, мыгөр серти мужичöйлань муныштö, и кабыргьясыс топыдöсь. Нывлөн ставыс ас местаас. Абу сылөн синмö шыбитчана мичлун, но и мисьтöмөн оз позь шуны. Школа бöрын локтис скöтнöй дворö лысьтысьны да сидз, некытчö ветлытöг, и уджалö.

Вой кежлас сийö картаысь став öдзöссö пытшкөссияныс игнавлö, а талун восьтöма öдзöссö турун сарайыслысь, кодöс стрöйтлöмаöсь дзик карта бердас. Петöма да ывлаысь сарайö турун пыртлö. Сарай дорас воддза луннас вöла турун додь путкыльтлöмаöсь.

Иван Кириллов, кор паныдасьлис Иннакöд сиктса улич вылын, дульвасö ньылыштлит. Окота сылы шамырталыны том нывбабасö, ой, окота! И öни вина гаггьясыс йöткөмөн йöткисны Инна дорö. «Сюри стрöкаыс да тшапнита»— думыштис ас кежысь. Ылысян на горöдис:

— Отсыштам пыртлысьныд!

— Тиянтöг нин кызкө-мыйкө,— кедзөвтана вочаасис Инна.

— О, кутшöм сутшкасьысь!

Кириллов матыстчис, шурк сывйыштис нывсö да заводитис тойлавны сарай пытшлань. Инна гөгөрвоис, мый кöсийö вöчны код юра зонмыс, да повзис, чужöмыс кельдöдис, зилис мынтöдчыны.

Иванлөн аскур юысь друггьясыс гигзисны-сералисны.

Кириллов крепыджыка шашаритчис Инналөн паськөмö, кöсийс окыштны. Вина дукуыс паркнитис, сотыштис нывлысь бандзибсö.

— Видлы, тэныд кажитчас,— нускис сийö.

— Эн сильничайт! Изверг! Караул! А-а-а!

Инна горзис, пыксис кинас Иванлы морöсас да мый вынсьыс тойыштис. Эз эськө нылыс омöлик вöв, но выныс эз тырмы дыр

водзсасыны. Кирилловлөн мырдонавны көсйөмыс воис сы выйөдз, мый асьсө кутны сийө некыз нин эз вермы. Кватитис Иннаос, быттё клешиён топөдис, виччысьтөг конйыштис, водтөдис турун выло и пыр жө вожасис. Инна пессис, горзис, мед кодкө мездас. Но кысь! Вой шөр бөрын скөт карта гөгөр некод бур йөз пиысь оз шөйт.

— Сиптөй сарай өдзөссө!— мурөстис Иван аслас юан другъяслы.— Локтөй кисө кутөй!

«Пионер» котөрөн пөдлалис өдзөссө. А Федя Зиновьев уськөдчис нывлысь кисө кутны. Первой сильничайтис Иван Кириллов. Чеччис, пыркнитис гач вывсьыс өшйөм турун сияссө да довкнитис юрнас куйлысь Инна выло.

— Босьтөй.

Кор мырдоналысьяс лөсьөдчисны петны сарайысь, бөрсяныыс кылис:

— Тайө тиянлы сідз оз коль, тюрмаө мунанныд.

— Мый?!— бергөдчис Иван Кириллов.— Грөзитчан вузавны? Эз өд чин тэысь.

— Ха-ха-ха,— серөктис Зиновьев.— Мөдарө, содис.

— Шыөдча милицияө,— чеччигмоз шуис Инна.

— Милицияө?!— Иван Кириллов шуркнитис-көсис ныв дорө, кватитис косьыс пуртсө да син лапнитигкості мый вынсьыс куимысь сутшкис Инналы морөсас. Первойя сутшкөмыс, тыдалө, веськалөма сьөлөмас. Ныв пыркмуні да ланьтис.

Кириллов бөръяысь видзөдліс куйлысь Инна выло. Чышкис пуртсө нывлы халатас. Кыскис истөг көрөб, чиркнитис. Зіля петис турун видзан сарайысь да пыкис ортсысяныыс өдзөссө.

— Мунам татысь өдйөджык,— тшөктис другъясылы.— И вомтө эн паськөдлөй!

Здук мысти кыпөдчис лөз тшын.

Андрей Игнатов палялис өдзөсө лөкысь клонгөм шыысь. Керка сайын, чеп йылын, мый вынсьыс нетшкысис-увтчис понйыс.

Игнатов звирк чеччыштис крөвать вылысь, уськөдчис өдзөслань.

— Мый лои?!

— Пөжар, Андрей Васильевич! Картаыд сотчө!— лөк горшөн горөдис камөдчысьыс.

Игнатов котөртис телефон дорө. Звөнитис пөжарникъяслы Важтыбокө, районса юрсиктө. Корис өдйөджык мөдөдны кусөдчан машинаяс. Ачыс шур-шар пасьтасис да петис ывлаө.

Синмө пыр жө шыбитчисны карта весьтын лөз тшын кольтаяс. Да абу прөстө тшын, а би сорөн енэжө кайө, весиг бикиньясөн коясьө.

Чукөрмисны йөз. Сиктсаяс, коді мый вермөма да сюрөма, сийөн и уськөдчөмаөсь кусөдчыны. Ведраясөн матысса юкмөсь-ясысь заводитисны кыскавны ва да коявны карта стенмө. Игнатов пыр жө тшөктис вайөдны овмөсса кусөдчан машина. Важся нин, но мыйкө мында көть отсөг сетас пөжарникъяс вөтөдз.

Некымын мужичөй уськөдчисны өдзөсьяс дорө, тракйөмөн зілисны восьтыны. Но өдзөсьяс пытшыяныыс игналөма да, эз

сетчыны. Сарайод пырны картао он вермы. Сэни биыс медьёна ыпгьяло. Гаражысь петкөдісны трактор да троскөн нетшыштисны карта одзөссө. Пытшкас лөз тшын. Кыло сюраньяслөн нора ымзём шы.

Мужичөйяс пырисны ныр-вомсө кепысьяснас тупкөмөн. Оти-яс кватитисны одзөс дорсянныс матысса посни кукьяссө да моздорас петкөдісны ывлао, котөртөдісны орчча картао. Мөдьяс мездисны чепьяссө домысь, кытчө мөсьяссө вөлі пысалөма. Пысыс труба помын и эм. Трубасө мыйөн бергөдан, домасян чепьясыс усьласьоны джоджө. Видлісны вөтлыны ывлао одзөсдорса пемөсьяссө. Сөмын кыкөс вермисны нуодны, а мукөдыс, көть и петалисны, бөр уськөдчисны карта пытшкө.

Кос керьясыд турун сорнад өдйө сотчисны. Сөмын рутшка-ратшка кыло да шиперыс шковгө-луйсьө.

Кор воисны пөжарнөй машинаяс, картаыс дзоньнас нин ыпгьяліс-сотчис. Дугдісны кывны скөтлөн нора ымөстөмьяс.

— Көні дежуритысь дояркаыс?— Игнатов матыстчис бригадир дорө.

— Инна Сажина некөн оз тыдав. Со бать-мамыс тшөтш корсьоны.

— Виисны да өзтісны картасө,— бөрдөмсорөн шуалис Инналөн мамыс.

— Гашкө, кытчөкө петіс? Гортад эз волы? Гашкө, верөс дорас муніс?— юасис Игнатов.

— Эз мун. Сійө войнас уджаланінсө оз эновтлы, дай игнасьөмөн оло. Удж вылас мунігөн пыраліс мянө. Шуис, мый верөсыслы эз тшөкты пывсянсө ломтыны: аски пө ломтам. Виисны, виисны извергьясыд,— сыркьяліс нывлөн мамыс.

Картаыс кушөдз сотчис. Югдөм бөрын воисны туясысьяс. Погонаяс сувтөдісны стөрөжьясөс, а пөжар кусөдысьяс кыс-талісны васө сы мында, мый өткымынлаын сөмын чусалисны сэрапомьяс.

Рыгторувнас нин турун сарай местаысь туясысьяс аддзисны Инна Сажиналысь сотчөм шойсө. Сөвтісны картон көрөбьясө да лэччөдісны карө экспертиза ывло.

Сотчөм карта гөгөрын пируйтисны поньяс. Найө дышиника ветлөдлісны пөжар местаын. Вильөдөмаось-сөйөмаось мөс тущаяссө. Рушкауясыс муртса муөдыс оз кыскасьны. Сы выйөдз горшасьөмаось. Ота-мөд вылас сөмын видзөдласны. Весиг оз эрыштны: ставлы тырмас. Со кымын ыджыд ёкмыль яй туплясьө.

Туясысьяс панісны уголовнөй делө. Сотчөминсө найө гөгөрбок снимайтісны. Сөмын кык лун мысти лэдзисны идравны пемөсьяслысь шойяссө.

Вөрса керөсө, сиктсаян куим верст сайө, экскаваторөн кодйисны гу да сэтчө и заводитисны новлыны. Бөрас муөн поньялісны, медем ошьяс эз перьявны.

Ягдорсаяс шөйөвошины. Татшөм ускөттьөыс, морт виөмөн да скөт карта сотөмөн, тані лои первойысь. Рыгнас сиктсаяс полісны ывлао петны: пемыд, шуштөм.

Лариса матыстчис верөс дорө.

— Шуштөм, ме пола. Вай Бимсө гортө лэдза.

— Мыйла?

— Кодкө кө гусьон пырны мөдас, понйыд кылас да, пальөдас миянөс.

— Ме понда пырт. Сөмын өдвакө талун бура унмовссяс. Этатшөм ускөттё кутшөмкө пеж лов вөчис,— ышловзис Андрей.— Ставыс син водзө локтө. Ловъя вывсьыс сотчөм кывтөм пемөсьясыс. Том нывбабаыс, Иннаыс, кодлы овны да овны на коліс, челядьөс быдтыны, нөбасьё вөлөм. Талунсянь вөлі отпускө мөдөдчө.

— Төда, отпускной сьөмсө ачым арталі. Көсийс карө лэчывны.

— Извергыд кык морт лов босьтіс. Төдам кө эськө, асьным, некутшөм судтөг, майөг йыло пуксьөдам! Сотөм карта водзас и сатшкам майөгсө! Мед видзөдө да аслас пеж ловыскөд прөщайтчө! Мед төдлас мучитчөм көрсө!

— Кор нө шойсө ваясны?

— Аски.

— А кор дзевасны?

— Аскомьсь. Та кузя сёрнитчим бать-мамыскөд.

Иннаөс дзеван луно овмөсса став уджалысьыс колльөдчисны. Нывбабаяс бөрдисны, жалитисны Иннаөс, весиг мужикуловлөн синваыс доршасис.

Шойна вылын унаөн сёрнитисны, корисны корсьны морт виысьсө. Игнатов көсийысис став йөз водзын, мый туясысны. Аддзасны извергсө да чорыда мыждасны.

Шойнаысь петігөн ныр на ныр паныдасис Иван Максимович Петровкөд. Петров эз шыасьлы, юрсө чатөртөмөн шавксьөдіс гулань, кытчө колины на Инналөн бать-мамыс. Игнатов сувтыштліс, көсийс мыйкө шуны, но сөмын киргөм артмис. Гөрдөдіс, өвтыштліс кинас да сөліс аслас «уазикө».

Петров Ягдорса пөжар йылысь ёна водз кывліс. Сотчө на вөлі скөт картаыс, кор төдса морт звөнитіс.

— Депутатыдлөн картаыс сотчө,— кыліс телефон трубкаын.— Мөсьясыскөд!

Петров ас кежас радлыштліс: «Сідз тэныд и колө...» Некидыз эз вермы прөститны Игнатовөс, мый пуксис сы местаө. Райкомас Петров ыждаліс, шыблаліс шыөдчөмъяс, но сэки эз чайт, мый кодкө мөд локтас директоравны. Сійө виччысис, мый райкомса секретар ачыс воас копрасьөмөн сы дорө. Корас, медем оз мун удж вылысь: некоды пө та ыжда овмөссө сетны. Петров ыждадыштас да көсийыс водзө уджавны. Но эз сы ног ло...

Ыкпаш, бордтөм петукыс, Игнатовыс нырсө суйыс. Эз, эз прөстит сійөс таысь и воддза досьесыс. Пөжар бөрти эз көсийы воыны Ягдорө. «Мед кө дзевөны вөвлөм знатной дояркаөс, быд мөслысь вит сюрс литра лысьтысьсөс, вөвлөм комсомолса юрнуөдысьсөс. Көн өні комсомолыс? Регыд весиг нель сюрсыс оз ло, кысь нин витыс. Татшөм олөмнад, кор ставыс мөдарө путкыльтчис? Оз ло!»,— скөраліс сійө. Но бөръя здукас, кор кывліс, мый локтөны гуасыны райисполкомса чинаяс, сөліс «уазикө» да муніс веськыда Ягдорса шойна выло.

Гуасян мөд луно Игнатов пукаліс кантораса жырыын да ноксис кабалаясөн. Отилаысь, мөдлаысь воалөмаөсь, бура уна чукөрмөма. Мычысис секретар.

— Андрей Васильевич, тiян дорö кöсiйö пыравны Одьююсь Габов Савелий Кириллович.

— Мыйкö срочнöй? Менам со мыйта уджыс,— индiс каба-  
лаясөн тырöм пызан вылö.

— Кыдз депутат дорö пö.

— Мед пырас.

Пырис олöма нин дядьö. Шапкасö киас кутöмөн, полiгтыр сувтiс öдзöс дорö.

— Пуксьöй,— индiс улöс вылö Игнатов.— Кутшöм мог суис?

— Андрей Васильевич, менö лесопунктса технорук Пустышев кык тöлысь сайын стращайтiс ружьён. Весиг кöсiйс шковгыны-  
луйны. Плешкö стволнас инмöдлiс.

— Мыйла?

— Йöраöс гусьөн вöли лыйöма. Ме аддзылi да лавкаын вись-  
талi. Сыысь менö кöсiйс мöдарьюгыдас мöдöдны. Ныр-вомö  
вачкис да кык пинь чегис. Со воддзаясыс абу,— дядьöйд жерк-  
нитлiс, петкöдлiс пиньтöм вомсö.

— Милицияö колö шыöдчыны.

— Шыасьлi сэтчö, прокурорлы гижлi, нинöм тöлкыс эз ло.  
Уголовнöй делö пö панны оз позь. Кора тiянöс отсавны. Медым  
вельмöм мортсö кывкутöмö кыскасны. Со тiян ним вылö шыöдчöм  
дасьтi.

Игнатов лыддис шыöдчöмсö. Татшöмторнас сы дорö перво-  
йысь на локтiсны. Шыöдчöмьясыд эськö быдлаысь локтöны, но  
милиция да прокуратура вылö элясьöм эз на воы.

— Гөгөрвои, гижла прокурорлы. Мед выль пöv тэнсьыд шыöд-  
чöмтö виддаласны.

— Атгьö.

— Пока нинöмысь.

Игнатовлөн Россияса депутат серпаса гижöдыд мөрччöма.  
Панöмаöсь вöли уголовнöй делö. А сэсся Пустышевöс кыскисны  
кывкутöмö. Районса суд ружьён шенасьöмысь да ныр-вомö вач-  
кöмысь сылы сетiс куим во условнöя.

Игнатов сэки думыштны эз куж, мыйөн бергöдчас сылы ас-  
лыс прокурорлы гижлöмыд...

## 2

Воис тулыс. Пöжар места, кöть тöвнас пелькöдлiсны, воссис  
да петкöдчис сэрапома колясьясөн. Вылысь казгыштiс шог  
лоөмторсö, парсыштiс бур йöзыслысь ульсалысь на дойсö. А ре-  
гыд кывсис, мый ошгъяс волöмаöсь скötöс гуаланiнö,  
перьялöмаöсь мöс шойяссö.

Игнатов тшöктiс вылысь гуавны, пыдöджык. Кольöм тövся  
ускötтьöйс ёна дойдiс сылысь сьölöмсö. Юрас еджыд пратгъяс  
содiсны, морöс увсö кутiс чабрöддыны.

Пöжар бөрти сiйö пыр жö шыöдчылис республикаса проку-  
ратураö, милицияö. Медым корсясны мыж вöчысьсö. Виччысис  
вочакыв. Сюрс öкмыссё öкмысдас кыкöд вося тövшөр дас си-  
зимöд лунö прокуратурасянь воис письмö.

«В ночь с 6 на 7 декабря 1991 года на животноводческой  
ферме совхоза, расположенном в с. Ягдор, возник пожар. Огнём  
уничтожено здание, оборудование, погибли 73 коровы и 48 телят.

На пожарище был обнаружен труп работницы совхоза Инны Сажиной.

По данному факту следователем СРП РОВД 7 декабря 1991 года было возбуждено уголовное дело по признакам преступления, предусмотренного ст. 99 УК РСФСР.

При судебно-медицинском исследовании трупа Сажиной было обнаружено три ножевых ранения в области груди и установлено, что воздействию огня подвергалось уже мёртвое тело. Погибшая была беременной. После производства первоначальных следственных действий стало очевидно, что имели место умышленное убийство Сажиной и поджог с целью сокрытия совершенного преступления. В связи с этим уголовное дело для дальнейшего расследования было передано следователю следственной части прокуратуры Коми АССР.

26 декабря 1991 года по подозрению в совершении преступлений, предусмотренных ст.ст. 98 ч.2 и 103 УК РСФСР был задержан, а в последствии арестован Иван Кириллов, 1957 года рождения, уроженец села Ягдор.

9 января 1992 года Кириллову предъявлено обвинение по статьям 98 ч. 2, 103 УК РСФСР, в том, что он в ночь с 6 на 7 декабря 1991 года, находясь в состоянии алкогольного опьянения, пришёл на ферму, где на почве ссоры с Сажиной с целью убийства нанес ей три удара ножом в область груди, причинив телесные повреждения, от которых она скончалась на месте. С целью сокрытия убийства Кириллов совершил поджог фермы. Расследование по делу продолжается».

Со кодї извергыс вöлöма! Ягдорсаяс шызисны, эз на удитны сёрниясыс лөнныштны, воис выль юör: Кирилловöс пö бөр вöля выlö лэдзöмаöсь. Туясысыс абу вермöмаöсь эскöдны судсö, мый зонмыс мыжа.

Та бöрын Кирилловöс позьö вöлі аддзыны сельпоса вина вузаян лавка дорысь либö столовöй боковысь, кöни быд рыт юктасисны вина-водкаöн. «Кысь сьöмыс тöкаритнысö?— шензисны йöз.— Мамыслысь, тыдалö, пычкö».

А Кöсьта Володь инас эз öшыы. Кириллов выlö, кодї лёка смекайтчис да орöдїс олöмсö муса гöтырыслысь, чужтöм на кагукыслысь, сы пытшкын кыптїс кок йылысь уськöдан лöглун, гудрöдїс вежöрсö. Öти рытö гортдорса чипасысь перйис вöснныдик, киöн чабыртмön кыз пес чурка. Гоз-мöдысь лэптыштліс сійöс да бөр пуктїс. Босьтїс орччасö, кодлön чурвидзисны ёсь пома увъяс. Черön лöсьöдыштїс öтар помсö, медым бурджыка поэяс кватитны, да артмöм паличсö дзебис куртка пöла улас.

Кöсьта Володь бөр-водз пыралїс гортас.

— Мам,— шуис сійö ичöt пач дорын пражитчысь мамыслы.— Ме суседъясö петала.

— Эн дыр, регыд ужнайтам,— кыліс öдзöс пöдлалїгmoz нин.

Кöсьта Володь веськöдчис сельпо столовöйлань. Зон сайöдчис керка мыш сайö, кыгчö сюръяйывса лампочка югöрыс эз инмы да кутїс кыйöдны гежöдик петысь-пырысыс бöрся. Сійö виччысис, кор Кириллов петас кабагысь. Мый немортыс сэні, Володь тöдїс тшукысь. Коли минут дас, гашкö, унджык. Дзуркнитїс винаöн юктасян керкалön öдзöсыс, мыччысис Иван Кириллов. Шатлалїгтырйи, гач кизьяссö разигmoz, воськовтїс

сайөдінө, веськыда Косьта Володьлань. Чиркнитіс истөг тув, здук жежлө югзьөдліс важөн бритчывтөм чужөмсө, өшөдчөм льөбсө, көні чурвидзис чигарка пом.

Өні Косьта Володь эз нин катлась, сы син водзын вөлі неморт, код дорө некутшөм жальлун оз вермы лоны! Колян кө ловйөн, мөдысь нөшта на лектор вермас вөчны. Тайө кын сьөлөма мортсө колө быть сувтөдны! Вачкыны сідз, медем пыр жө чермунас, здукөн пагалас! Мед сөмын пемыдас оз ылав, мед сөмын местаө веськалас!

Косьта Володь кутыштис лов шысө, зэвтчис, и мыйөн сөмын истөг тувйис кусі, мый вынсьыс вачкис увья паличнас Кирилловлы баябөжас. Немортыс ружөгтіс, шатовтіс да бытгьө коксө черөн керыштисны, шняпкысис-уси эжа вылө, киргыштис, сэсса ланьтіс.

— На тэныд, гадина!— пинь пырыс сөдзөдіс Косьта Володь да воськовтіс гортланьыс. Гортас сійө восьтіс пач вомсө да шыбитіс паличсө ыпьялысь биө.

Мөд асылө адзисны Иван Кирилловлысь шойсө. Милицияса участкөвөй, кодөс первойөн чукөстісны, видзөдліс шой вылө да сөмын юрнас довкйөдлыштис. Заводитчис туясьөм, но виысьсө, тыдалө, корсисны мода вылас. Косьта Володь дорө некод эз волы.

## Сизимөд глава

### 1

РСФСР-са народнөй депутатгьяс чукөртчылісны дасысь. Медводза адзысьлігөн кө Ельцин да депутатгьяс костын йитөдыс вөлі лючки, то кымын водзө муніс кадыс, сымын торьялөмыс ыдждіс-содіс.

Витөд съезд дырйи на, ГКЧП-са членгьясөс кутузкаө йөртөм бөрын, унджык депутатгис сулалісны Ельцин дор. Найө эскисны сылы да сетісны кад жежлө ыджыд, сарлы мында полномочие-позянлун.

Но Ельцин-Гайдарлөн, сідз шусяна, шокөвөй реформаяс уналысь восьтісны синсө. Зэв ясыда тыдовтчис, кодарө Россия искөвтө. А сійө искөвтө Гайдарөн лөсьбөдөм рынок экономика рыө. Мездысьны да петны тайө налькйысь лө вывті сьөкыд.

Гайдар да Ельцин сюрс өкмыссө өкмысдас кыкөд вося төвшөрын «лэдзисны» странаын донгьяссө пөшти став төвар вылас.

Лавка кутысьяс төварлөн важ дон дорө содталісны нульяс. Йөзлөн сингьясыс тайөс адзөм бөрын лөлі көш пасьта. А во помөдз төварлөн донгьяс кыптисны нөшта өна. Сідз, чипан кольк вылө доныс кыптис 1900 прөцент вылө, майтөг — 3100, нянь — 4300, йөв — 4800 прөцент вылө.

Но та дырйи банкын сьөм кутысьяслөн прөцентгис коли важыс. Йөзлысь нэм чөж чукөртөм сьөмсө өти здукөн ньылыштис инфляция. Удждон эз сод, совхозса директорлөн төлысьяс удждон вылө шедіс сөмын көмкот гоз.

Овмөсгьяс заводитісны мынтысьны сійөн, мый асьныс вөчисны-лэдзисны.

— То бревном, то говном,— рочыштлісны шмонь радей-тысьяс.

Ельцинлысь да Гайдарлысь, сідз шусяна, «шоковой терапия-сё» унаон эз вермыны терпитны, мунісны таладор оломысь. Странанын содісны оланінтом да уджтомалысь йоз, корысьяс. Сиктсаяс заводитісны ньобавны пызь, мед няньсё гортаныс пöжавны. Тадзи сувтіс донтөмджык. Сикт-грездын бөр босьтчисны видзны кöзаясöс да мөсьясöс.

Страна пытшкын вöчан валөвой прöдукт кутіс зэв öдйö чинны, дас-кызь прöчентöдз быд во. И кызьöд нэм помын Россия, коді Совет власьт дырйи вöлі вынйöра государствоон, пöри коймод сорта голь странаö.

Пöрысьясöс дорйöм кузя выль правительство эз корсь неку-тшöм петан туй. Олома йоз грöш мында пенсияон колины дзик ас кежысь.

Борис Ельцин гөгөр бергалісны суйöрсайса советникъяс. Бурбулис, Чубайс, Немцов коддьöм сизьдісны морöсас, эскöдісны, мый найö демократъяс, Россиясö нуöдöны-вайöдöны рынокö.

Рынокö пыригөн ёна усис шайтлөн ньобасян доныс. Горбачёв дырйи на öти шайтлөн доныс вöлі долларкөд öткодь. Но сюрс öкмыссё öкмысдас кыкөд во помын öти долларысь корисны нин 415 чöлкөвой. А Ельцин сарство помын öти доллар сулаліс 28000 важ, нульяссö киритгöдз, шайт.

Йöзөн гөгөрвотөм вежсьöмъяс, кодъясöс нуöдіс Ельцин-Гайдарлөн правительство, содісны налы паныд сулалысьяслысь лыдсö. Медвойдөр паныд муніс Верховной Совет да народной депутатъяслөн съезд. На дор жö катовтчис вице-президент Александр Руцкой.

Игнатов, коді водзын вель ёна эскыліс Ельцинлы, эз ло сы дор. Гөлөсуйтліс коммунистъяс либö аграрникъяс вöсна.

Сюрс öкмыссё öкмысдас кыкөд вося октябр помын Игнатовлы воис «Российское единство» депутатской фракцияысь письмö. Тайö письмөас бура нин тыдовтчö власьт костын ёсьмөм тышыс. Со сійö.

*«Пыгди пуктана Андрей Васильевич!*

*Тавося декабрь öтикөд лунö Москваын заводитас уджавны народной депутатъяслөн сизимөд съезд. Сылөн удж сайын Россияса йöзлөн оломыс.*

*Ми ногөн страналөн киссьöмыс воис сэтчөгз, мый öнйя режимлөн көсйысьöмъясыс нинөм гон оз сулавны. Экономической да политической кризис шамыртіс быд сикт, быд кар. Йöз воисны корысьясөгз. Тайö Россиялөн национальной трагедия.*

*«Российское единство» депутатъяслөн фракция съезд вылын көсйö видлавны президентлысь да правительстволысь уджсö.*

*Ми төдам тйянысь патриотической видзöдласьястö, когыяс тыдовтчисны квайтөд съезд вылын. Ми корам нуöдны асланыд регионса депутатъяс пöвстын удж, медым съезд вылын позис кокныгджыка öткывъясьны.*

*Медым дорйыны ассьыным видзöдлас, колö водзвыв төдны, мый думайтöны тйян регионса депутатъяс татшөм юалөмъяс кузя:*

— *Б.Н.Ельцинöс Россияса Конституция торкаломысь президент удж вылысь вештөм.*

— *Бырöдны президент чин.*

— *Либö чинтыны президентлысь полномочияссö, босьтны сылысь правительствоö чина йöзöс индöм кузя право да сетны тайö правосö Верховной Сöветлы. Та вöсна пыртны Конституцияö вежсьöмъяс.*

— *Выль пöв бöрйыны Верховной Сöвет.*

*Тi кө öткывъясянныд мянкöд, корам юöртны. Ми кутам лача водзö вылö öтлаын ужжавны тайö гудыр кагас, медым горйыны странанымöс дзикöдз кисьтöмысь».*

Игнатов тöдiс депутатъяслысь видзöдлассö. Войвывсаяс мунiсны первойсянныс Ельцин дор и видзöдлассö эз вежны, Револьт Пименов кувсис. Но век жö öткымынлөн думыс вежсис. И öнi йöзөн бöрйöмаяс пиысь унджыкыс эз эскыны Ельцинлы.

Но и асьныс найö, кыз депутатъяс, эз көлавны бур слаvasö, содтöд шызьöдiсны и сiдз нин шызьöм йöзсö. Вöрзьöдiсны олöмыслысь тшупöд. Чуйдiсны вуджны йöзöс öти кадколастсянь мöдö. Та дырйи эз тырвийö гөгöрвоны, кутшöм рыö йöткыштiсны странасö. А öнi со асьнысö, шызьöдысьяссö, повзьöдлö аскиа луныс. Окота бөр бергöдчыны кольöм кадас, көнi ставыс вöли гөгöрвоана, көнi эз ков повны, мый аски морт вермас кольны некоды ковтöмөн.

## 2

Москваö Игнатов воис көсйöмөн, мый удайтчас пуктыны Ельцинöс ас местаö, пыртны вежсьöмъяс оланпас балаясö да на подулын страна вежас ассыс муна туйвизьсö.

Сюрс öкмыссö öкмысдас кыкöд вося декабрь öтикöд лунö съезд заводитiс ассыс уджсö. Тайö пöрийö зыктöг. Водзвылас ёна лои венласьöмыс да, тыдалö, йöз мудзисны. Сёрнитан бала вынсьöдöм бöрын артмис кост. Сэсся кыв босьтiс президент Ельцин. Депутатъяс сылысь сёрнисö кывзiсны көдзыдпырысь.

Сы бöрын трибуна сайö петiс Руслан Хасбулатов. Аслас сёрниын сийö тöдчöдiс, мыйөн торъялöны депутатъяслөн да президентлөн видзöдласьясыс. Депутатъяс вöзйисны лöсьöдны сэтшöм рынок, медым сийö вöли йöз дорö социальнöя матын. А президент дор сулалысьяс öтарö долисны: страналысь став овмöссö пö колö сетны öтка киö, мыджсьыны капиталистъяс да помещикъяс вылö. Та дырйи йöз корöм вылö эз видзöдны.

Хасбулатовлысь сёрнисö паныдалiсны бура, унаысь клопайтiсны. Тайö съезд вылын Хасбулатов петкöдчис мöд боксянь. Öткымын депутатлөн мөвпъяс, мый Ельцин да Хасбулатов ас костаныс сёрнитчöмаось, медым ылöдлыны йöзөн бöрйöмаясöс, эз збыльмыны.

Хасбулатовöс пыдди пуктöмыс, сылөн кывйыс депутатъяс пöвстын эз нин вöв вензыны позьтöмөн, но сэкся политической кадö Ельцинлы паныд мунысьяс пöвстын эз вöв сэтшöм мортыс, кодi эськö вермис ас дорас ставнысö öтувтны. Сöмын та вöсна унджык депутатыс и öтувтчисны Хасбулатов гөгөр.

Сёрнитiс Конституционной судса председатель В.Зорькин. Сийö эз ошкы кык власьт — парламент да президент костын зыксö.

Мöд луннас трибуна вылö кайис правительствоса Председа-

тельлысь удж вöчысь Е.Гайдар. Сийö норасис, мый Верховной Совет оз вынсьöд правительствоон вöзийом бюджет. Суйö содтöд 1300 млрд. шайт рöскод. Сы серти, тайö пö оз лöсяв рыноклы, рынокын абу местаыс социализмлы.

Ельцин кутис лача, мый Гайдар вермас воны депутатъяскöд öти кывйö, но артмис дзик мöдарö. Сийö жö лунö Б.Ельцин паныдасьлис регионса юрнуöдысьяскöд, корис, медем найö сувтисны Егор Гайдарöс правительствоса Председательö бöрйигөн сы дор. Медся яра Гайдарöс дорйис Ю.Лужков, но депутатъяс Гайдар дор сулалысьясöс эз кывзыны.

Съезд сетис позянлун Верховной Советлы вынсьöдны правительстволысь лыдсö да министръясöс. Кор колö, вермис мездыны уджысь. Правительствоса председательöс кутас индыны съезд.

Конституцияö унджык вежсьöмсö, кодöс вöзийис президент, съезд эз вынсьöд. Президентлысь уджсö лои шуöма странаса кызвын йöзыслы лöсявтöмөн.

Рытнас, декабр коймöд лунö, депутатъяс дыр катласисны, кызди гөлöсуйтны Конституцияö вежсьöмъяс пыртöм кузя, кодъя инмисны министръяс советлы. Унджык депутатыс корисны гөлöсуйтны гусьөн. Президент дор сулалысьяс, на лыдын Якунин, Шахрай, Варов, көсийсны гөлöсуйтны вöсьсөн. Пинясигөн воисны тышö. Сэки Хасбулатов первойысь воштис депутатъяс вылын ыджыдлунсö.

Фоторепортёръяс да телеоператоръяс тышкасьöмсö öдйö снймайтисны. Тайö снимокъяссö сэсся пыр жö петкöдлисны телевизор пыр.

Та бöрын депутатъяс чорыда шуисны гөлöсуйтны гусьөн.

Бюллетеньяс дасьтйгкості сёрнитис Конституционной комиссия секретар О.Румянцев. Сийö эскöдис, мый квайтöд Съездлөн выль Конституция лöсьöдöм кузя шуом кызвыннас пöртöма олöмö. Комиссия вöзийö сюрс öкмыссё öкмысдас коймöд вося март öтиöд лунöдз видлавны баласö регионъяслы. А сы бöрын нин петны странаса референдум вылö.

Некымын лун съезд видлалис вежсьöмъяс, кодъясöс колис пыртны öнйя Конституцияö. Сё кызь öтиöд статьяö вöли вöзийöма содтöд, мый президент оз вермы бырöдны Парламент да власьтысь мукöд бöрйöм органъяс. Вöзийом вежсьöмас тöдчöдöма, мый лоö кө тайö, президентлөн полномочиеяс дугöдсьöны дзик пыр. Но вöзийöмыс чукöртис сöмын 648 гөлöс, а колис 692. Депутат Плотников корис бергöдчыны тайö вöзийом дорас выльысь. Но сэж жö Шумейко сувтис паныд, сы дор лои и Руслан Хасбулатов.

Тайö пöрийö Ельцин корсис депутатъяскöд öткывъясьöм. Гайдар пыдди Правительствоö вöзийис Виктор Черномырдинöс. Депутатъяс сылысь вöзийöмсö вынсьöдисны, но колины президентлы паныд сулалысьясөн.

Ельцин нимтис депутатъяслысь уджаланногсö «ползучий переворотөн», а асьнысö вөрөгъясөн. Сюрс öкмыссё öкмысдас коймöд вося март кызьöд лунö президент лэдзис «Об особом порядке управления до преодоления кризиса» Указ, апрель 25 лунö индис нуöдны референдум.

Март 22 лунö Конституционной суд шуис президентлысь Указсö да такöд йитöдын став вöчöмторсö Конституция торкалöмөн.

Март 26 лунö депутатъяслөн öкмысöд съезд вермис эськö президентöс вештыны власьт бердысь Конституционнöй суд шуöм серти, но бара президент да Парламент костын лои регыдъя кад кежлö сёрнитчöм. Президент öтдортчис аслас указысь да йöз дорö шыöдчöмысь. А съезд шуис нуöдны референдум сийö жö онас апрель 25 лунö. Петкöдны татшöм юалöмъяс:

1. Эсканныд-ö тi асланыд президент Б.Ельцинлы?
2. Ошканныд-ö тi президентлысь да Правительствоолысь социально-экономическöй политикасö сюрс öкмыссё öкмысдас кыкöд восянь?
3. Лыддянныд-ö тi коланаөн кадысь водз бöрйины президентöс?
4. Лыддянныд-ö тi коланаөн кадысь водз бöрйины депутатъясöс?

Став бöрйысьысь Россиян лыддыссис 107,8 млн. морт. Гөлöсуйтны волисны 69 млн., либö 64 прöчентыс. На пиысь эскöны президентлы 40 млн. морт (58,7 прöцент). Сылысь политикасö ошкöны 36 млн. морт (53 прöчентыс). Бөръя кык юалöмыс эз чукöрт колана мында гөлöс.

Ельцин тайö референдумлысь кывкöртöдсö лыддис аслас вермöмөн. А видзöдлыны кö пыдисяньджык, то некутшöм вермöм эз вöв. Öд унаөн, матö 39 млн. морт, эз волены бöрйисянинъясö. 107,8 млн. бöрйысьысьысь сöмын нелямыныс ошкисны президентлысь туйвизьсö.

Но та выlö видзöдтöг, президент да сылы отсасысьяс заводитисны дасытысьны, медым вöтлыны мустöм депутатъясöс.

Сюрс öкмыссё öкмысдас коймöд волөн арся сынöдын кылис нин вежсьöмъяслөн матыстчöмыс. Сентябрь 1 лунö Ельцин мездiс Руцкойöс вице-президент уджысь.

Сентябр 18 лунö став Россия пасьталаысь чукöртчöм депутатъяс шыöдчисны йöз дорö, медым дорйыны Конституция, вöзйисны бöрйины выль президентöс да депутатъясöс.

Сентябр 21 лунö, рытнас, телевизор пыр Ельцин выльысь шыöдчис йöз дорö. Сийö шуис, мый кырымалис 1400 номера Указ, кöни шуöма бырöдны Верховнöй Сöвет да Съезд, сы вöсна, мый найö пöртисны ассыныс медшöр могсö да эз лоны öнiя олöмлы лöсяланаөн. Висьталiс: декабр 11–12 лунö выль Конституция серти лöоны бöрйысьöмъяс Государственнöй Думаö.

Сийö жö лунö Верховнöй Сöвет лыддис президентлысь уджсö Конституциялы лöсявтöмөн. А Конституционнöй суд вöчис кывкöртöд, мый Ельцин торкис медшöр оланпасысь уна статья, да тайö сетö позянлун вештыны сийöс удж вылысь.

Пыр жö, Конституционнöй суд шуöм бöрын, Верховнöй Сöвет вынсьöдiс президент Б.Ельцинлысь полномочиеяс киритöм йылысь постановление да президентлысь удж вöчысьөн индiс Руцкойöс, кодi вой шöр бöрын нин сетiс присяга.

Ельцин эз и думайт кывзыны Верховнöй Сöветöс. Сийö тшöктiс автоматъяса йöзлы босьтны кытшö Верховнöй Сöветлысь керкаяс, кöни вöли налөн уна служба. Сувтöдалис милициялысь постъяс. Кутiсны кыйöдны керкаö пырысь-петысь депутатъяс

бörся. Россияса став депутатсылысь, кодъяс эз вöвны Ельцин дор, дугöдiсны дон босыттöг да чередтöг телепон пыр сёрни. Дон босыттöг жö эз кутны сетны машина да самолётъясын местаяс.

Талы воча Руцкой тшöктiс разöдны öружие налы, кодъяс локтiсны дорйыны Верховнöй Сöветöс.

Игнатовлы воис телеграмма: Верховнöй Сöветса председатель кад воштытöг корö дасöд чрезвычайнöй съезд вылö, сийö заводитас уджавны сентябр 23 лунö.

— Эн мун, аддзан телевизорсыд, мый вöчсьö,— öлöдiсны тöдсаяс.

— Кыдзи ог мун? Корöны, сiдзкö, колö мунны!

Сöлис овмöсса «уазикö» да лэччис карö.

— Звönитла, кор эштас. Волан,— торйöдчигас шуис шоперлы.

Аэропортын депутатскöй жыр вöли игана. Игнатовöс сэтчö эз лэдзны. Ковмис кассаысь ньöбны билет да сувтны регистрация вылö.

Москваын та пöрйö некод эз вочаав. Верховнöй Сöветса керка дорöдз воöдчис карса автобусöн. Кремлёвскöй дворечö, көнi водзын муналiс съездыс, туйыс вöли пöдса. Ельцин индöд серти сэтчö лэдзисны сöмын сы дор сулалысьясöс, а паныд мунысьяссö пыранiнсянныс косöдлiсны.

Верховнöй Сöвет керка öдзöс дорын сулалiсны автомата чеченечьяс. Найö видзöдлiсны Игнатовлысь депутатлысь эскöдан пассö да вежавидзöмөн вешйыштiсны, лэдзисны пырны.

Пыр жö воссис заседание. Кызвын депутатыс пукалiсны залын. Эз вöвны сöмын Ельцин дор мунысьяс.

Съездсö нуöдiс Р.И.Хасбулатов, сёрнитiсны унаөн. Сынöдас öвтис порок дукөн, и тайöс ставөн гөгөрвоисны.

Быд юалём кузя гөлөсуйтiсны ки лэптöмөн. Электроннöй система эз уджав, би вöли кусöдöма. Керка пытшсö югзьöдiсны торъя генератор отсөгөн. А регыд мысти Ельцин дугöдiс сетны и ва.

— Мый вöчны? Танi, Москваын, ставыс петкöдлö, мый Верховнöй Сöветлөн помыс тыдалö нин. Хасбулатов омöлик юрнуöдысь. Сылы оз тырмы повтöмлун. Да и кадсö лои воштöма. Йöзлы эз ло сетöма выль, Ельцинысь торъялана олан визь,— шуасис ёртъяс пöвстын Игнатов.

— Колö водзö тышкасьны узурпаторлы паныд!— чорыда крапкис депутат Шахова.— Ме лоа танi помöдз!

А кодсюрö öткывъясисны Игнатовкöд:

— Да, Хасбулатов и ми ськöд тшöтш вермам ворссьыны. Миянөн лöсьöдлём став панасыс тупкысяс, а кутшöм надея вöли бурмöдны йöзыслысь öлөмсö!

Рытнас тöдысь йöз öлöдiсны, мый петасны кө Верховнöй Сöвет керкаысь, бöрсö татчö оз веськавны. Тадзи вöчны тшöктöма Ельцин. Та вöсна вой кежлö унаөн кольчисны заседание нуöдан жырйö. Öтлалiсны улöсьяс да сэтчö и водалiсны. Кодлы тырмис, юисны чай да кофе. Буфетын прамöй сёян-юан эз вöв.

Мöд луннас Игнатов съезд вылö волысь унджык депутаткöд öтвылысь сöлис автобусö, кодi мунис аэропортö.

Сыктывкарын овмöсса «уазик» эз тыдав. Шоперлы, көть и звönитлiс, абу и висьталöмаöсь, мый локтö гортö. Ковмис узыны

төдсаяс ордын. Асывнас выльысь звөнитчис, корис машинасо да вöлисти воодчис Ягдорö.

Борис Ельцинлөн государственной переворот помасис сюрс öкмыссё öкмысдас коймод вося октябр нельод лунö, кор танкъясысь лыйлісны Россияса парламент кузя. Став чина войтырлы Ельцин тшöктіс увтыртны депутатъясöс, кодъяс мунісны сылы паныд, вöтлавны найöс удж вылысь.

Сэки, сідз шусяна «демократической пресса» гижис: мунö пö ёсь тыш «демократъяс» да «гöрдov-мугов» рöмаяс костын. Страна са унджык йöзыс «нбылалісны» татшöм ылöдлöмсö, эскисны больгöмыслы. Сöмын уна во кольöм бöрын йöз казялісны, мый буретш сюрс öкмыссё öкмысдас коймод вося сентябр-октябр төлысьясö вöлі пуктöма Россияын демократической вежсьöмъяслы пом.

Медым вермыны Ельцинлы воча мунысьясöс, власьт тырвыйö вöдитчис административной, силövöй да пропагандитской машинаөн. Лои пыртöма странаö олигархической веськөдлöм. Та могысь вöлі тупкöма Ельцинлы паныд сулалысь газетъяс. Сюрс öкмыссё öкмысдас коймод воын первойысь панісны удж, сідз шусяна, «системной оппозициякөд». Такöд йитöдын йöзлы вöзйисны Жириновский юрнуодом улын ЛДПР, КПРФ, Россияса коммунистъяс, «Яблоко» — социал-демократъяс. Виль Госдумаö бöрйысьöмсянь ставыс вöчсис сы ради, медым тэчны-лөсьöдны сэтшöм «демократия», кодөн позис кокниа веськөдлыны Кремльсянь.

А прöстöй йöзсö первойя лунсяныс власьт зіліс юсьöдны. Том мортöс ичötсянь велöдісны даръясьны, и не сöмын вина-водкаөн, но быдсяма сорасъяснас, код бөрти найö кадысь водз энvтлісны таладор югыдсö. Уналы школа пыдди лои вöзйöма кабак да улич выв. Культура пыдди телевизор пыр петкөдлісны йöзöс бөбйөдлан кинояс. Быдмисны челядь, кодъяс эз тырвыйö төдны страналысь историясö. Грамотатöм да код юра морт оз кут нырчыны политикаö, а тайö власьт кутысьяслы кивыв.

Төлка политик оз ов төрытъя лунөн. Төлка политик оз ов и öнiя лунөн. Ставлы, кодъяс босьтісны йöзсянь морт вылын власьт, быд воськов колö вöлі вöчны пыдісянь мөвпыштöмөн, мый эськө ковмас аски, и мый тайö вöчöмторйыс сетас йöзыслы. Но та пöрйö депутатъяслөн, кызд политикъяслөн, уджыс артмис пыдісянь думышттöг.

Шулöны тай: кутшöм рок пö пуан, сэтшöмös и сёян. Йöзөн бöрйöмаяс тайö шусьөгсö асланыс уджын эз кутны төд вылын. Эз эськө лёк олөм вöсна ныртчыны, эз. Ставныс, коді лои депутатөн, сетісны кыв, мый кутасны уджавны йöзлысь олөм бурмөдөм ради. А мый артмис? Странаын муртса гражданской война эз пансы!

Медыджыд лекторйөн лои власьт бердö Ельцинös вайөдөм. Унаөн ас кадö эз казявны сылысь сямсö. Төлктөм, лёк морт вөлöма. Босьтіс ас киас власьт да веськөдіс сійös страналысь экономика пазөдөм-жугөдөм вылө, Сöветской Союзös кисьтөм вылө. Та дырйи тшöкыда кодаліс, а гажа юрнад веськөдлігөн весиг ичөтик колхоз кисьсö. А тані сы ыджада страна!

Быд заседание костын йöзөн бöрйöмаяс мунлісны Москваысь чукөртөм йöзлөн кытш пövстөд. Йöз горзісны, янөдісны, депу-

татгъяс кӧ гӧлӧсуйтисны Ельцинлы паныд. Кекӧначасисны — сув-  
тисны кӧ сы дор. Сёрӧнджык тӧдмалисны: чукӧртчӧм йӧзыс гор-  
зисны да кекӧначасисны эз весьшӧрӧ, а сьӧм вылӧ. А веськӧд-  
лисны тайӧ «спектакльнас» суйӧрсайса медалӧм войтыр.

Му вежандырайи, сюрс ӧкмыссӧ ӧкмысдасӧд воясӧ, Россияын  
пуксис рӧзбой сяма, лӧк кад. Лыйсисны, виалисны, мырддялисны  
эмбур. Сэки Ягдорын уна мужичӧй помалис ассыс олӧмсӧ не-  
мортнога. Федя Зиновьевлысь юр чашкасӧ жугӧдисны пес пла-  
каӧн, виысьсӧ эз аддзыны. «Пионерӧс», вина юан другыслы  
пуртӧн сьӧлӧмас сутшкӧмысь, дас во кезлӧ нуисны Воркута-  
бердса зона вылӧ.

Инна Сажиналӧн мамыс эновтис таладорсӧ. Туясысьяссянь эз  
волы некутшӧм юӧр, кодӧ виис Иннаӧс. Сӧмын батыс дыр на  
олис, думнас вичысис, мый мӧдарьюгыдас мунтӧдз тӧдмалас  
извергсӧ, кодӧ орӧдис ӧтка нылыслысь да чужтӧм на кагукыслысь  
олӧмсӧ. Кӧсьта Володь некодлы эз висьтавлы, кыдзи увъя па-  
личӧн чергӧдис Иван Кирилловӧс.

Игнатов эз вермы пӧртны олӧмӧ Инналӧн баты-мам водзын  
ассыс кӧсйысьӧмсӧ. Андрей воштис депутат чинсӧ, да сылысь  
норасьӧмгъяссӧ прокуратура пыдди эз кут пуктыны. А кор паны-  
дасьлис мукӧд овмӧсса директорьяскӧд либӧ райисполкомса чи-  
наяскӧд, найӧ зилисны ӧдйӧджык вешйыны Игнатов дорысь,  
быттӧ полисны вуджан висьӧм кӧвъясьӧмысь.

А Иван писӧ, кодӧ помалӧ вӧли службасӧ Мурманск кар-  
бердса гарнизонын, гашкӧ, теш ради, гашкӧ, эз, кутисны нимтыны  
вӧрӧг пиӧн.

*Воззӧ лоӧ на.*





Николай ФРОЛОВ

## Парма ловъя\*

ДРАМА. КЫВБУРА ВОРСАНТОР

ДРАМАЫН ОЛӦНЫ:

**ЯРАШ** — Пармаса том морт, кыйсьысь.

**САНДРА** — Ярашлӧн невеста.

**ШЫПИЧА** — прологын рӧзбойничайтан йӧзлӧн атаман, сы бӧрын лоӧма Парма муын купечӧн-промышленникӧн. Йӧз костын сійӧс лыддӧны тунӧн да нимтӧны Шыпичаӧн.

**ДӦРӦШ** — Ярашлӧн томджык друг.

**ЛЮК** — Сандралӧн томджык пӧдруга.

**ВАСЬКА ЙӦРШ** — Шыпичалӧн друг да отсӧг.

**ПАРМА ЙӦЗ**, на костын **ЁГОР**, **ТОМ КЫЙСЬЫСЬЯС**, **ПӦРЫСЬ ЙӦЗ**.

**ПЕТЫР** — вӧльнӧй йӧзлӧн нырщик.

**ВӦЛЬНӧЙ ЙӦЗ**, на костын **ШАРАФ** да **КОДДЗЫШТӦМ МОРТ**.

**ШЫПИЧАЛӦН ГӦСЬТЪЯС**, на костын **ПОП**.

**ШЫПИЧАЛӦН ПРИКАЗЧИК**.

**ХАНЛӦН КАРАВАН**: лунвыв муса озыр хан, сылӧн охрана да носильщикъяс.

## НЁЛЬӦД ЮКӦН

Шыпича ордын чукӧртчӧмаӧсь гӧсьтъяс. Сылӧн чужан лун.

**ГӦСЬТЪЯС** (сувтӧны, лӧптӧны бокалъяс).

Шуд, шуд, шуд!

Ми сиам тэныд ыджыд шуд!

(Юӧны да пуксьӧны.)

---

\* Пом. Заводитчӧмыс апрель тӧлысья номерын. Гижӧдсӧ сетӧма Николай Адрианович Фроловлы 110 во тыригкежлӧ. Паськыдджыка автор да гижӧд йывсьыс лыддӧй сэтъяс.

---

**ШЫПИЧА** (*выльысь кисьталӧ*).

Вай юӧй, юӧй, дона гӧсьтъяс,  
Ме вина омӧльӧс ог кисьт.  
Кор сьӧлӧм вӧлі томджык, пӧсь на,  
Кор синва нинӧмысь эз письт,  
Кор кабыр вӧлі кӧрт кодъ вына,  
Кор вӧлі синмын ломзьӧ би,—  
Сэк судзӧдлі ме тайӧ вина.  
Вай казьтыштамӧ том кад ми.  
Ме томӧн овны бура кужлі,  
Оз став лун нэмысь менам вун.  
Вай пасъям лунсӧ, кор ме чужлі,  
Ветымын арӧс тыран лун.  
Ветымын арӧс... Он бӧр чинты.  
Но вын и вежӧр менам том.  
Оз весь ӧд Шыпичаӧн нимты  
Да тунӧн менӧ йӧзлӧн вом.

**Гӧсьтъяс** (*сувтӧны, лэптӧны бокальяс*).

Кузь нэм, бур шуд! Кузь нэм, бур шуд!  
Ми сиам Шыпичалы шуд!  
Мед быдтор шедӧ тэд, мый ковмас,  
Пыр водзӧ озырмас мед овмӧс!  
Мед шог да лёк йӧз тэысь полас!  
Мед уна чужан лун на волас!  
Бур шуд, кузь нэм! Кузь нэм, бур шуд!  
Ми сиам Шыпичалы шуд!

**Пырӧ Ёгор, сійӧс потшалӧ Васька Йӧрш.**

**ВАСЬКА ЙӦРШ.**

Тэ кытчӧ суйсян, воштін садь!

**ШЫПИЧА.**

Мый, Ёгор, няйттӧ кыскан татчӧ?

**ЁГОР.**

Ло миян йӧзлы тэ бур бать!  
Тшыг кулам тӧвнас, енмыс аддзӧ...

**ШЫПИЧА.**

Тшыг кулад? Мый сідз? Мый сэн ме?

**ЁГОР.**

Нянь гумла вылысь босьтан тэ.

**ШЫПИЧА.**

А! Мынтысьны ті быдӧн ньӧжмыд.  
Пыр зіяд кӧйдыс уджйӧз чӧжны.  
Ме виччыси, а сэсса шань!

**ЁГОР.**

Тэ ачыд тӧдан, кынмис нянь.  
Тэ тӧдан, гожӧм вӧлі кутшӧм.

**ШЫПИЧА.**

Төв кежлө сы вöсна ог кушöн  
Ме Човйын вина завод коль.

**ЁГОР.**

Кык пуд кө сетлiн,— перьян нель.

**ШЫПИЧА.**

Ме водзвыв шулi.

**ЁГОР.**

Воим пикö!

**ШЫПИЧА.**

Ог эшты артасьны ме тiкöд.

**ЁГОР** (*aggzö göсьтьяс костысь попöс*).

Тэ, батюшко, көть йöзöс дорйы.

**ПОП.**

Кузь гожöм енлысь колi корны.  
Мый вöсна няньяс торкис пуж?—  
Ен ногөн овны йöз оз куж!  
Со дзикöдз вунöдiд тi вичко.

**МУКÖД ГÖСЬТЬЯС.**

Дыш ыджыд тiянöс пыр личкö!  
Нянь зиль удж корö. Корсян тась!

**ЁГОР.**

Тi, аддза, ставныд öтдор танi.  
Тi ставныд öтдор,— йöзлы паныд!

**ГÖСЬТЬЯС.**

Йöз збоймис кыдзи. Небыд власть!

**ШЫПИЧА** (*тойлалö Ёгорöс öгзöслань*).

А татшöм сёрнисьыд, бур вокö,  
Тэд плетьöн кульны колö боктö!  
(*Васька Йөршлы.*)  
Нянь перйы аски жö, да стöча.

**ВАСЬКА ЙÖРШ.**

Эн тöждысь, ставсö бура вöчам.  
(*Петö Ёгорöс вöтлiг.*)

**ГÖСЬТЬЯС.**

Йöз збоймис дзикöдз! Оз тöд полöм!

**САНДРА.**

Йöз миян сьöкыда зэв олö.  
Со кывлiд, кынмис таво нянь.

**ГӖСЬТЪЯС.**

Тэ вывті нор сьӧлӧма ань.

Сандра матыстчӧ Шыпича дінӧ.

**ШЫПИЧА.**

Мый шога копыртӧмыд юр?  
Со тэнсьыд батыӧ лэпті вылӧ,  
Бур гӧстьяс костын сёрни сьлӧн.  
И тэныд олӧм вӧча бур.

**САНДРА.**

Бать менам тэнад гӧстьяс радын...

**ШЫПИЧА.**

А тэ кӧзьяйка лоан тан.

**САНДРА.**

Сы йылысь сёрни тэ эн пан.  
Бать сетас тэ сайӧ, дерт, радӧн,  
Да сьӧлӧм менсьым тэ он вен,  
Мӧд, муса морт нэм кежлӧ сэн.  
Эн вунӧд, мича рӧма корйыс,  
Кор дзоридз гажӧдӧ веж бор,  
Кор эн на нетшышт сійӧс борйысь,  
Кор сьлӧн вуж дӧныс эз ор.  
Эн вунӧд, бобув зарни сьӧма,  
Кор сьлӧн вӧля эз на кус,  
А босьтан радейтыштны сӧмын,—  
Мичлунсьыс кольӧ киад бус.  
Эн вунӧд, лэбач гажла сьылӧ,  
Кор сійӧс кывзӧ шонді, сёрд.  
Гаж бырӧ сьылӧм шыысь сьлӧн,  
Кор сійӧс ворсны кыяс морт.  
Дон оз тӧд радейтӧм, оз ньӧбсьы,  
Эн вунӧд некор сійӧс тэ.  
Он тшӧкты сьӧлӧмыдлы: небзы  
Да радейт, инда кодӧс ме.

Пырӧ Васька Йӧрш, матыстчӧ Шыпича дінӧ.

**ШЫПИЧА** (*Васька Йӧршлы*).

Мем талун мыйкӧ абу долыд,  
Оз некыдз гажмӧм юрӧ лок,  
И сьӧлӧм тунъялӧ мем шог.

**ВАСЬКА ЙӧРШ.**

Оз буртор кыв, збыль, тэнад лолыд.  
Кыдз вой тӧв улын Эжва гызьӧ,  
Сідз Парма сиктъясын йӧз шызьӧ.  
Збой сёрни кылӧ тшӧтш и татӧн.  
Пыж ыджыд Эжваланысь катӧ.  
Мем воис юӧр: пыжа тайӧ,—  
Збой йӧзӧс Яраш татчӧ вайӧ.

**ШЫПИЧА.**

Мый, Яраш? Яраш бара татон!

**САНДРА.**

Мый кыла? Яраш менам матын!

**ШЫПИЧА.**

Кыз лысьтис шызьдчыны Парма!  
Пыж кутшом йозлон сёр кад, арнас  
Войтола гы кост татчо сынө?  
Йоз вунодома менсым вынос!

**ГӨСЬТЪЯС.**

— Ти кылад, Парма йоз по ярось.

— Ти кылад, йозос вайо Яраш.

**ШЫПИЧА** (*мортлы*).

Кось вермас лоны, лосьод паськом.  
Ва лэптой мудоа выло.

**ВАСЬКА ЙӨРШ.**

Дасьтам. (*Петө*.)

**ГӨСЬТЪЯС.**

— Ти кылад, йозос вайо Яраш.

— И керка дорын йоз по ярось.

— Йоз збоймис, косьо лысьто пырны,

— Мый керны, вежорыд оз тырмы.

— Мый керны, мөвпыштны он куж.

— Эн полөй нинөмысь, эн полөй,

Мед, кодлон донтөм лолыс, волө!

Ми налы петкодлам ен пуж!

**ШЫПИЧА** (*матыстчо госьтьяс гинө*).

Бур госьтьяс, вичко ыжда аттьо,

Зэв бура пасийд чужан лунос:

Бур кывъяс тиянлысь ог вунод.

Но лекос лун со меным каттьо,

И, гашкө, помаяс лун косьон,

А косьыд абу, дерт, бур козин,

Ти, бур йоз, бергодчөй бөр гортө.

Ми модысь гажодчыштам коркө.

**ГӨСЬТЪЯС.**

Ми тэкөд нинөмысь ог полөй.

**ШЫПИЧА.**

Мем бурджык откөн лоны колө.

Код тодас, лосьодчө мый сэн.

**ГӨСЬТЪЯС.**

Но, сидзкө, отсалас мед ен.

Тэд сиам, кось кө пансяс, вен!

Тэд сиам, отсалас мед ен!

Гөстъяс мунёны. Сандра көсйө мунны, но сійос потшө Шыпича.

**ШЫПИЧА** (Сандралы).

Эн тэрмась, тани тэнад горт!  
Тэд, шуан, Яраш муса морт.  
Тэ сійос аддзан тани, кор ми  
Көрт чептөн сійос кутам дорны!

**САНДРА.**

И менө Ярашкөд тэ дор!

**ГӨСЬТЪЯС.**

Лок, Яраш! Ачыл суйсян лэчкө!  
Палач тэд важөн черсө лэчтө!

**САНДРА.**

Ме эска, енмыс тэнө ёрас,  
И регыд олөм аслад орас.

### ВИТӨД ЮКӨН

Шыпича керка дорын Парма йөз. На костын Ёгор.

**ЁГОР.**

Нэм уджйөз Шыпичалы мынтам.

**ЙӨЗ.**

— Сы кийн став бур му и видз,  
А миян вөр берд муыд вынтөм.  
— Нянь кымө быд во матө.

**ЁГОР.**

Сідз!

**ЙӨЗ.**

— Кыдз Шыпичаөс ен оз ёр.

**ЁГОР.**

Ен абу, тыдалө, голь дор!

**ПӨРЫСЬ ЙӨЗ.**

— Йөз водзө Шыпичаөс корөй.  
— Йөз водзө сёрни вылө корөй.

**ЁГОР.**

Оз кокньөд, сёрнитөй көть нэм.  
Вын ыджыд эськөн миян эм,  
Да сөмын полөм сійос дорө!

Воссё өшинь, сэн мыччысьö Шыпича.

**ШЫПИЧА.**

Мый шызид тадз? Мый жувксяд тани?  
Тэ, Егор, тайö зыксö панін?

**ЙӖЗ.**

- Дерт, шызын, няньтӖг тӖв он вудж!
- ТӖв вуджны! Оз тырмы тӖв шӖрӖдз!
- Шог ыджыд талун йӖзӖс гӖрӖ.

**ШЫПИЧА.**

Эн увгӖй, ланьтӖй, ланьтӖлӖй сутш!  
Ме век тай отсала, кор йӖрмад.

**ӖГОР.**

Тэ, черань, отсалан!

**ШЫПИЧА.**

Эн скӖрмӖд!  
Кор бурысь тӖ, тшӖтш ме сӖк бур.

**ӖГОР.**

Ланьт, талун эскысь тӖд оз сюр!

**МУКӖД.**

ЙӖз тӖдӖ, кысь тӖд озыр овмӖс!

**ШЫПИЧА.**

А зык кӖ панад,— бӖрдны ковмас!

**ТОМ МОРТ** (*лэптӖ ружйӖ*).

Час аддзам, кыдзи ачыс бӖрддзас!  
(ЛыйӖ Шыпичалы, пӖрысь морт торкӖ,  
*тойыштӖ кисӖ, лыйӖм Шыпичалы оз инмы.*)

**ПӖРЫСЬ МОРТ.**

Тэ чайтан, лыйӖм сылы мӖрччас!  
Тун сийӖ, тӖнад мед оз вун.

**Шыпича видзӖдлӖ вадорлань, йӖзысь водз аддзӖ ЯрашкӖд локтысьяс-  
лысь пыж да дзэбсьӖ Ӗшиньысь. Ӗшинь вылӖ лӖччӖ кӖрт вевт.**

**ТОМ МОРТ** (*пӖрысь мортлы*).

А! Повзис, дзэбсис тӖнад тун!

**ЙӖЗ.**

- Вай ланьтӖлӖй, кылӖ кыськӖ сьылӖм
- Кысь сьылӖм,— вой тӖв нӖйтӖ гы.
- Оз, збыльысь кылӖ сьылӖм шы.
- Збыль, сьылӖм вадорланьыс кылӖ.
- ЙӖз ыджыд пыжӖн татчӖ катӖ.
- ЙӖз тӖдтӖм.
- КорсьӖны мый татӖн?

**ТыдовтчӖ пыжа, кылӖ сьылӖм.**

Оз збой каля сунлась, варччы,  
Пожъяв лым кодъ еджыд борд,—

Гыкӧд пыждӧра сэн гартчӧ.  
Веськӧддысьыс — повтӧм морт.  
Варыш синма, вына соя,  
Нинӧм сылы помтӧм лӧз.  
Мед жӧ быгйӧн гыыс койӧ,  
Абу полысь пыжын йӧз.  
Гыысь гыӧ пыжа вуджӧ  
Нӧв моз веськыда, оз кеж.  
Збой йӧз оз лыддысьны уджӧн,  
Вензьӧм налы — кыдзи теш.

**Пыжа сибӧдчӧ вадорӧ, воысь йӧз петӧны пыжысь, сьыліг локтӧны  
Шыпича керка дорӧ чукӧртчӧм йӧз динӧ.**

Налы мустӧм лӧня олӧм,  
Сотчӧ сьӧлӧманыс би.  
Оз ков зарни, вензьӧм колӧ,  
Найӧ быдӧн — косьлӧн пи.

**ЁГОР.**

Со, вӧлӧм, отсӧг миян матын.  
Дерт, тайӧ, кӧнкӧ, локтӧ йӧз,  
Код йылысь важӧн кывсьӧ татӧн,  
Мый найӧ — озырлы ён грӧз.

**ЙӦЗ.**

— Сэн, Яраш!

**ЁГОР.**

Талун буретш колӧ,  
Кыдз Яраш, пуан вира морт!

**ЙӦЗ.**

Кысь усин, Яраш? Чолӧм!

**ЯРАШ.**

Чолӧм!

**ЁГОР.**

Морт тэ кодъ талун колантор!

**ЙӦЗ.**

— Дыр кежлӧ янсӧдлісны гортсьыд.  
— Ас муӧ аддзин туй, эн сорсьы.  
— Тэ кутшӧм мога йӧзкӧд тани!

**ЯРАШ.**

Мог налӧн — нуны кось пыр паныд,  
Гӧль йӧзлысь нетшкӧ кодӧ сӧн,  
Пыр нӧйтны озырӧс, кӧть кӧн.

**ПЕТЫР.**

Ми сійӧн вуджам муяс-ваяс,  
Мед торкны озыръяслысь ун,

Голь йӱзлысь садьмӱдны збойлун.  
И сийӱ мог жӱ татчӱ вайис.  
Дыр корсим Шыпичаӱс, ӱни  
Ми аддзам, царствуйтӱ со кӱни. (Керкалань.)  
Кад воис, нинӱм ӱд он вӱч,  
Важ уджйӱз мынтыны тӱд стӱч!

**ЯРАШ** (керкалань).

И Парма йӱзкӱд мынтысь талун!  
Бур ӱмбур тӱнад — пӱсьыс налӱн.  
Тӱ озырлун во дас вит чӱжӱн  
Пыр зиль йӱз уджӱн аслыд чӱжин!

**ПӱРЫСЬ ЙӱЗ.**

— Збой сӱрни татшӱм медводз кылам.  
— Мӱвп татшӱм миянлы зӱв выль.

**ЁГОР.**

А меным Яраш кывъяс мыла!

**ТОМ ЙӱЗ.**

Кӱч сьӱлӱм миян,— со мый збыль!

**ПӱРЫСЬ ЙӱЗ.**

— Он тӱдӱй, Шыпичаыд — тун,  
Зык панан,— ловйӱн тась он мун.  
— ӱн сувтӱй Шыпичалы паныд.  
— ӱм, войтыр, Шыпичалӱн пушка,  
Кось панан,— биӱн сийӱ чушкас.  
— Кык пушка.

**ЁГОР.**

Човйын, абу тани.  
Йӱз тшыгъялӱ кор, сылӱн пир!

**ВОӱМ ЙӱЗ.**

Вай пазъям керйӱн ӱдзӱс дзир.  
Парма йӱз костысь:  
— Мед тун кӱ, керка пытшкас пырам  
Да сылысь пѳж поз дзикӱдз кырам!  
— Ми вӱтлам Шыпичаӱс сӱсь!

**ПЕТЫР.**

Оз лӱсяв тун мед, полад весь.

**ПӱРЫСЬ ЙӱЗ.**

Чӱв, вермас пельса ваысь вӱчны  
Вой саридз пасьта гудыр ю,  
Оз удит нюйтмӱм ӱжва сӱдзны,—  
Чов улын лоас сийӱ, су!

Воӱм йӱз да кодсюрӱ Парма йӱз пытшкысь босьтӱны кер да нӱйтӱны  
ӱдзӱсӱ. Воӱм йӱз горӱдӱ сывны:

Налы мустом лоня олөм,  
Сотчө сьолөманьс би.  
Оз ков зарни, вензьом колө,  
Найө быдөн косьлөн пи.

**ЯРАШ.**

Би медся ён да медся сөстөм.  
Ме кывлі, тунөс сотө би.  
Вай бурджык би ми тані озтам.

**ЙӖЗ** (*унаӖн уськӧдчӧны лӧсьӧдны  
керка горын билур*).

- Со чаг да сямӧд ӧктим ми.
- Со кыски гӧрдӧдз косьмӧм коз.
- Ми татӧн сотам лӧк вын поз.

**Керка гӧгӧр ӧзйӧ ыджыд би. Сэки керка вылысь чепӧсйӧ да киссьӧ  
ва. УнаӖн повзьӧны да бӧрыньгчӧны.**

**ПӖРЫСЬ ЙӖЗ.**

Ми шулім, ӧні асьныд аддзид,—  
Он венӧй Шыпичаӧс тадзи.

**ЯРАШ.**

Вай босьтӧй керкасӧ би кытшӧ!..  
Вай пыртӧй бисӧ керка пытшкӧ!..

**ЙӖЗ.**

- Дзик ставнас керкасӧ би вевттис.
- Со ӧзйӧма нин керка вевтыс.
- Тшӧтш пытшсьыс чепӧсйис со тшын  
Сэсь пышйис, тыдалӧ, лӧк вын.

**Ӗдзӧс жугалӧ да йӧз уськӧдчӧ керка пытшкӧ сьылӧмӧн:**

Повтӧм сьолӧмалӧн олӧм  
Медся долыд, медся бур.

**Би ыдждӧ, керка пытшкысь кылӧ кось. Керкаысь бӧр петӧ  
Яраш.**

**ЯРАШ** (*йӧзлы*).

Со дзебсис, повзис тӧян тун!  
Ми аддзам, кытчӧ кӧть он мун!

**ПӖРЫСЬ ЙӖЗ.**

Он аддзы, юкмӧсас кӧ сунас,—  
Туй сьлӧн ва дорӧдз сэн мунӧ.

**Пырӧны Сандра, Люк да Дӧрӧш. Яраш аддзӧ найӧс.**

**ЯРАШ.**

Тэ, Сандра!

**САНДРА ДА ЛЮК.**  
Яраш! Корсям тэнö.

Тыдовтчö-сайласьö Васька Йөрш.

**ДӨРӨШ.**  
Йөрш Васька сайласьö мый сэнi?

Яраш воськовтö Сандралань. Кылö Дөрöшлысь шуом да видзöдö бөрланьö. Сэк Васька Йөрш уськөдчö сайöдысь Яраш вылö, да сутшкö пуртөн сылы морöсас, ачыс пышйö. Яраш усьö. Сандра, Люк да Дөрöш уськөдчöны Яраш динö. Сэтчö жö матыстчöны мукöд.

**САНДРА.**  
Ой, Яраш!

**ЛЮК.**  
Яраш!

**САНДРА.**  
Яраш, муса...

**ДӨРӨШ.**  
Тэ ловъя, Яраш? Синмыс кусö.

Керкаысь петö коддзыштöм морт, сьылö.

**КОД МОРТ.**  
Кодi косьын суйсьö водзö,  
Сийö медвойдөр и коддзö.  
Сылы йöзсянь ошкан кыв.

Люк паныдалö сийöс, кöсийö öлöдны. Код морт кутлö Люкöс, нюмьялö да водзö сьылö.

Сылы — медся мича ныв.

**ЛЮК.**  
Сэн Яраш...

**КОД МОРТ.**  
Сэн? Ме корся сийöс.  
*(Петкөдлö киас бутылка.)*  
Кодi косьын бöрын ветлö,  
Сийöс вина дорысь вöтлöй...

**ЛЮК.**  
Йөрш Васька Ярашöс сэн виис.

Код морт ланьтö, шыбитö кисьыс бутылка да мунö сэтчö, кытчö индiс Люк.

**КОД МОРТ.**  
Йөрш Васька?.. Яраш, дона вок!  
Тэ эн öд кувны татчö лок.

Пырöны Петыр да мукöд.

**ПЕТЫР.**

Кор сотчас ставыс керка пытшкас,  
Вын Шыпичалөн чинö сэк!

**ЙÖЗ** (*Петырлы*).

— Тан суис йöзöс ыджыд грек.  
— Тан пуртөн Ярашöс Йөрш бытшкис.

**ПЕТЫР** (*матыстчö сэтчö,  
кытөн куйлö Яраш*).

Тась нуны колö сийöс гортас.  
Узь, Парма йöзлөн бур пи, узь.  
Кöть олөм тэнад эз вöв кузь,  
Да вына вöлі тэнад бордъяс.

**ЙÖЗ.**

Пыр олим гöля, полөмсорөн,  
Пыр олөм вöлі — курыд сир.  
Тэ чукöстін, кось вылö корин,  
И Парма йöзлөн пузис вир.  
Узь, Парма йöзлөн бур пи, узь.  
Кöть олөм тэнад эз вöв кузь,  
Кöть водз зэв суис бөръя ун,  
Ним тэнад Пармаын оз вун.

Ярашöс лöсьöдчöны нуны. Сотчан керка öшиньын тыдовтчö Шыпича,  
кöсийö петны öшинь пыр. Сандра сийöс медводз аддзö.

**САНДРА.**

Со кодi мыжа ставсьыс!

**ЙÖЗ.**

— Со.  
Вир юö кодi уна во!

Сотчан керка пытшкын мыйкö усьö. Шыпичаöс вевттö би.

— Пом воис тэныд, Парма кöин!  
— Пом, кольö тэысь сöмын пöим!..  
— Йөрш Васька пышйис, медлөк пон.  
— Йөрш Васька регыд лоас Човйын,  
Ог мынöй öнi сыысь ловйөн,  
Вын Човйын Шыпичалөн ён.

**ДÖРÖШ.**

Йöз кийн вын! Тi энö полöй.  
Кыз Яраш индiс, сiдзи олöй!  
Эн полöй, войтыр, юръяс лэптöй,  
Кось вылö черъяснытö лэчтöй,  
Да мöдам Човйö! Сотам Чов!  
Но, кодi кось нуны оз пов?

---

**ЙӖЗ.**

— Мый повныс? Некод дзик оз пов!

— Збыль, сотам Шыпичалысь Чов!

**Ярашӧс петкӧдӧны.**

**ДӖРӖШ.**

Эй, войтыр, Човйӧ!

**ЙӖЗ.**

Човйӧ, Човйӧ!

**ДӖРӖШ.**

Мед тӧдӧ быдӧн,— Парма ловъя!

**Ставыс петӧны Ярашӧс нуысьяс бӧрся.**

**ЙӖЗЛӖН ГӖЛӖСЪЯС.**

— Эй, Човйӧ, Човйӧ!..

— Парма ловъя!..

**ПОМ.**



Никон ХАТАНЗЕЙСКИЙ

## Татшөмторсө некор вунөдны оз позь

ФРОНТОВИКЪЯСЛОН КАЗЫТЫЛӨМЪЯСЫСЬ

### «Өкмысысь ветлі атакаө...»



Фёдор Исаевич Терентьевлөн, Няшабөж судоверфса мастерлөн, да сылөн гөтыр, Домна Крысантьевналөн, Чика грездса колхозысь кукань видзысьлөн, вөлі көкъямыс пи. Медыджыдыс, Николай, помалис Мокчойса педучилище, коймөд курсын велөдчигас нин лэдзис киён гижом «Всходы» журнал, йөзөдліс асьыс гижөдъяс газетъясын да «Ордым» журналын. Армияс босьтисны 1939 воын. Вөрөгкөд косъясын участвуйтис война пансьомсянь. Кыдзарө аслас челядьдырся ёрт Василий Истоминлы гижліс, мый повтөмлун петкөдлөмысь сійөс кыкысь дорвыв наградитлісны «За отвагу» медальөн. Николай пуктис юрсө 1944 вося мартын...

Мөд пиыс, Тимофей, велөдчис зоотехнической техникумын, вөлі бур лыжникөн, мичаа рисуйтчис. 1941 вося сентябр помын коймөд курсса зонъяс, на лыдын Тимофей, ас окотаысь мунисны дорйыны странанымөс. 1942 вося мартын Тимофей юөртөг вошис косъясын.

Коймөд пиыс, Пётр, чужліс 1924 воын, помалис сизим класс, уджаліс колхозын, томсянь пөрөдчис лучкөвөй пилаөн, кылөдіс вөр. Армияө сійөс босьтисны 1942 вося августын. Пётр бура помнитө, кор да кутшөм сикт-кар дорын мунліс косъяс, кутшөм ю вуджліс... Газетын да музейын уджалігөн ме волі сёрниө уна фронтөвиккөд, но татшөм бур паметяыскөд паныдасылі первойысь...

Служитны Пётр Терентьев веськаліс Архангельскө. Тайө кар вылас вөрөглөн самолётъяс тшөкыда шыблавлісны бомбаяс. Салдатъясөс войясын сувтөдлісны кусөдны пөжаръяс, жугласьөм стрөйбаяс улысь мездыны йөзөс... Лои налы и иностранной судноясысь грузъяс ректыны.

— 1943 вося январ төлысь помланъяс,— казытылө Терентьев,— миянөс пуксьөдісны вагонъясө да нуөдісны Бологое станцияөдз. Сэсянь матө квайт сутки восьлалім фронтлань. Веськалі ме 166 дивизияса 423 полкө, коді дорйысис гежөдіник пуяса вөр дорын. Эз вөвны ни траншеяяс, ни окопъяс. Салдатъяс олісны лымайысь вөчөм чомъясын. Коймөд луннас юөртисны, мый аски асывнас полк петас наступленньө. Вежөрөн гөгөрвои, мый оз ставөн усыны косяс, но век жө сьөлөм вылын эз вөв лөсьыд. Асывнас пушкаяса мыйкөдыра лыйлісны вөрөг кузя. «Ура!» горзигтыр котөрөмоз кыпөдчим атакаө. 150—200 метр мунөм

бöрын веськалім чорыда лыйсьöм улö. Ме водзын, метр 8–10 сыйын кымын, грымöбтис вына снаряд. Быттьö ыджыд изийöн кучкисны морöсö. Кöсийи сувтны кок йылö, но синмöй пемдис да воштi садьöс.

— Татшöм вöли атакаö менам первойысь кыпöдчылöмыс,— казътыліс Терентьев.— Садьö вои санитарнöй ротатын. Врачъяс висъталісны, мый снарядлөн көрт торйыс кокчöрйын вöчöма ыджыдкодь рана, менам вошöма уна вир. Бур, лысö абу жуглöма. Кыскöмаöсь си доддын санитарнöй понъяс. Тöлысьöнджынйөн куйлі госпиталяс. Мамлы мöдöдöмаöсь юөр, мый ме март 18 лунö уси косьын да дзёбöмаöсь менö Дроздино грезддорса братскöй гуын...

Май заводитчигөн петкөдисны тылö. Туй вылас няйтыс пидзöсöдз, а ми пыр на гын сапöгаöсь. Мунім сöмын войын, луннас узьлім вöрын лыс лапъяс вылын, вердисны сукаръясөн, американскöй кансервъясөн. Васö юим шорысь пузьöдтöг, салдатъяс пöвстысь некод эз висьмыв. Съöкыдöсь фронтöвöй километръясыд. Водзтi ме думайтлі, мый война вылад медся вынаыс да винёвыс вöv. Помтöм-дортöм туйяс мунöм да окопъяс кодйöм бöрын вöчи кывкөртöд: медся винёвыс, дюжыс — сійö салдат. Сэки ми Калининскöй обласътсянь подөн мунім Воронежскöй фронтöдз.

Май помланьыс сулалісны кос да жар лунъяс. Батальонса штабын юөртисны, мый менö мöдöдöны младшöй лейтенантъясöс дасътан курсъяс вылö. Эз кокниа шедны тöдöмлунъясыс. Асывсянь рытöдз котрöдлісны-гöняйтисны миянöс чулькйöсь мылькъястi, кырöмъяс кузя да сук вөрöд. Велöдысьяс пöвстын унджыкыс вöли зэв тölка, уна тöдысь офицер. Да и мен аслым окота вöли лоны офицерөн, выль косьö петны командирөн нин.

1943 вося августын миян 27-öд армиялөн дивизияяс заводитисны наступайтны. Ми, велöдчысьяс, мунім наступайтысь армия бөрся. Тайö вöли кузь да съöкыд туй. Эз öтчыдысь миян кузя вөрөг лыйлы öрудиеясысь да миномётъясысь. Куимысь курсантъяс вылö уськөдчылісны диверсантъяс.

Ёна съöкыд косьяс пансисны Сумскöй обласътса Ахтырка кар гөгöрын. Сэтчö немечьяс чукөртисны ставсö, мый налөн колис чорыд косьяс бöрас. Татчö вөрөг чукөртис-вайöдис выль стрелкөвöй, танкөвöй да авиационнöй дивизияяс. Пансис чорыд тыш-кось. Миян салдатъяс вылö öтпырйö 30–50 самолёт шыбалісны бомбаяс, лыйлісны реактивнöй снарядъясөн.

1943 вося август 18 лунö немечьяс петісны наступленнöö, жугөдисны миянлысь оборона да босьтисны Ахтырка карсö. Сэсся уна лун на кар гөгöрас муніс чорыд тыш-кось. Миян дивизияслөн лоины вывтi ыджыд воштöмъяс. Пыртлисны косьö и велöдчысь курсантъясöс. Суткиысь дырджык кутім вөрөгöс. Нельысь сійö уськөдчыліс миян вылö, но ми ньöти воськов эг бöрынътчöй. Косьясын 59 курсантысь пöгибнитіс 17-ыс, 12 курсант ранитчис. Содтöд вынъяс воём бöрын немечьяслысь наступлениесö вöли сувтöдöма. И ми водзö кутім велöдчыны. Август 24 лунсянь миян войска заводитіс зырны-вöтлыны вөрөгöс, а сутки мысти коймöдысь лои мездöма Ахтырка карсö.

Ахтыркасянь мунім рытыввывлань. Днепр ю дорын сдایتім экзаменъяс. Менö пасйисны медбура помалысьяс лыдын. Став-

нымлы сетисны младшөй лейтенант чин да мөдөдалисны кодос кытчө. Ме веськалі 100-өд дивизияө, коді сулаліс Винница обласьтса Оратов көрт туй станциясянь неылын. Индісны менө взводса командирөн. Унджык салдатыслы муртса тырөма 18 арөс. Эг на удит бура төдмасьны накөд, а юөртисны нин: аски асывсянь пө кутам зырны вөрөгөс. Войыс кажитчис вывті кузьөн, меным эз узьсы. Унатор йылысь думайтсис. Талунөдз ме вөлі радөвөй салдатөн, пөрті оломө командирлысь приказьяс, аски жө, кызди командир нин, нуода косьө быдса взвод. Ог на төд, кызди-мый артмас. Пыдди пуктөмтө командирлы тасьті вылын оз вайны, сійөс колө аслыд шедөдны. А та могысь лоны смелөн, төждысьсысьөн да веськыд мортөн. Öти кывйөн кө, не сөмын командирөн, но и бур өртөн. А өд меным сөмын на 19 арөс...

1944 вося март 8 лун. Асывнас юрөбтис-грымөбтис уна сө өрудие. Төвзисны вөрөгланы реактивнөй снарядьяс. «Урал» горзигтыр кыпөдчим атакаө. Водзын мунісны танкьяс. Прөтивник чорыда водзасис. Со миян водзын öти танк кутіс нин өна тшынавны. Вөрөг шөтис и шөтис юр выланым снаряд-минаяс. Помся сяргисны пулемөтьяс. Атака миян эз артмы. Юр весьтөд өтарсяныс и мөдарсяныс лэбисны снаряд-минаяс. Мөдысь кыпөдчим атакаө, но вөрөглөн пушка-пулемөтьяс бара потшисны водзө туйсө. Салдатьяс водісны муө. Отсөг вылө воис кык танк. Öні миян водзын вөлі куим татшөм машина. Коймөдысь кыпөдчим атакаө. Вочасөн вөрөг слабджыка кутіс водзасьны, а сэсья и босьтчис бөрынтьчыны, кымын водзө, сымын өдйөджык энөвтис асьыс ранитчөм салдатьяссө, пушка-миномөтьяссө, мукөд өружие.

Менам, вөлөмкө, весьшөрө маитчысьсөма. Менам взводысь салдатьяс да сержантьяс повтөг тышкасисны вөрөгкөд. Таысь ошкыштис и батальонса командир. Сөмын воштөмтьясыс лоины ыджыдөсь, усисны да ранитчисны джынсьыс унджык салдатыс. Стройын эз коль ни öти сержант. Оратов станциясө лои мездөма. Сэні, гашкө, быдсяма грузьяснас сө сайө вагон вөлі. Пленө сетчисны немечлөн взвод мында салдат, кык офицер.

Нель сутки чөж шойччитөг вөтлім вөрөгөс. Салдатьяс сэтшөма мудзисны, кок йыланыс вөлі унмовсьөны да усялөны. Ас серти шуа: фронт вылын салдат унмовсьө весиг сэк, кор орччөн грымакылөны снаряд-минаяс. Эг адзыв, медым кодкө вөлі повзьөм чужөма...

Паметьө коліс Днепр ю вуджөм. Вабердса бадьяс пөвстысь салдатьяс петкөдісны ыджыд пыж. Сэтчө сөлісны менам взводысь кык отделенияса салдатьяс. Найө пыр жө зіля кутісны сынны. Неуна ылынджык тыдыштөны мукөд пыжьяс. Войнас Днепрыслөн ваыс кажитчис сирва кодь сьөдөн, а юыс миян Печора серти векныдджыкөн. Ю вылас гежөдика гылалісны снарядьяс, тыдалө, лыйлісны ылісянь. Зурасим берегө. Чеччөм бөрын пыжыс пыр жө вуджис ю мөдарас, медым вайны мукөд салдатьясөс, өружие. Кыпөдчим крут кыркөтш вылө, мунім 250—300 метр мында. Зурасим векныдик, 10—12 метр пасьта юө, келім сійөс. Тайө вөлі Днепрлөн вож. Ваыс воліс меным морөсөдз, өна кодзыд. Юсө вуджөм бөрын кодйим окопьяс. Ме сувті аслам окоп бруствер вылас, медым видзөдлыны, кысянь

виччысны вөрөгөс. Ылісянь кыліс лыйом шы. Пуляыс веськаліс веськыд кокө. Матын санитар эз вөв, взводса сержант гартіс бинтөн кокөс. Войнас веськалі медсанбатө, сәні мыськисны-мавтисны дойсө да нуөдісны Киевса госпитальө. «Везитө» меным, мөдысь нин ранитчи.

Бурдом бөрас менө корисны полкса штабө. Шуисны, мый разведвзводса командирыс госпитальын, сылөн бурдөдчигкостіыс мен лоө вежлыны сійөс. Сувтөдісны мог: пыравны прөтивник тылө, быть вайөдны штабса офицерөс. Штабса начальникөс вежысь висьталіс: вөрөглөн передөвойсянь пө 22–24 километр ылнаын эм нейджыд грезд. Став сертигыс, сәні меститчөма стрелкөвөй дивизиялөн штаб. Сэтысь и босьтөй «языксө». Войыс вөлі пемыд, помся зәрис. Неуна ылынджык миян вөчисны пөрийөга атака. Тайө зык-шум улас и вуджим сідз шусяна центральной полосасө, югдытөдзыс мунім матө кызь километр. Лун кежлас саймовтчылім козья вөрө. Мөд войнас воим миянлы индөм грезд дорө. Кык сутки чөж, водз асывсянь да сөр ытөдз, видзөдім, мый вөчсьө грездас. Некымын керка бокрын сулалісны грузөвөй машинаяс, налысь кузовсө вевттьөма кыз брезентөн. Сэтшөм машинаяснас немечьяс новлөдлөны салдатъясөс. Öти керка дорті ветлөдлө часөвөй, регыдик кежлө сійө саймовтчылө, тыдалө, куритчө. Тайө керка дорас кадысь кадө сувтлөны мотоциклъяс, зэв шоча — легкөвөй машинаяс. Тайө керкаыс буретш и лөсяліс миянлы...

Ми вөлім дасөн. Юксим кык пельө. Неуна зәрышталіс. Вит разведчик бауөн кыссисны сійө керкаланьыс, код дорын сулаліс часөвөй. Мөд вит разведчикыс, на лыдын и ме, керкасяньыс 150—170 метр ылнаын «страхуйтім» первой группасө. Грезд мөдарпомса öти керкаысь кылім гора сөрни, серам. Тыдалө, пасйисны кодлыськө чужан лунсө. Көнкө ылын кыліс танклөн мотор шы. Ыджыд өдөн керка дорас журкнитіс-локтіс мотоцикл. Люлькаын пукалысь немеч мыйкө гораа юаліс часөвөйыслысь, кывзіс сылысь воча шуөмсө. Тайө вөліны часөвөй олөмын медбөръя кывъяс. Сійө жө здукас лөня виисны мотоциклистө, а люлькаын пукалысь офицерлысь юрсө гартыштісны плащпалаткаөн, босьтісны немечлысь кыз портпельсө. А грезд помас сулалысь керкасыс важ моз кыліс гажа серам, музыка. «Языксө», обер-лейтенантөс, босьтөм бөрын мөдім бөр, ас йөзлань. Но часыс эз коль, и быттьө ловзис вөрыс, кыліс понъяслөн увтчөм, автоматъясысь лыйсьөм. Вит-квайт километр мунөм мысти саймовтчим сук вөрө, неуна шойччыштім, косьтысим. Асланымлань көнкө мунім өдйө, көнкө өна видзчысьөмөн. Нейтральной полосасө вуджим шор бокөд, дыркодь келім ва кузяыс. Квайтөд сутки помасьтөдзыс воим асланым часьтө. Обер-лейтенантсө вайөдім дзоньвидзаөн...

Кор взводса командир воис госпитальысь, ме бөр локті аслам батальонө. Индісны взводса командирөн, вөвлөм командирыс кык лун сайын сьөкыда ранитчөма да нуөмаөсь госпитальө. Висьталісны, сөмын пө кык вежон и веськөдлөма взводнас. Содта татчө, мый взводса, ротаса командиръяс тшөкыда вөлі петөны стройысь: ранитчөны, усьөны. Лючки бура, дерт, эг удит төдмасыны салдатъяскөд, кызди пырим косьө, уна лун

дорыв вөтлім вөрөгөс рытывыввлань. Чорыд косьяс пансисны Львов обласьтса сакар вөчан завод дорын. Менам взвод өти лунө кыкысь помся кыпөдчыліс атакаө, воштіс өкмыс мортөс. Немечьяс пондісны нин бөрынытчыны, кор пуля веськаліс менам веськыд кокө, но ранаыс өдйө бурдіс. Медсанбатын матө дас лун и видзисны. Ассыым полксө вөтөді Польшаын нин, мыйкөдыра велөді том салдатьясөс, кодьяс абу на вөвлөмаөсь косыын.

Польшаын миян пехоталөн лоины гырысь воштөмьяс. Кирпичысь вөчөм уна керка паныдаліс миянөс яр пулемёт биөн. Чорыд косьяс дивизия нүөдіс Тырнов кар вөсна. Уна салдат усины Польшалысь важся столица Краков босьтігөн. Тані төдмалім, мый нацистьяс көсйөмаөсь дзикөдз бырөдны тайө карсө. Но миян разведчикьяс да Польшаса патриотьяс абу сетөмаөсь фашистьяслы пөртны олөмө татшөм лөк мөвпсө.

Краков карсянь неылын Освенцим (Аушвиц-Биркенау) лагерө йөртөмаөсь Европа пасьталаысь уна-уна сюрс йөзөс. Кык полк панісны косьяс тайө лагерас пукалысьясөс мездөм могысь, но вөрөг чорыда водзасис, эз сет салдатьяслы матыстчыны лагер дорас. Сэки уна салдатөс, на лыдын и менсьым взводөс, пуксьөдісны танкьяс вылө. Дасысь унджык танк, лыйсигтыр, ыджыд өдөн пырисны лагерө. И ми... весьөпөрим. Помтөм-дортөм уна шой тэчөмаөсь бунтьясө, лөсьөдөмаөсь сотны. Джуджыд кырөмьяс тыртөмаөсь шойясөн жө, найөс весиг абу вевтьөмаөсь муөн. Крематорий трубаясысь пуркйис сук съөд тшын, лөк дукуысь пырө вомад, нырад. Баракьясысь петалісны узникьяс, унаөн оз вермыны сулавны кок йылас. Татшөмөн миян водзө сувтіс Освенцим лагер, көні виөмаөсь-сотөмаөсь уна сө сюрс мыжтөм йөзөс.

Менам синвайө доршасис дзикөдз косьмөм узникьяссө аддзөм бөрын. Сэсся вөлі митинг. Сёрнитісны унаөн. Быдөн янөдіс фашистизвергьясөс, морт виысьясөс. Татшөмторсө некор вунөдны оз позь. Салдатьяс көсйысисны, мый пуктасны ассыныс ставын, медым өдйөджык пасьвартны вөрөгөс, помавны война. И найө сетөм кывсө пөртісны олөмө...

Асывнас неыджыд кось бөрын мунім кызь сайө километр. Салдатьяс өна мудзисны. Рытъявылысь пырим ыджыд сиктө. Керкаясысь паськыдось, мичаөсь. Ньөти жуглөм стрөйба эз тыдав. Вой кежлас овмөдчим өти татшөм керкаө. Олысьясыс, тыдалө, муномаөсь немечьяскөд. Ми вөлім өна мудзөмаөсь, эг видзөдлөй, кодьяс овмөдчөмаөсь орчча керкаясас. Асывнас менө пальөдіс телефон триньгөм. Сетөма приказ: пыр жө петны туйө, водзө вөтлыны вөрөгөс. Керкасө эновтігөн кыліс немеч сёрни, артмө, мый орчча керкаас вөлөмаөсь гитлеровечьяс. Косьө пырны эг кутөй. Восьлалам паськыд уличаті. Веськыд ки вылын сулалөны өти да кык судта мича керкаяс. И өти керка сайысь виччысьтөг миян вылө уськөдчисны немечлөн автоматчикьяс. Ме горөді: «Ложись!», и сійө здукас кодкө быттө изйөн кучкис морөсө, ме уси лымйөн тырөм туйбокса канаваас. «Войнаыс, тыдалө, меным помасис», — думышті да вошті садьөс. Палялі кутшөмкө пөдвалын. Кылі роч сёрни. Нывбаба-врач висьталіс, мый вайөдөмаөсь менө сёр рытнас, өна кынмалөмаөс. Артмө, мый матө сутки джынйысь дырджык

куйлыссьома менам лым вылас. «Вирыд уна петома,— шуалис врачыс.— Паськөмыд йизьома. Ранаыс лёк, разрывной пуля веськалома шуйга лядвееяс».

Сийо жо войнас мено нуодисны медсанбатю. Сэни дыр видлалисны, шуисны, мый ранаыс заводитома пежасьны. Меню то посьо шыбитлас, то кынто. Косьян ко по овны, кокто быть колю вундыны. Овны вюли окота, меным од муртса тырис 20 арос. Тайю сэтшюм кад, кор верстыю мортлюн оломыс сомын на заводитчю. Некумынысь на врачьяс водтодлисны меню наркоз улю, зилисны вотлыны вир висьюмсю. Ещю на дженьдодисны вундом коклысь коляссю. Ог дзеб: юрын чужлисны омоль мовпьяс. Колю-ю водзю овны? Да и кутшюм сийю кок пола оломыс? И век жю овны колю. Но ас олом вюснаыд быть колю тышкасьны. А тайю абу нин сэтшюм кокнитюр...

1945 вося май 9 луню санитарной поезд вайюдис мянос, сьюкыда ранитчюмаяс, Ташкентса госпиталью. Карас кылис музыка шы, конко ворсисны-сылисны. Быдон радлис страналон Ыджыд вермомыслы. Первой вежоньясас, ок, вюли сьюкыд. Ньюжюник ловьюгыдыс кутис воссьыны. Тольсы куйлом бюрын ньюжюник сувти кюстыль вылю, госпиталь ошинь дорын дыр сулавли. Тшюкыда воylvлисны мян дорю шефьяс, том зоннвьяс, мичаа сылисны, висьталисны кывбурьяс. Воylvлис и гудюкасьысь, аккордеонон бура ворсис роч сыланкывьяс. Госпитальын уджалисны бухгалтерьяслон курсьяс, бурдыштюм бюрас окотапырысь кывзи сетюм урокьяссю. Ена кути лыддысьны, лыдди Лев Толстойлысь, Горькийлысь, Чеховлысь вель уна книга.

Частюкодь кути думайтны-мовпавны война йылысь. Кык во, кык тольсы да 11 лун ме пыр вюли тыш-кось мунанинас. Окмысысь ветли атакаю. Тайю абу нин сэтшюм этша. Уналы и отчюд кыпюдчылюмыс сувтис олом доныс. Некор эг сайюдчыв салдатлюн мыш сайю. Быдторийыс вювли, косьын ковмылис бюрынтьчыны, сюрлис и кымалюмыс, тшыглуныс, быдсяма туй кузя подон ветлюмыс. А мыйта окоп лои кодийома! Уна салдат да сержант менам син водзын сьюкыда ранитчисны, кувсисны. А од налон оломыс сомын на вюли гюрддзасю. И менам ки-кюкю пуля-осколокыд веськавлис. Ни оти фронтювик водзвыв эз тюд, мыйон сылы помасьяс войнаыс: коляс ловйюн, лоас инвалидюн либю сетас оломсю Рюдина вюсна тышын. Мян повстысь быдюнлы войнаыс вюли уджюн, сьюкыд да няйт уджюн.

1946 вося март 9 луню мюд группая инвалидюн меню лядзисны гортю. Госпитальын бухгалтерю велюдчюмыс зев на и сгюдитчис. Сизим во уджалю старшюй бухгалтерюн Щельяюрса больничаян, дас кюкьямыс во старшюй бухгалтерюн Печораса речной техникумын. Страна вылю доньялис менсым уджюс, наградитис «За трудовую доблесть» медальюн, меню пыртисны Печора парюхюдстволюн да техникумлюн Почет книгаю. Некор эг отдортчыв общественной уджысь, эз отчюдысь бюрйивны Щельяюр поселюкса да Печора карса советю депутатюн. Окотапырысь адздюдчывли том йюзкюд, школаса велюдчысьяскюд.

Война вылю ветлюмысь, сэни повтог тышкасьюмысь меню наградитисны «Красная Звезда» да «I степеня Отечественной война» орденьясон, патриотической удж нуодюмысь — Войнаса

ветеранъяс Сöветскöй комитетлөн Почёт знакөн; а кольём нэм-лөн квайтымынöд воясын война йылысь менсыым казтылёмъясöс йöзöдлис «Огонёк» журнал...

## И сотчысь танксьыд петлис...

Война пансьём бöрас пехотнöй училище помалысьяс пöв-стысь унаöс мөдöдисны велöдчыны танкөвöй ротаса командирö. Веськалис на лыдö и младшöй лейтенант Вениамин Пальшин. 1941 вося декабр помланьыс Ладога ты вывти лöсьöдöм туйöд сийö локтис Ленинградö. Луннас карбердса вөр-нюрын унаторийö велöдчисны: кызди зырны танкөн, вуджны мытшöд, петны «сотчысь» машинаысь. Полигонын лыйсисны танклөн öрудие-ысь. Рытнас политехнической институтын кывзисны танкъяс отсöгөн тышкасьём йылысь лекцияяс.

Казявлытöг колис квайт тöлысь. Пальшинлысь велöдчöмсö донъялисны вывти бура, характеристика помас пасйисны: «Лейтенант Пальшин может командовать танковой ротой». Вениамин Михайлович веськалис 124-öд танкөвöй бригадаö. Ротаас, кодөн кутис командуйтны Пальшин, вöлины БТ-5 кокни танкъяс 45 миллиметра öрудиеясөн.

Танкөвöй бригада, кытчö пырис Пальшинлөн ротаыс, участ-вуйтис «Искра» операцияын, кодöс вöли веськөдöма Ленинград гөгөр вөрöглысь кытшсö ордöм вылö. 1943 вося январ 12 лунö ыджыд калибра öрудиеяс да миномётъяс кык часысь дыр-джык жуглисны вөрöглысь окоп-дзотъяссö. Первойөн Нева юсö вуджисны штурмөвöй отрядъяс, на бöрся водзвыв лöсьöдминöд ыджыд öдөн веськөдчисны танкъяс. Быд танк вылын пукалисны автоматчикъяс.

Пальшинлөн ротаса танкъясыс первойөн воисны юлөн мөдар берегас да пыр жö уськөдчисны косьö, бырöдисны вөрöглысь öрудие да кык миномёт. Час мысти кымын тыдовтчисны гит-леровечьяслөн танкъяс, самоходнöй öрудиеяс... Косьыс чорзис, миян да вөрöглөн уна танк сотчис. Немечьяс первойөн энов-тисны тыш мунанинсö. Бригадаса командир вылö донъялис Паль-шинлысь пайсö тайö кось нуöдомас.

1943 вося январ 18 лунö первой номера Рабочöй посёлок дорын Ленинградса да Волхов фронтлөн часьтъяс öтлаасисны. Вөрöглысь кытшсö лои ордöма. Пальшин ротаысь унджык танкистсö пасйисны орден-медальён, а командирлысь морössö мичмөдис Гөрд Звезда орден.

БТ-5 бöрас Пальшинлөн ротаын унджык машинаыс вöли Т-60 кокни танк. Январ помланьыс сылысь ротасö пуксьöдисны Т-34 машинаяс вылö. Кокни танкъяс серти налөн и öдыс ыджыд-джык, и броняыс ёна кызджык, и öрудиеыс вынаджык. Паль-шинлөн ротаыс пырöдчылис уна косьö. Корсюрö кажитчылис, мый нин пикö воисны, но Пальшин некор эз шöйöвошлы, кужис ышöдны йöзöс, повтöг тышкасис вөрöгкөд, пыр корсис да ад-дзылис петан туй.

Коркö öтчыд танк, кодлөн башняяс пукалис ротаса коман-дир, мунис наступайтысь пехота водзын. Виччысьтöг гораа гры-мөбтис: кызди тыдовтчис, танкыс «тувтчöма» мина вылö да

сылён орёма өти гусеницаыс. Водзö ни бөрö мунны оз вермы. Пальшин тшöктис экипажлы петны улыс люк пырыс, эновтны машинасö, но, вөлөмкө, вөрөглөн мина вежыньтöма люксö да сийö оз воссы. А башня пыр петны вөрөг оз сет, помся лыйлө. Кык снаряд дорвыв веськаліс танкас, но машинаыс сöмын дрöгнитліс. Пальшин думсыыс ошкыштіс Уралса сталь вöчысыасö. Вөрөг быть кöсийс бырöдны танксö, но сийö эз сетчы, кызд вермис водзасис. Вөрөглөн некымын öрудие лыйліс танк кузя. Со өти снаряд веськаліс танклөн моторас, машинаыс кутіс тшынавны. Отсög вылө воисны миян куим танк. Найö сайöдісны ротнойлысь машинасö, сетісны позянлун экипажлы петны танксыыс вылыс люк пырыс. Пальшин бөръяөн эновтіс танксö, кодлөн пытшкөсас ыпъяліс нин би. И тайö здукö сылөн пельпомö веськаліс вөрөглөн пуля...

...Вөлі ноябр төлысь. Разведка юөртіс, мый вөрса векни туйöд миянлань локтöны немечьяслөн куим танк. На бөрся — салдатъяс тыра машина.

Бригадаса командир тшöктіс Пальшинлөн роталы бырöдны вөрөглысь техникасö да салдатъяссö. Засадасö Пальшин дасьтіс-лөсьöдіс кырбердса туй пöлөн. Косыыс муніс час джын кымын. Первойя снарядъясөн öзйіс водзын мунысь танкыс. Мöдыс кыкысь лыйіс да кутіс öдйö бöрынтьчыны. И бöрынтьчигас машинаыс исковтіс... кыр горулас. Коймöд танкыс да автоматчикъяс недыр кад водзасисны, но ротаса квайт танклы паныд өна он кутчысь...

Рыгьявылыс миян стрелкөвöй батальон нейджыд артподготовка бöрын заводитліс пырны туйбокса өти грездö. Т-34 танк, көні командирнас вөлі Пальшин, муніс мукöд машинасысь водзынджык. Та дырйи танкыс аслас öрудиеөн бырöдіс вөрөглысь пушка. Немечлөн траншеяөдз коліс 300—350 метр мында. Виччысьтөг кок улын өна грымöбтіс, танк быттö неуна кыпöдчыштіс, экипажлысь пельяссö чунöдіс. Сэтчö жö өна доймöма механик-водительлөн кокыс. Орччөн вөрзöдчывтөг сулалісны кык танк, өти машина сотчис. Пальшин гөгөрвоис — тайö атакаыс нинөм бурсö эз вай. Чöv сулалысь машина дорö вөрөглөн салдатъяс заводитлісны куимысь матыстчыны, но танклөн пулемёт быд пöрйö лөнөдліс найöс. Вөрөглөн пушка некымынысь лыйіс жö танк кузяыс, но регыд и сийöс лои ланьтöдöма.

Декабрын лунъясыс дженьыдöсь. Пемдөм бөрас немеч дугдіс лыйсынысö. Пальшин петаліс танксыыс, гөгөрбок бура видзöдаліс, минаыс абу сöмын орөдöма гусеницасö, но и уна мукöдлаті жуглöма. Дзоньтавны Т-34-сö позьö сöмын мастерскойын. Войнас вель өна ыркнитіс, танк пытшкыс лоис зэв көдзыд. Позис, дерт, экипажлы эновтны танксö, но Пальшин лыддис, мый сийö лоис бур кыйöдчанінөн да лыйсянінөн. Югдөм бöрын вөрөглөн салдатъяс 150—200 метр ылнаөдз матыстчылісны танк дорас, но йөзöс воштөмъясөн бöрынтьчылісны. Сук вөр бердсяныыс немечлөн пушка некымын снаряд лэдзис танк кузяыс, өтиыс веськаліс башняас, мöдыс — запасной люкас. Но и тайö öрудиесö танклөн пушкаыс ланьтöдіс. Мөд луннас миян öрудиеяс кутісны сизьдыны-луйлыны грезд кузяыс. Водзö чепöйсисны танкъяс. Но прөтивник эз кут водзасьны да эновтіс грездö.

Пальшинлөн ротаыс уна кось пыр муніс Белоруссия мездігөн, Польша да Берлин босьтігөн. «Кымын матөджык кутім матысмыны Берлин дорас, сымда крепыдджыка вөрөг мөдіс водзасасыны,— казътывліс Пальшин.— Кетцин дорса косясынын ротаыс квайтнан танкыс петіс стройысь, 40 танкыстысь ловйөн коліс 17 морт. Оти кадө менам танкын радистөн вөлі том коми зон — Иван Патов. Ог төд,— казътывліс Пальшин,— бурдас-ө зонмыс сьөкыда ранитчөм бөрас, но сійө вөлі бур танкыстөн, төлка ёртөн, кужөмөн лыйліс танклөн пулемётысь. Зэв жаль, уна том зон эз вермыны петны сотчысь танкысь».

Бригадаса командир сетіс приказ: пыр жө мунны пехотной полкыс отсөг вылө. Ротаыс ыджыд өдөн вуджис сотчысь вөр пыр. И пыр жө пырим косьө. Эг сөмын отсалөй вөтлыны вөрөгөс, но и босьтім уджалысь радиостанция, уна ствола кык миномёт, противотанкөвой орудие, мукөдтор.

«Шпандау карын, Берлинсянь матын, кык судта мича керка дорын гитлеровеч фауст-патронөн өзтіс менсьым танкөс. Вөрөг кык керкасянь лыйліс пулемётысь. Экипаж энөвтис сотчысь танкөс, сайөдчис мича керкаө пыранінас. Мөд судтаас кыліс челядълөн бөрдөм. Ме кышөдчи мөд судтаас. Ыджыд жырйын вир пытшкын джоджас куйлө вөлі том нывбаба, сы дорын бөрдө ар куима нывка да кадысь кадө шуалө «Муттер, муттер». Диван помас пөрөдчөма сьөд паськөма том офицер, юрыс вир пытшкын жө. Диван вылас куйлө револьвер. Тыдалө, офицерыс первой виөма гөтырсө, а сөсся лыйөма асьсө. Ме босьті нывкасө моздорө, сійө крепыда кутчысис сьыліам. Менам весиг синваөй петіс. Куті корсьны керкасыс кодөскө, медым сетны нывкасө. Пөдвалсыс аддзи олөма нывбабаөс, сылы и мыгчи нывкасө. Нопйын вөлі яй консерв банка, куим-нөль плитка шоколад, ставсө тайөс сеті нывбабаыслы.

Берлинө пыртөдз кутшөмкө керкаысь котөрөн петіс 12–14 арөса детинка да зэв матысянь браунингысь лыйис меным. Пуляыс лэбис дзик юр бердті. Менам кыын вөлі алюминийысь вөчөм портсигар, ме сійөн шыбиті детинкаыслы, медым сійө эз удит метитчыны, ачым зэв өдйө матыстчи да мырдди кысыс оружисө. Зонкаыс лэдзчысис пидзөс вылас да бөрддзис. Ме сувтөді сійөс кок йылас да кокныдыка тойышті. Первой воськовьясө зонкаыс вөчис зэв полігтырйи, а сөсся өдйө котөртіс. И татшөмторйыс вөвлі миян олөмын...

Ас йывсыс ветеран пасйыліс: «Война воясас куимысь кокныда ранитчылі. Дас өти танкысь ковмыліс петны. Ранитчөм да контузитчөм бөрын ёртъяс куимысь кыскылісны менө сот-



---

чысь танкысь. Ме ачим спаситлі сьмертысь эг öти танкистöс. Нель орденöн, «За отвагу», «За оборону Ленинграда», «За взятие Берлина» да уна мукöд медальöн война вылысь локті гортö».

Войнабöрся воясö Вениамин Михайлович сиис челядьöс быдтöм-велöдöмлы. Уна во веськöдліс Изьва вожын Мошъягаса сизим класса школаöн. Сылöн зильöмön тайö грездас лэптисны школалы выль стрöйба. Пальшин мичаа сьыліс, ворсіс сиктса клублөн сцена вылын. 1960 воö Сыктывкарын, народнöй творчество театрын, Мошъягаса самодеятельнöй артистыяс (режиссёраліс Вениамин Пальшин) петкöдлісны Виктор Савинлөн «Райын» пьеса серти постановка. Мошъяга бöрас Пальшин уна во веськöдліс Бакурса да Сизябксса шöр школаясöн.

Пенсия вылö петтöдзыс Вениамин Михайлович юрнуöдіс районса велöдысьяслөн да воспитательяслөн профсоюзöн. Пальшин эз сöмын ачыс бура ворс шахматöн, но и велöдіс сыö уна нывзонмöс. Сійö кужис ышöдны йöзöс, тайö мортыскöд орччöн некод эз гажтöмтчыв.

Вениамин Михайлович Пальшинлөн нимыс пыр кежлö коляс Изьва районлөн историяö.

**Снимокъяс вылын:**

1. Пётр Фёдорович Терентьев войнабöрся воясö.
2. Вениамин Михайлович Пальшин Берлинын.



---

**ПЫДДИ ПУКТАНА АВТОРЪЯС!**

Редакцияö гижöдъяснытö ыстгöн быть колö юöртны:

1. Ассыныд ним, вич, ов; кор да көні чужлöмныд (луң, төлысь, во).
2. Паспорт юöрьяс: номер, серия, кор да көні сетісны, гортса адрес (прописка серти).
3. Индивидуальнöй налогöвöй номер — ИНН.
4. Страховöй свидетельство номер.
5. Банкын счёт реквизитыяс.

**Тайöс юöрттöг редакция гонорар оз вешты.**

---

*Журналын йöзöдтöм гижöдъяс  
редакция оз рецензируют и авторыслы найöс оз мöдöд.  
Редакция оз век во öти кывйö авторъяскöд.*

---

Компьютерный набор — **Н.Кузнецова.**

---

Учредители: Администрация Главы Республики Коми,  
«Союз писателей Республики Коми» — региональное отделение общероссийской  
общественной организации «Союз писателей России».  
Издатель: АУ РК «Издательский дом Коми». Директор Орёл И.Н. Адрес издателя: 167982.  
ГСП-2, Республика Коми, г. Сыктывкар, ул. Карла Маркса, д. 229, Дом печати.

---

Адрес редакции: 167982, ГСП-2, Республика Коми, г. Сыктывкар, ул. Карла Маркса, д. 229, Дом печати. Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

**E-mail: kodzuv@mail.ru; Сайт: www.komimu.com**

---

Подписано к печати 15.05.2019. Дата выхода в свет 31.05.2019. Формат 70x108<sup>1/16</sup>. Печать офсетная. Усл. печ. л. 7; усл. кр.-отг. 8,4; учётно-изд. л. 7,54. Тираж 422. Заказ № 19-4291. Регистр. ПИ № ТУ11 - 00347 от 24.03.2017 г. выдано Управлением Федеральной службы по надзору в сфере связи, информационных технологий и массовых коммуникаций по Республике Коми. Публикация материалов на социально значимые темы осуществляется за счет субсидии, предоставленной Администрацией Главы Республики Коми из республиканского бюджета Республики Коми. Отпечатано в ООО «Коми республиканская типография», 167610, Республика Коми г. Сыктывкар, ул. В.Савина, д. 81. Цена свободная.

## **Гижысьяс да гижны босьтчысьяс пöвстын «Эзысь борд» республиканскöй литературнöй конкурс**

Конкурслөн могъяс:

- видзны да водзö сöвмöдны коми литература кыв;
- кыпöдны авторъяслысь зильлунсö;
- содтыны авторъяслысь лыд да ышöдны гижны босьтчысьясöс.

Конкурссö нуöдöны Коми Республикаса национальнöй политика министерство, Коми Республикаса гижысь котыр да «Войвыв кодзув» журнал редакция Коми Республикаса войтырлөн Ёртасян керка отсöгөн.

Гижысь котыр да «Войвыв кодзув» журнал редакция могмöдöны конкурс нуöдöм, ас кадö примитöны конкурснöй материалъяс да йöзöдöны гижöдъяссö.

Кутасны донъявсьыны «Войвыв кодзув» журналын 2018 вося ноябрьсаян 2019 вося ноябрь тöлысьöдз йöзöдöм коми кывъя гижöдъяс.

Конкурс нуöдсьö вит номинация кузя: «Проза», «Поэзия», «Публицистика да литературнöй критика», «Драматургия» да «Коми кыв выlö вуджöдöм».

Быд номинацияын бöрйысьсö öти вермысь. Комиссия донъялö конкурснöй уджъяслысь художествоа да культура боксян тöдчанлунсö, налысь аслыспöлöслунсö и коми литература да литературнöй кыв сöвмöдöмö пай пуктöмсö. Конкурс котыртысьясыс, кывкörtöдъяс вöчöм бöрын, вермöны лöсьöдны содтöд номинацияс да призъяс.

Конкурс выlö гижöдъяс мöдöдны кабала выlö печатайтöмөн либö электроннöй ногөн. Быд удж дорö содтöд пасйыны авторсö, гижöд нимсö, номинация, адрес да телефон.

Уджъяссö позьö вöзйыны некымын номинация серти. Гижöдъяс бөр оз мöдöдсьыны.

Гижöдъяс ыстыны: 167982, Сыктывкар, Карл Маркс улича, 229 номера керка, «Войвыв кодзув» журнал редакция, либö [kodzuv@mail.ru](mailto:kodzuv@mail.ru) электроннöй почта выlö. Конкурслы кывкörtöд лоö вöчöма 2019 во помöдз.

